

KURIKULUM STANDARD SEKOLAH MENENGAH

BAHASA SEMAI

TINGKATAN 5

Penulis

RASILA BINTI YAS
SHAEMAS A/P MAT
SUHAIMI A/L HUSIN

Editor

MOHD 'UDZAIR BIN DEPANAİK
MOHAMAD ARSHAD BIN SULAIMAN

Pereka Bentuk

NOOR HAYATI BINTI MD HASSAN

Ilustrator

ABDUL AJIS BIN SAİDİN



DBP

Dewan Bahasa dan Pustaka
Kuala Lumpur
2020



KEMENTERIAN PENDIDIKAN MALAYSIA

No. Siri Buku: 0081

KK 499-221-0102081-49-2875-30101
ISBN 978-983-49-2875-9

Cetakan Pertama 2020

© Kementerian Pendidikan Malaysia 2020

Hak Cipta Terpelihara. Mana-mana bahan dalam buku ini tidak dibenarkan diterbitkan semula, disimpan dalam cara yang boleh dipergunakan lagi, ataupun dipindahkan dalam sebarang bentuk atau cara, baik dengan cara bahan elektronik, mekanik, penggambaran semula mahupun dengan cara perakaman tanpa kebenaran terlebih dahulu daripada Ketua Pengarah Pelajaran Malaysia, Kementerian Pendidikan Malaysia. Perundingan tertakluk kepada perkiraan royalti atau honorarium.

Diterbitkan untuk
Kementerian Pendidikan Malaysia oleh:
Dewan Bahasa dan Pustaka,
Jalan Dewan Bahasa,
50460 Kuala Lumpur.
No. Telefon: 03-21479000 (8 talian)
No. Faksimile: 03-21479643
Laman Web: <http://www.dbp.gov.my>

Reka Letak dan Atur Huruf:
Dunia Ilmu Enterprise Sdn. Bhd.

Muka Taip Teks: Times New Roman
Saiz Taip Teks: 11 poin

Dicetak oleh:
Percetakan Nasional Malaysia Berhad,
Jalan Chan Sow Lin,
50555 Kuala Lumpur.

PENGHARGAAN

Penerbitan buku teks ini melibatkan kerjasama banyak pihak. Sekalung penghargaan dan terima kasih ditujukan kepada semua pihak yang terlibat:

- Jawatankuasa Penyemakan Naskhah Sedia Kamera, Bahagian Sumber dan Teknologi Pendidikan, Kementerian Pendidikan Malaysia.
- Pegawai-pegawai Bahagian Sumber dan Teknologi Pendidikan, Kementerian Pendidikan Malaysia.
- Pegawai-pegawai Bahagian Pembangunan Kurikulum, Kementerian Pendidikan Malaysia.
- Jawatankuasa Peningkatan Mutu, Dewan Bahasa dan Pustaka.
- Jawatankuasa Panel Pembaca Luar, Dewan Bahasa dan Pustaka.

KENANDUG

Pemulak v

Penepete Kenandug vii

TEMA: DUNIAK ENG

Unit 1: Indah Sinui Adeh 2

Unit 2: Tular 7

Unit 3: Neamal Tradisi Agok Bipinggir 13

Unit 4: Budi Bahasa Asas Senejahtere Bangsak 19

Unit 5: Bahasa ru Budaye 25

Unit 6: Kazanah Alam ku Bumi Betuah 31

Unit 7: Senubai 37

Unit 8: Berkus Negara 43

Unit 9: Menatag Ces Tanggongjawab Besamak 49

Unit 10: Inovasi ru Daye Kreativiti 55

TEMA: DUNIAK CERITE

Unit 11: Benisik Serag 61

Unit 12: Cerite Rakyat Tetap Ku Nus 67

Unit 13: Henibor Mai Manah 73

Unit 14: Santuniloh Enai 79

Unit 15: Neutame Senelamat Ku Belok Pen 85

Unit 16: Aktip Dirik Hik 91

Unit 17: Kenepimpen 97

Unit 18: Jenaye Kijadik Benanggak 103

Unit 19: Inspirasi 109

TEMA: DUNIAK LEMU PENANEI

Unit 20: Duniak Mol Jaras 116

Unit 21: Rakyat Sehat, Negara Tejamen 121

Unit 22: Teroke Lemu Pai 127

Unit 23: Paneika Engkek? 133

Unit 24: Kibese Jenaya Kateh Duniak Peneniage 139

Unit 25: Usahe ru Tamah Berengkep 145

Unit 26: Kewangan 151

Unit 27: Kelestarian Alam Sekitar 157

Unit 28: Belaar Tik Hik 163

Unit 29: Malaysia ku Mat Duniak 169

Lenateh 175

Glosari 182

Renujok 183

Indeks 184

PEMULAK

Bob teks *Bahasa Semai Tingkatan 5* adeh bitules jijoi Dokumen Standard Kurikulum dan Pentaksiran (DSKP) *Bahasa Semai Tingkatan 5*, Kurikulum Standard Sekolah Menengah (KSSM) de bisediak ya Bahagian Pembangunan Kurikulum (BPK) ru peneseambah bahan bekaler de unik ru menarek. Cenempet cerngai ru belwal, menacak, menules, seni engrok ru tatamengwal de mong kateh DSKP bisusun jijoi kesesuaian ju tahap mudah nu tahap terik dek cenempet ru penanei ajeh kep bipelajari ya mureb secare ansur maju.




Bob adeh mong bahan-bahan renangsang ju nik tema ru jap tema bicerlah jijoi unit tetentuk. Tema de mong kateh bob adeh ialoh Duniak Eng, Duniak Cerite ru Duniak Lemu Penanei. Tema adeh bicerlah nu 29 unit. Alaupun tema-tema adeh samak rah bob teks *Bahasa Semai Tingkatan 1, Bahasa Semai Tingkatan 2, Bahasa Semai Tingkatan 3* ru bob teks Tingkatan 4 tapik skop bahan de bipileh bebize. Penepileh bahan kateh bob adeh bibeh secare teliti jijoi penenteng, kesesuaian, maklumat de tepat ru variasi bahan de sesuei ru tahap mureb. Bahan-bahan jugak bikep ju bebegei sumber, iaajeh sumber skunder ju benacak, renujok ru sumber primer ju penerhati, kenaji lenapang serte wawancara.












Ju segik peneseambah, ju segik peneseambah, bahan-bahan de bipileh biperseambah kateh mentok de menarek ru unik rah penapar halaman bekembar de menarek ha kimudah nunanek tajuk bipesembar secare mendalam jijoi variasi teks ru grapik. Genabong antare teks, audio, grapik de bewarne-warni bigunak kateh nujap halaman mampuk kiog mureb kenenjip peneberajal de sernuk ru had beregak.

Teknologi kod QR jugak bigunak kusus ha kimuat bahan bantuk berajal ha cenempet cerngai ru belwal kateh mentok audio. Selaen ajeh, kod QR adeh juga bigunak ha kitamong maklumat tenamah kateh mentok nota tatamengwal, info tenamah ju Internet ru kekilek. Bahan-bahan kateh bob adeh jugak jeoi biperseambah kateh mentok peta pemikiran dek mureb-mureb boleh kipaham kemahiran kognitip de abstrak ju bentuk visual de konkrit.

Selaras ru sesuei ru ciri-ciri Pengajaran dan Pembelajaran Abad Ke-21, bob teks adeh mampuk kijadik ektiviti berajal bahasa lebeh aktip, kicabar kreativiti ru kemahiran berpikir, serte sernuk. Ektiviti de mong mampuk kicabar memureb ru Kemahiran Berfikir Aras Tinggi (KBAT), kemahiran maklumat ru komunikasi, beh penutos ru kieselesi masalah serte kerjaye de berteras neamal nilei murni ha kiperyos mureb de mong kemahiran abad ke-21. Selaen ajeh, sebegei usehe ha pejadik Bahasa Semai sebegei bahase lemu de lasik, bebegei banse bahan benacak biper muj dek daye peniker ru minat bebacak mureb buleh biperhuj nej.

Dokumen Standard de bigunak kateh KSSM kitekan ha penggabongjenalen rimdij jap cenempet, berengkep lemu ru hipersui nilei murni. Ikon-ikon kiwaket rimdij cenempet kateh KSSM rah:

	Cerngai ru Belwal Ikon adeh ialoh pokes de utame kaha ujik cerendig mureb naiha cerngai, belwal, becerite ru bebincang secare bengwal. Cenempet adeh jugak kihod mureb saleng naibelwal.
	Menacak Ikon adeh ialoh pokes de utame kaha ujik cerendig mureb bebacak naipaham ru menaakol bebegei bahan ru betul ru tepat.
	Menules Ikon adeh ialoh pokes de utame kaha ujik cerendig mureb naiha beh tenules ru ha perlei maklumat betules nu mai kilek.

	<p>Tatamengwal Ikon adeh ialoh pokes de utame kaha ujik cerendig mureb naiha berkep ru gunakan tatamengwal ru betol jiji kontek:</p> <ul style="list-style-type: none"> • Engrok Asal Bahasa Semai • Engrok Peninyap • Engrok Tungal • Neimboh • Engrok Majmok • Engrok Muh • Engrok Hubug Penancang • Engrok Kerjak • Engrok Penegas • Ayat Sahreh • Engrok Edjektip • Pola Ayat • Engrok Tenerbet • Ayat Ektip ru Ayat Pesip • Engrok Hubug Genabug • Sistem Neije • Ayat Sensual ru Ayat Penyate • Engrok Gande Tebeg • Ayat Tungal ru Majmok • Engrok Muh Has • Engrok Sendi Muh
	<p>Seni Engrok Ikon adeh ialoh pokes de utame kaha ujik cerendig mureb naiha sebot, paham ru regak engrok de bor jiji berajal de sernuk secare didek hibor.</p> <ul style="list-style-type: none"> • Besajak • Besewang • Bedindag • Bepantut • Becerite • Besyaer • Belakon
	<p>Ektiviti Ikon adeh ialoh ikon de kihod mureb naibeh ektiviti de mong ku kateh bob teks Bahasa Semai.</p>
	<p>Audio Ikon audio ialoh ha kitingkat pungsi bob teks jiji bahan audio.</p>
	<p>Lenateh Ikon lenateh ialoh ikon de kihod mureb naibeh lenateh de biog.</p>
	<p>Standard Berajal Ikon adeh kipenyate standard berajal ha muke surat ajeh. Numbor standard berajal de bikale ceher ialoh pokes utame.</p>
	<p>Kenukoh Ikon adeh ialoh ikon de kihod mureb naibeh ektiviti naiha pekukoh pengham ha topik de mong kateh nunanek unit.</p>
	<p>Kod QR Ikon adeh ialoh ikon de kiog maklumat tenamah ju sumber Internet.</p>
	<p>AR Maklumat tenamah kateh mentok animasi atao interaktiviti de boleh biimbas ru telipon atao tablet. Mureb hodloh muat turun aplikasi AR DBP Bahasa Semai Tingkatan 5 ju Google Play (Android) atou App Store (iOS) peksendok kiimbas kod AR ajeh.</p>
	<p>Info Ikon adeh ialoh ikon de kiog maklumat ha nanek pekare.</p>
	<p>KBAT Ikon adeh ialoh ikon de kiog maklumat ha nanek pekare bekenae unsor Kemahiran Berfikir Aras Tinggi (KBAT).</p>


PENEPETE KENANDUG

BIL.	TEMA	UNIT	TAJUK	SP	GENRE/ SISTEM	KBAT	i-THINK
1.	DUNIAK ENG	1	Indah Sinui Adeh	1.3.2, 2.2.1, 3.2.2, 4.3.2, 5.1.2	cerpen engrok muh		
		2	Tular	1.4.3, 2.1.2, 3.2.3, 4.2.2, 5.1.2	sajak engrok kerjak		
		3	Neamal Tradisi Agok bippinggir	1.1.3, 2.1.3, 3.4.3, 4.2.2, 5.1.2	pantut engrok edjektip		
		4	Budi Bahasa Asas Senejahtera Bangsak	1.1.1, 2.1.3 3.1.2, 4.2.2, 5.3.3	syaer engrok majmok		
		5	Bahasa ru Budaya	1.3.1, 2.3.3, 3.3.1, 4.1.2, 5.1.2	laguk engrok neimboh		
		6	Kazanah Alam ku Bumi Bertuah	1.3.1, 2.3.1, 3.1.3, 4.2.1, 5.1.2	sajak/gurindam engrok gande		
		7	Senubai	1.1.2, 2.3.1, 3.2.1, 4.4.1, 5.4.1	cerpen engrok sendi muh		
		8	Berkus Negara	1.1.1, 2.1.2, 3.4.2, 4.2.4, 5.1.2	sajak engrok tenerbit		
		9	Menatang Ces Tanggungjawab Besamak	1.3.3, 2.3.1, 3.2.3, 4.3.1, 5.1.2	pantut engrok seru		
		10	Inovasi ru Daye Kreativiti	1.1.2, 2.3.2, 3.3.3, 4.2.2, 5.4.1	sajak engrok hubong genabog		
2.	DUNIAK CERITA	11	Benisik Serag	1.1.1, 2.4.4, 3.3.1, 4.4.3, 5.1.2	cerpen ayat tenayak		
		12	Cerite Rakyat Tetap Ku Nus	1.2.1, 2.4.4, 3.3.3, 4.4.1, 5.1.1	cerpen engrok penegas		
		13	Henibor Mai Manah	1.1.2, 2.1.3, 3.1.2, 4.2.3, 5.3.3	engrok penguat		
		14	Santuniloh Enai	1.1.2, 2.3.2, 3.4.1, 4.2.3, 5.1.2	cerpen ayat napi		
		15	Neutama Senelamat Ku Belok Pen	1.3.2, 2.3.1, 3.1.2, 4.5.1, 5.1.2	engrok peninyap/		

BIL.	TEMA	UNIT	TAJUK	SP	GENRE/ SISTEM	KBAT	i-THINK
		16	Aktip Diri Hik	1.1.2, 2.3.1, 3.1.1, 4.2.2, 5.1.2	engrok kerjak pantut engrok	menganalisis	
		17	Kenepimpen	1.4.3, 2.1.2, 3.4.3, 4.3.1, 5.1.2	perintah cerpen engrok ganti		
		18	Jenaya Kijadik Benanggak	1.4.1, 2.3.3, 3.2.1, 4.3.2, 5.1.2	muh ayat perintah		
		19	Inspirasi	1.3.3, 2.2.2, 3.3.1, 4.2.2, 5.2.3	sajak pola ayat		

3.	DUNIAK LEMU PENANEI	20	Duniak Mol Jaras	1.1.3, 2.3.2, 3.4.1, 4.2.2, 5.1.2	sajak ayat tunggal		
		21	Rakyat Sehat, Negara Terjamen	1.4.3, 2.3.2, 3.1.2, 4.4.1, 5.3.1	Skrip drama ayat tunggal/ ayat majmok		
		22	Teroke Lemu Pai	1.1.2, 2.3.1, 3.3.1, 4.1.1, 5.1.2	cerpen ayat sahreh		
		23	Paneika Engke	1.1.1, 2.1.2, 3.4.2, 4.3.1, 5.2.1	gurindam ayat seru		
		24	Kibesh jenaya Kateh Duniak Peneniage	1.1.1, 2.3.3, 3.4.1, 4.5.3, 5.3.1	ayat sensual		
		25	Usahe ru Tambah Berengkep	1.2.3, 2.3.2, 3.2.2, 4.2.4, 5.1.2	sajak ayat perintah		
		26	Kewangan	1.3.1, 2.1.2, 3.4.1, 4.4.3, 5.1.2	ayat ektip ru ayat pesip		
		27	Kelestarian Alam Sekitar	1.3.3, 2.3.2, 3.3.3, 4.3.1, 5.1.2	syaer ayat seru		
		28	Belaar Tik Hik	1.3.2, 2.3.3, 3.4.3, 4.3.2, 5.3.3	sajak penjudoh benilang		
		29	Malaysia ku Mat Duniak	1.3.2, 2.3.2, 3.4.1, 4.2.3, 5.1.2	cerpen ayat dasar		

DUNIAK ENG



UNIT 1

Indah Sinui Adeh



Cerngai ru Belwal

Teroke Ektiviti ku Kampug

Rekrop kak

Jermei cep

Ham tarok


Dag kedeg

Teroke Ektiviti ku Kampug

Ma ektiviti de senalo naibeh ya mabek litau ru menaleh ku kampug?

Jijoi pendapat hek, ma paedah hik kep ju ektiviti mase lapang?

?

- 
- Ektiviti**
1. Jijoi maklumat ku kemil, beh simulasi kateh kelas.
 2. Ru gunakan menudah pusat sumber sekolah, beh nanek sarahan betajok "Isik mase lapang berupe pekare bepaedah".



Menacak

Banse Dag



Dag Pug

Dag adeh bibeh ku kemil tik ha pug denak. Dag adeh bibeh ju cag jehuk ru awat. Ijeknut bibeh ju cog ru dawei. Kusemadedek bidag icaknak ha umpan denak. Kuijeknut mong ipenyendal, amen pug kijejabat an birot atao bijot.

Dag Libas

Dag banse adeh biasak bigunak ha cep. Dag adeh bigunak cag jehuk de cegeh ru buleh bilentor ru bibeg ru tarok atao awat tajap. Menatag de kiperek was dag an kiheg ru biripal ya cag jehuk de biseg.



Dag Perog

Dag adeh bibeh ju awat bidag ha perog. Nanek ruas awat bigunak ha beh dag. Kateh awat ajeh bidag ya awat tajap ru bisangkut ru cog atao cag de cegeh. Amen perog kimuj kateh awat, itagin an birot ru kidat.



Dag Serkap

Dag banse adeh senalo bigunak kateh serag. Dag adeh bibeh ju awat ru bibeg ya cog. Dag adeh birike ha menatag rah poi, becog, mor ru menghar serag. Biasak menatag naimuj dag amen naikerngoi caknak de bidek sebegei umpan. Telas naimuj ku kateh dag ipintu an kitutop ru menatag kiheg ku ikateh.



1. Bacak ru paham maklumat ku kemil.
 2. Gares enam nekate terik, og iceti ru beh ayat.
- Ektiviti** 3. Belwal secare bergu ha bekenaaet hobi engkek.



Menules

Isenang Bahneh Baur Beltop



Two horizontal lines for writing on a pink sticky note background, with a small pencil icon above each line.



Two horizontal lines for writing on a light blue sticky note background, with a small pencil icon above each line.



Two horizontal lines for writing on a light green sticky note background, with a small pencil icon above each line.



Two horizontal lines for writing on an orange sticky note background, with a small pencil icon above each line.



1. Jijoi gambar ku kemil, tules care-care bahneh baur beltop joi tenurot de betol.

Ektiviti 2. Bacak entoi ku kateh kelas ayat-ayat de siap bitules.



Kak Jenalak Apak

Tum ... tum ... engrok engku kibertah.

“Iyem, tutop tinkap doh perai,” amek kihai ju dengwal.

“Yes, madam,” balas Bah Iyem kateh engrok mai biyeg.

Bah Iyem menang eng kek iluj mimang cengor, kigenmar kacau jik kateh deg.

“Menong apak hek adeh Wan? Ya jear pen tok kijug-jug madeg, tah ma kipelingah ku Gel Magai,” amek kirakrok.

“Tah,” balas Bah Ewan ringkas.

Ju coinek, eng perati amek seril kigei. Kicip ditah-direh susah isengik apak peksik kijug. Manik gu lebat kiceh tik ya manah sot. Eng pai dij seryap kerjak sekulah de biog ya Cikgu Aina sambel entag ceringai belwal amek ru memenang eng.

“Amen ngpanei manik lebat nek, amek kiget apak et bejalak. Walahloh ente hik idui adeh pekma, bukan tok hik biasak,” urok amek.

“Ajehloh eng ha bese nek tapik kiget mende jis niknij nek,” balas Bah Ewan menang eng ketiga.

“Nasib tok hek bese nek, alau tok ru hek sekali tok jerkek jug,” urok amek.

Sengik eng mulak risau, engrok engku tok behentik.

“Yama apak lekat pek kiloi madeg?” Eng serangik ha apak.

Lekat segar ku neingat eng, mende eng ha bayar duet kelas, apak sanggop kijalak kak talapia kijual nu mai kampug. Mase ajeh apak walah iduet, peksik kikep gaji. Alau ha joi, belok cukop takat gaji mesin nyok tapik apak lebeh kiutame ha iperingak. Biar ilei kilog bajuk caceh, kasut teloh ru kicak caknak berei tok kikisah asal mabek ikenah kenon cukop penakei ru caknak. Biar ilei hajap tapik kinyek jik turot hajap. Eng kenjip bangga mong apak de hebat alaopen serbe kenurang.

Tok ... tok ... tok ... engrok kenetok pintuk ku dengwal kibeh eng ngkekjet.

“Ajeh pasti apak,” bisik eng kateh sengik.

“Iyem ... yem ... nyong adeh kak jenalak apak. Beiloh madeh mong kak tengas genmar hek,” engrok apak kicereg menang eng ru ibajuk kaanj-kaanj biceh ya manik.

“Wah, jeoi kak enjun kep pak. Kelem adeh amek boleh kigulei kak tengas,” urok Bah Iyem kikenjip sernuk.

“Buleh be,” balas amek.

“Tentuk sedap,” urok Bah Ewan nej.

Eng kernyim taleh ngngeng kelakuk menang eng. Kateh sengik eng besukur apak kijug ru selamat. Ilei kipasal, ilei lingah kiloi mende kibetede ku jambor sementara kipoj manik kihoj. Eng senalo bedoa dek apak biog senihat de bor ru jik nu peringak kekal bahagie alaopen tok mewah rah mai kilek. Apakloh hero ku sengik eng.



Ektiviti

1. Bacak cerpen ku kemil ru hurei ceti tesurat ru tesirat.
2. Jijoi nepetek, beh nanek sajak ha apak.






Engrok Muh

Sengoi

Menatag

Tempat



☆ ☆

☆ ☆

☆ ☆



☆ ☆

☆ ☆

☆ ☆



1. Jijoi gambar ku kemil, tules engrok muh de sesuei ru beh ayat.
2. Senarei 20 engrok muh am ru has ru joi kategori masig-masig kateh mentok peta pokok.

Ektiviti

UNIT 2

Tular



Cerngai ru Belwal

Rediu Karat

Nearah:

1. Imbas kod ku kemil.
2. Mentok memerip kumpolan.
3. Ui nanek benares ru mureb ku imol kihapal ayat atao gaye jjoi kateh bideo de biog ya cikgu.
4. Secare begiler-giler mureb naibebisik ku entag atao naidadek gaye ku kawat ku nungar.
5. Mureb ku nungar hodloh bentang ku kelas.



Ektiviti

1. Ma de engkek kep ju ektiviti adeh? Og peniker engkek kateh kelas.
2. Begeiharok ha berkep maklumat de tepat ru sahah? Bincang ru tules kateh bob.



Bideo Patik

Pegelap ajeh tok begei senalo. Langkah Ramli nu sekolah begei serbe tok kenak. Ilei begei mai aseng mende bikerek ya ikawat. Mong ku antare enai bebisik-bisik ru nailug. Ramli kikenjip tok selese ru keadaan ajeh. Bile ilei ha perek ikawat kelas, naimulak og seribu nealas ru naibelaluk ed. Keadaan adeh teneros lei dij sekolah. Seribu nanek penesual menman ku peniker ilei.

Ha pernyep tenekan, Ramli kihol kot udare berkes kerileng taman menman. Bile kijoi trek joling, ilei biserapak ya Bah Karim de berupe isepupu.

“Ramli poj nok ... mong nanek pekare ha tanyak?” Bah Karim kicereg ju nyak ru kikernyim.

“Ya ... ha tanyak ma Karim,” Ramli kibalas.

“Betol ka eng ngcerngai gah hek? Sibok nanek sekolah hek bicap ya pulis nar jis telas mende meragot. Bideo hek bicap tular ku medie sosiel ru bikungsi kenalag kawat-kawat sekolah,” besunggoh-sunggoh Bah Karim kisual.

“Ma hek bual adeh Karim,” Ramli kiperneng reaksi kikekjet ru kiperhuj iengrok. Ilei cubak kisergik nej ma belakuk mase cuti peksendok adeh.

“Mong mai bual hek bicap meragot ru kawat hek lewat berkes ku pekan. Mai kerileng naicap hek ru naiog ku pulis,” Karim kaha panei icerite bernor.

“Yok..bok imai de anj cerite adeh. Nar jis canuk eng bianj nu balai pulis ha beh repot kes ragot. Eng ngpegagal kes ragot ru ngsipak peragot mase kianj mutu. Numom mai engrak na kijadik mangse peragot ajeh. Telas eng sipak peragot ajeh, mai kerileng naitulog cap peragot ajeh. Buleh eng ngngeng bideo ajeh Karim?” tegas Ramli kateh engrok tok puas sengik.

“Nah neng bideo adeh Ramli,” Karim kiog telipon bimbbit.

“Adeh bideo eng kateh kerite peronde pulis. Pulis naior joi ha beh repot. Patot kawat-kawat ku sekolah naipernyak ju eng. Bok de pos bideo ajeh?” Ramli kisemanj penasti.

“Bah Ali kipos bideo ajeh,” patik jenawap Karim.


“Tok buleh jadik adeh, bideo patik ru maklumat kiperloi de tok tepat an kitumul masalah ru kiaib eng. Eng ha terbuk Bah Ali ha selese masalah adeh,” nyik isengik Ramli.

Ubai pen baicip nu deg Bah Ali mase ajeh jugak.



1. Bacak nepetek ku kemil ru og penandang isu ku kemil.
2. Amen engkek sebegei Ramli, ma tenindak engkek bile terbuk ru Bah Ali? Ui nanek lenakon jenim ajeh.

Ektiviti


 Menules

Senalo Beringat Awas!

Akta Komunikasi dan Multimedia 1998

Seksyen 233 - Penggunaan tidak wajar kemudahan rangkaian atau perkhidmatan rangkaian

Seseorang yang dengan menggunakan mana-mana kemudahan rangkaian atau perkhidmatan rangkaian atau perkhidmatan aplikasi secara sedar –

- (i) membuat, mewujudkan atau meminta-minta; dan
- (ii) memulakan penghantaran, apa-apa komen, permintaan, cadangan atau komunikasi lain yang lucuh, sumbang, palsu, mengancam atau jelik sifatnya dengan niat untuk menyakitkan hati, menganiayai, mengugut atau mengganggu orang lain; atau
- (b) memulakan suatu komunikasi dengan menggunakan mana-mana perkhidmatan aplikasi dengan niat untuk menyakitkan hati, menganiayai, mengugut atau mengganggu mana-mana orang melakukan suatu kesalahan.

Jika disabit kesalahan di bawah seksyen ini, pesalah boleh dihukum di bawah Seksyen 233(3) akta sama iaitu boleh didenda tidak lebih RM50,000.00 atau dipenjarakan tidak lebih setahun atau kedua-duanya, dan juga boleh didenda selanjutnya RM1,000.00 bagi setiap hari kesalahan itu diteruskan selepas pensabitan.

(Sumber: Akta Komunikasi dan Multimedia 1998)


Ektiviti

1. Bincang ru og penandang nu akta ku kemil kateh kunteks negara hik.
2. Bahas isu dil gah tok sahik amen tok bikawal.



SeniEngrok



AUDIO 1

CONTOH

Seceet kernyim

Hek mimang rual biasak
hek bepewatak sunggoh bor
hek janyik mengkah.

Nekate hek betol-betol ceet
janyik hek lasik nu lod
jeoi mai tepikat ru kenayak hek pej.

Engrok hek ... labor nusembei untong nulaot
numom demi numom muj perangkap de hek pasag
hek kernyim ...

Hek bual sabar ... sistem mong masalah
sarikat bitukar nu rual negara
gek mase nej selese.

De bipoj tok bekunjong tibak
telipon ru kedei bitutop tetibak
hek nyep walah gah.

Mong mai jap tok belaguk
mong mai bikek ya bank
mong mai perlet cerite.

Ajehloh hergak de hod bibayar
kenayak duniak de rugik
moga jadik nanek peneajar.



Ektiviti

1. Deklamasi sajak ku kemil ru peterang iceti.
2. Beh neulas ha sajak ku kemil.



Tatamengwal

Penandu Senelamat Genunak Internet ya SKMM




1. Kernal pasti kawat maya engkek.
2. Amal penegunak engrok de bor.
3. Beinteraksi ru behemah ru mai kilek.
4. Kemaskini engrok kunci engkek sekerap mungkin.
5. Inpormasi ku mol jaras engkek. Manpaat sebor mungkin.
6. Bebudi bahase ru jagak peribadi engkek amen gunakan Internet.
7. Ingat, Amen engkek kep e-mel ju sengoi de tok bikernal getloh bukak!
8. Betanggungjawab ru ma engkek tules ru get nukalik perhol ayat de mungkin pernyik sengik mai kilek.
9. Behati-hati amen kungsi gambar engkek mende mungkin boleh bisalah gunakan ya individu de beniat tok bor.



1. Kek ayat ku kemil de mong engrok kerjak. Ui 10 ayat de mong engrok muh ru engrok kerjak.

Ektiviti

2. Tules nanek renumus, yama engkek hodloh senalo kemaskini engrok kunci akaun kateh alam maya.





Kenukoh

Tenipuk Alam Maya



Debat isu "Tenipuk Alam Maya" ku kemil kateh kelas.

Ektiviti

UNIT 3

Neamal Tradisi Agok Bippinggir



Cerngai ru Belwal

Petue-petue Mai Raknak

Petue peluwen sej

Permuju memerip selak nangkak atao memerip pelek betik nyam biseler bipermuju kateh geknap.

Petue ha penglai panau

Kot memerip helei selak gelenggang biseh ru bicampur ru nutitik senem gas. Telas ajeh bisep ku bahgian bepanau.

Petue ha pergoh kendej pucok betik

Gap pucok betik ru selak keduduk. Telas ajeh perhol selak keduduk.

Petue ha Penglai umet

Kot memerip helei selak perie, biramaj ru bisep ku bahgian beumet.

Petue ha berseh ulah besenem atao bermon

Kot memerip helei selak jambu batu ru biseh lei hancur. Telas ajeh bigusok nu ulah.

Petue ha pecerleh beket berog

Kot memerip selak bungak rayak, ramaj lei hol ileher ru bisep ku temagik.



Umet iceti met atao kurap



Ektiviti

1. Jijoi maklumat ku kemil, bincang ru og pendapat engkek ha petue-petue ajeh.
2. Peterang petue-petue kilek de engkek panei kateh kelas.



Neamal Murni Masarakat Orang Asli de Patot Bipetahan

Neamal amen belakuk danan

Mai kampug an naitangoh rimdij kerjak de naibeh jis ajeh rah beselai, beinte ru kilek-kilek lei upacare ceknup selese. Adeh ha perwir pekare tok bor ru sebegi tandak hurmat nu mai dat. Rimdij sedarak-marak an tibak ha naisuek mai dat. Mai de tibak an og senumbang benarang penerlu rah jerengkeh, caknak atao og benantuk ha pergek beneban peringak mai dat.

Neamal amen kendurik

Mai kampug an besamak-samak naibantuk tuan deg habeh kerjak secare begutong-ruyong rah berencet, ha kek ceos, tulog berseh was kendurik ru kekilek. Mai kampug jugak naibantuk og senumbang samak mong kateh mentok benarang atao jerengkeh. Kenjip kerakmik adeh bikungsi besamak-samak tuan deg.



Kenjip hurmat nu serag

Serag berupe pusaka turun-temurun ju jenang ru hod bipetahan ru bor. Mai sengoi hod najagak ru gunak sumber ju serag ru cermat. Serag nyiknyuk bigei ya sengoi taleh tapik jugak makhlok-makhlok kilek de kep kipengaroh sinui sengoi. Mai sengoi hurmat nu alam ru lienai najagak henubong harmoni adeh.

Amen kikep yas serag

Amen lienai naikep yas serag de jeoi, lienai an bekungsi ru mai kampug. Sipat genmar bekungsi reski adeh na kijadik neamal ju jaman manah nej. Bile tibak gus pelek, hasel pelek ajeh jugak an bikungsi besamak sanak sedarak. Sipat bekungsi hasel bikep berupe neamal de patot bipetahan.



1. Bacak bahan ku kemil ru ui serengkol ha nilei-nilei murni de mong.
2. Og pendapat engkek secare betules, yama neamal-neamal ku kemil hodloh hik petahan?

Ektiviti



Menules



AUDIO 2

Bei Tanyak Jajak



Bah Teda ru ijajak baibegibang ha pantag larang de jadik neamal ya mai sengoi.

Bah Teda: Jajak, mai hik adeh percayak ru jeoi pantag larang, kan?

Jajak: Hooh, mende adeh na kijadik neamal ju jaman jenang hik nej.

Bah Teda: Jeoi pantag larang de eng tok panei loh jak ... jeoi betol. Tatak senalo kibelal nu eng bile eng joi tatak nu serag.

Jajak: (kileklug) amen begei ajeh ... hek kenakloh berajal ha pantag larang mai hik.

Bah Teda: Eng nghod berajal ru jenloh, sengoh eng nu tatak.

Jajak: Buleh ... ma de hek hod panei ha pantag larang?

Bah Teda: Eng nghod panei ha pantag larang amen hik hicip nu serag.

Jajak: Jeoi ipantag. Amen kateh serag empag kenak jagak agok rabog, agok sebot pekare-pekare de tok bor, sengoh hik tekanak. Selaen ajeh, amen hek cip nu serag jugak agok hek mur engrok de hek cerngai atao hek kerek pekare-pekare de ganjel sengoh bicak ya mergas.

Bah Teda: Ee ... besengoh eng cerngai jak.

Jajak: Nyiknyuk ajeh taleh ... hik pen tok buleh beh renyah, doh mai tepas kibelal.

Bah Teda: Jeoi betol ipantag. Hik hikenak joi ka jak?

Jajak: Mestiloh ... kan adeh neamal ru bengsat mai raknak.

Bah Teda: Had jeoiloh jak ... eng sengoh eng ngsip.

Jajak: Tok ma, hek berajalloh.

Bah Teda: Mong ka pantag larang de kilek jak?

Jajak: Mong, jeoi ipantag mai hik adeh. Hik tok buleh leklug atao perman menatag, sengoh belakuk terlaj. Amen hek bejanyik nu mai kilek hek hodloh tepati amen tok an tekanak serenglog rah bisod ya tajuk, jer atao bicerteh ya jehuk.

Bah Teda: Sengohloh jak eng ngcerngai. Jak, eng pen na eng cerngai kekawat eng naicerite amen terlaj an belakuk pes de kuat.

Jajak: Hooh betol. Nyiknyuk pes taleh, an celeh manik lebat ru kiperhol teu ju tik. Amen belakuk terlaj jengoi hik an dat.

Bah Teda: Patotloh tatak senalo kibelal nu eng, eng senalo langgar pantag.

Jajak: Hunen hek na panei ru berajal, telas deh agok hek habeh pekare de biget.

Bah Teda: Telas adeh, eng ngharap eng tok an langgar pantag nej.

Jajak: Borloh rah ajeh. Hik mai sengoi adeh patot joi bengsat mai manah. Mai manah lienai naibeh pantag larang ajeh mesti mong ikayat.

Jajak: Betolloh jak.



Mai tepas iceti mai bunian



Ektiviti

1. Jijoi maklumat ku kemil, beh kenarang mentok sarahan atao pidato betajak "Sebab-sebab neamal tradisi hodloh bipetahan". Engkek buleh ceryak sumber tenamah ku perpustakaan atao Internet.
2. Bacak dailog ku kemil ru beh lenakon secare jelos.



Ingatloh Bengsat Mai Raknak

Rajit berajal ha bejaye,
Adeh sipat kenon Bah Kamal;
Adat bangsak lambang budaye,
Tok an kinyep amen biamal.

Batin Bah Tim bor ikenah,
Genmar betulog ternyul ihurmat;
Pantag larang bibeh mai manah,
Dek sinui hik teros selamat.

Apak kigenmar beparik ku taman,
Telas beparik kicip nu pasar;
Bengsat mai raknak jadik pedoman,
Tenuju sinui tok an tesar.

Cip nu selai kaha gik telei,
Telei bikip had ijeoi;
Bengsat mai manah lasik inilei,
Mai nyennyam hodloh najioi.

Kihod huj cenan pehod ijug,
Kisemanj serum nu ikenah;
Tradisi bijagak sakak bijunjong,
Pai tepelihare adat de manah.

Og cengroi nu mai dadat,
Og jugak ru pelek gamus;
Samakloh hik hijunjong adat,
Teras budaye hisat nu nus.

Cet ceber jengoi itare,
Kerjak kuat agok menman;
Budaye bangsak kukoh bipelihare,
Tok an nyep bilip ya jaman.

Sireh bilipat beleg bikacip,
Bipalet ya kop kicak Bah Tanjung;
Tradisi manah hik agok bipersip,
Adat bibok budaye bijunjong.

Hod lelep tok bekawat,
Was lelep nyak ku jeres;
Adat bijunjong sakak biingot,
Hod hik petahan jadik pewares.



Serum iceti serop



Ektiviti

1. Bacak pantut ku kemil ru peterang iceti jap-jap rangkap.
2. Kateh kumpolan, cipite nanek pantut bekenaeat bengsat mai raknak ru pesembah kateh kelas.



Orang Asli Bateq Pakar Serag

Kota Bharu, 10 Jun - Orang Asli Bateq berupe Orang Asli kateh kategori Negrito de jeoi naigei ku Kelantan, Terengganu ru Pahang. Lienai mong ku padeh ju manah entem kirak-kirak 100,000 tahut de laluk serte lienai tekenal sebegei suku de had pakar ru panei ha serag.

Pengarah Institut Penyelidikan dan Pengurusan Kemiskinan (INSPEK) Universiti Malaysia Kelantan (UMK), Profesor Madya Dr. Wan Ahmad Amir Zal Wan Ismail kiyap suku Bateq naigei ku kerileng serag ha naimudah cip leplep ru naikumpol yas serag sesuei ru care sinui lienai sebegei masarakat pemburu ku Semenanjung Malaysia.

Kiyap nej, Orang Asli Bateq an naimuj nu serag ru memerip peringak de kilek ru naigei ku jambor bicereg “haya”. “Was Lienai gei ajeh besipat sementare ru tok tetap itimpoh samak mong kateh timpoh numingguk, nugecek atao lebeh patik peksendok najjek ku was de pai,” kiyap mase bihubong ya Bernama.

Wan Ahmad Amir Zal jugak kiyap ha peteros sinui, pitak keral suku Bateq an naimuj lebeh nyak kateh serag ha naiceryak sumber serag rah awat, cog, damar, galug, sempog ru sumber serag kilek. Manakale pitak kerdor, lienai gei ru kekenon ku “haya” ru lienai jugak naiceryak sumber serag rah caknak ru herbe.

Kiyap nej, kerdor suku Bateq lebeh panei ha banse-banse herbe ku serag bebandig pitak keral. Ya ajeh, suku Bateq lebeh bikernal sebegei pakar bekenae herbe serag bebandig suku Temiar ru suku Mendriq ku Kelantan.

Begeiharokpen, Wan Ahmad Amir Zal kiyap hunen suku Bateq mulak sinui secare tetap ku kampug de bibeh ya kerajaan.

(Sumber: <https://www.bernama.com>)



Ektiviti

1. Bacak berite ku kemil ru kernal pasti engrok edjektip kateh bahan. Telas ajeh, beh ayat gunakan engrok edjektip ajeh ru betol joi kunteks.
2. Secare kumpolan, ceryak bahan ku Internet bekenae masarakat suku Orang Asli de kilek ru beh folio.



Pantag Larang Mai Sengoi

Semase ku serag

1. _____ /
2. _____ /
3. _____ /
4. _____ /

Semase peryos

1. _____ /
2. _____ /
3. _____ /
4. _____ /

Semase danan

1. _____ /
2. _____ /
3. _____ /
4. _____ /

Semase perenlai

1. _____ /
2. _____ /
3. _____ /
4. _____ /



Ektiviti

1. Bincang maklumat ku kemil secare kumpolan.
2. Beh ektiviti secare "Galeri Cecip".

UNIT 4

Budi Bahasa Asas Senejahtere Bangsak



Cerngai ru Belwal

Kempen Budi Bahasa



Ektiviti

1. Jijoi maklumat ku kemil, beh nanek lenakon secare spuntan ku kateh kelas.
2. Nyate cirik-cirik mai de bebudi bahasa. Beh kateh mentok peta pemikiran de engkek panei.
3. Hasel benincang engkek hodloh biperneng ku kateh kelas.

1.1.1
3.2.2



Adab Kenasantun Masarakat Malaysia

Antare adab masarakat Gop

- Belwal secare nada pelahat
- Tunduk berog bile cip nu ngar mai raknak
- Og salam ru jabat teg semase bejeramoh
- Tok hibeh renyah semase mai semayang
- Cak gunakan teg kentop
- Tok belwal semase cackak
- Semanj maap mase jis rayak antare ahli peringak

Antare adab masarakat Cerawas

- Ama gunakan cangkak jehuk ha cucuk cackak
- Mase cackak ama perhol senyog
- Kanang teg ama dek kemil mije mase cackak
- Ama log bajuk kaler belak mase rayak ru jekjeg
- Mai ya jekjeg hodloh og angpau nu mabek sayet
- Cak entoi samak-samak mase jis rayak
- Hurmat nu mai raknak

Antare adab masarakat Lel

- Semase cackak kena gei ru cak gunakan teg
- Senalo belwal pelahat ru amek apak
- Senalo jagak mai raknak
- Bukak selipa semase muj kuil
- Ama tas cengroi mase nyap
- Murah sengik
- Hurmat mai de lebeh engrak

Antare adab masarakat Sengoi

- Cackak ama angkit pingat
- Ama yur muh mai raknak
- Ama balij cackak
- Tok belwal lase ru mai kilek
- Ama gei ku kengleh deg
- Senalo tulog- menulog
- Bekungsi reski



1. Bacak maklumat ku kemil ru beh neulas.
2. Ru gunakan menudah Internet, kek cirik-cirik kenasantun adab masarakat Iban ru Kadazan.

Ektiviti



Menules

Engrok Pujangga Neindah Bahasa

“Engrok-engrok de lemah ru beradab kep
kiserlop sengik sengoi de cegeh”

-Hamka

(Ulama ru Ahli Falsafah Indonesia)



“Puncak ju ilasik adab mongloh mase hek kerakdik
ru cerngai nuurag de belwal ru hek ha nunanek de
hek panei ru bor sementare ilei tok kikuasak”

-Ibnu Khaldun

(Sarjana Islam)



“Peranan utame sengoi ialoh kibine kelakuk sengoi
dek jadik sengoi de beakhlak mulie jijoi peneator
serte taat ru haknuk nu pemerintah ru negara”

-Confucius

(Ahli Falsafah China)



“Adab kiog penateh nu sengoi, tapik sengoi
tiktok adab kiog jeoi senusah”

-Thiruvalluvar

(Ahli Falsafah India)



Ektiviti

1. Bacak ru paham engrok-engrok tokoh ku kemil ru bincang iceti.
2. Tules nanek kenarang betajok “Jelas langkah-langkah de hod bibeh ha mentok keperibadian de tepuji kateh dirik nunumom”.



Seni Engrok



AUDIO 4

Syaer Adab Mureb Nu Cikgu

Telei salei bidek ku pingat,
Mong nik kebek bibeh ha pengat,
Jadik mureb hodloh beingat,
Jaga adab, senalo bibesat.

Dayang istane kimuj mengadap,
Jenamuk bijamuk raja kisantap,
Raknok ru bengsat ama sentap,
Agok lei bimur tiktok beradab.

Kucig kisij kak ku tangok,
Jaag cerapeh bipej belunggok,
Guru bisanjong bilawan agok,
Dojeh kisesal begunak tiktok.

Kateh serag senapang biburu,
Senapang manah mong ipeluru,
Sumbong ru angkuh agok teburu,
Hod serngik rimdij neajar guru.

Amek Wak Mina isengoi latah,
Bicol iwog kibelwal ratah,
Tenanyak guru ama bemadah,
Senilap nyinyui an kianj padah.

Matlamat sinui hod mong tenuju,
Rajit beusahe biarloh becatu,
Amen hik hod bipateh ya guru,
Hurmat ru taat sebegei penandu.

Kak tengas jeoi iisik,
Bicak semiyak sambel kiserangik,
Darjat guru bisanjong lasik,
Senalo bikagom, bisat ku sengik.

Bui Cerawas bikoh nukerat,
Keer ceet pelek langsung,
Mulie ha guru lemu hik berkat,
Senalo hik doa cerngai ibengsat.



Ektiviti

1. Bacak syaer ku kemil ru gunakan intonasi de betol ru peterang iceti.
2. Bincang tema ru pesoalan kateh syaer ku kemil.



Tatamengwal



AUDIO 5

Budi Bahasa Budaya Hik

Amek apak ru kaom peringak
Sedarak de rek jiran tetangga
Saleng lihik hahok hik beserapak
Tenulus begneg secengreg umor

Para guru kawat sekulah
Turot kikaler ha sinui hik
Lemu biberkep kenenjip betamah
Begaul sehat peribadi cerie

Bangsak Malaysia behemah lasik
Ramah ru mesra bor ipekerti
Kek walah hi tulog kek nyanyak hilindong
Betimbang rasak hurmat- menghormati

Hik behidmat jujor ru ihlas
Hik curah bakti tok semanj bibalas
Henarap rakyat nanek amanah
Budi bahasa budaye lihik.



Ulang nar kalik

(Biubah suei ju laguk *Budi Bahasa Budaya Kita*)



Ektiviti

1. Kernal pasti engrok majmok ku kemil ru beh ayat.
2. Senarei 15 engrok majmok selaen de mong ku kemil.
3. Ulas nujap bares lirik laguk ku kemil.



Kenukoh



Neamal Budi Bahasa



Ektiviti

Beh nanek kenarang, begeharek care-care ha pupok neamal budi bahasa kateh kenalag masarakat?

UNIT 5

Bahasa ru Budaya



Cerngai ru Belwal



Lingua franca iceti bahasa penhubong antare masarakat de kekilek bahasa.

Bahasa Semai sebegi Bahasa Lemu

Bile nanek bahasa biangkit kateh duniak akademik ilei berupe nanek peneiktirap ru penehergak de lasik ha nunanek bangsak. Jijoi Profesor Madya Dr. Mohd Sharifudin bin Yusop de kikaji bahasa Orang Asli ku Malaysia seleneu 20 tahut bahawe Bahasa Semai berupe bahasa de bipetutor ya masarakat mai Semai ku Pahang ru Perak. Bahasa Semai jugak na kijadik *lingua franca* kateh kenalag rimdij mai sengoi ru biberajal ya kakitangan Jabatan Kemajuan Orang Asli (JAKOA).



Ilei de jugak penules bob *Sari Budaya dan Bahasa Suku Semai* ru Cikgu Alang Sabak kipendapat alaopen bebegi dialek de bebize bikayat ya paktor geograpi tapik nyiknyukloh kenerlag nu jap masarakat mai sengoi ha naipengham. Kateh ha atasi penebize adeh mai sengoi hodloh tebukak ru teros og senukong nu penekembang nu Bahasa Semai ku perinkat lasik.

Sebegi rakyat Malaysia hik sediak maklum bahawe Bahasa Melayu berupe bahasa kebangsaan. Namun henadir bahasa kilek kateh duniak penedidik niknyukloh iceti hitulak bahasa kebangsaan malah kitamah neunik ru pekayak nej duniak akademik. Hunen Bahasa Semai kijadik senalor ha perlei lemu penanei ku sekulah rendah ru sekulah menengah bile biangkit sebegi nanek mate pelajaran.



Senhubong ajeh, Dr. Mohd Sharifudin kicadang penetuboh

nanek jawatankuase penetinkat Bahasa Semai ha perkase engrok baku atao Bahasa Semai lasik dek kimentok identiti masarakat mai sengoi. Bahneh bahasa bemulak ru penerancang korpus bahasa kateh bidang neije, peneistilah, kosa engrok, tatamengwal ru laras bahasa. Usahe adeh kiog tarap akademik nu Bahasa Semai sebegi nanek mata pelajaran kateh kurikulum penedidik. Hunen bob teks tenerbit Bahasa Semai na biterbit bemulak tahut 2014. Bob adeh na kilenkap penerlu pembelajaran ru pengajaran Bahasa Semai ju tingkatan 1 lei tingkatan 5. Peneterbit bebegi bahan benacak ru bob-bob akademik kateh Bahasa Semai hodloh bipeluas nej.



Bebegi usahe nej de hodloh biui ha memertabat Bahasa Semai adeh. Usahe adeh nyiknyukloh usahe nanek pehak tapik kilibat rimdij masarakat. Bei hik besamak-samak semarak semangat haknuk Bahasa Semai ru de tok bilip ya jaman.



Ektiviti

1. Jijoi nepetek ku kemil, og penandang engkek secara spuntan begeriharok ha Begeiharok ha memertabat Bahasa Semai?
2. Kernal pasti isik-isik penteng ha penandang engkek secare betules kateh bob tules.



Bengkel Pembakuan Silibus Seni Tari Mai Sengoi Perak



11 Mac – Jabatan Kebudayaan dan Kesenian Negeri Perak (JKKNP) ru kerjaksamak Persatuan Kesenian Orang Asal Perak (PKKOAP) na kiui Bengkel Pembakuan Silibus Seni Tari Mai Sengoi Perak. Program adeh biui seleneu nar jis ku tareh 2 lei 3 Februari betempat ku Sahom Valley, Kampar, Perak. Bengkel adeh jugak turot birasmi ya Pengarah Jabatan Kebudayaan dan Kesenian Negeri Perak.

Bengkel adeh biserte ya jurulatah seni tari Encik Sumaizi bin Ari ru Encik Mohd Shahril bin Akla ru penari JKKNP. PKKOAP nej biwakel ju kumpulan Tew Seng Seng ru Renawij Menaleh. Bengkel adeh berupe pemulak ha ujud modul silibus seni tari secare tesusut.

Objektip utame bengkel adeh biui mongloh ha kirekod penandu tenari ha bijadik renujuk utame ya pehak de telibat ru tenari. Renujok adeh kateh mentok betules ru bideo de buleh kijadik medie penteng ha pekembang nej seni budaya mai sengoi.

Jijoi Pengarah JKKNP, “Jik kenjip betuah ru bangga kep jalen kerjaksamak de bementok kebudayaan. Peluang de julong kalik biui adeh hodloh bigunak sebor mungkin. Pembakuan silibus seni tari adeh kipekayak nej seni tari de sediak mong. Bile bipehati nujap masarakat ku Malaysia budaya an beubah seireng ru mase. Eng pecayak ru mong sumber primer adeh an kijadik renujuk ya belok-belok pehak ku mase nungar teutame ju pegiat seni ru penyelidik.”

Bah Sa berupe nuurag jawatankuase PKKOAP kibual seni tari berupe nanek neunik mai sengoi de hod bipetahan. Ilei jugak bepenandang bahawe hunen kenon-kenon nyennyam pek naiminat ha petahan kebudayaan masarakat. “Masalah adeh tok belakuk ku sengoi taleh tapik rimdij bangsak naihadapi masalah samak. Jadik adeh tanggungjawab hik sebegei jenerasi beumor ha hibudaye, hididek ru hisebar nej budaye hik ku iserate tempat. Eng jugak ha ucap abor hanuk ku JKKNP mende naihod terimak hasrat jik. Jik beharap usaha adeh tok dij ku padeh tapi beneteros nu mase pigoidoh,” kitamah nej.

Mai sengoi kayak ru bebegei adat ru budaye. Namun jeoi pekare de nyep bicak mase ru walah usaha ha rekod. Adeh mongloh nanek renugik ru tok buleh biulang nej. PKKOAP jugak kiseru kenon-kenon nyennyam teros naitules ru rekod budaye setempat samak mong kateh bob, laman sesawang, blog ataopen medie sosial. Bahan-bahan adeh an kijadik behergak nanek jis doh.



1. Bacak nepetek nu kemil ru beh renumos jijoi neutame.
 2. Jijoi pendapat engkek, ma belakuk amen mai engrak tok naigalak
- Ektiviti** etktiviti kebudayaan katehkenalag masarakat.



Menules

Pruses ui Belau



Ektiviti

1. Cerlah gambar ku kemil kateh mentok neulas.
2. Cerlah ayat ru gunak rangkei kate kateh mentok peta pemikiran.




Seni Engrok



AUDIO 6

Bahasa Jiwak Bangsak



Gunakloh bahasa kebangsaan lihik
Beiloh hik amal hik jengoi-jengoi
Bahasa kicatu rimdij lihik
Yakinloh bahasa jiwak bangsak

Beiloh bei rakyat rimdij
Bukti taat setia ru nanek bahasa
Majuk bangsak ru maju negara
Megahloh bahasa hik
Bahasa jiwak bangsak

Majuk bangsak ru maju negara
Megahloh bahasa hik
Bahasa jiwak bangsak.

(Biubah suei ju laguk *Bahasa Jiwa Bangsa*)




Ektiviti

1. Terang iceti laguk ku kemil.
2. Tules nanek dailog ha pegalak penegunak bahasa kebangsaan kateh bebegei jenim.



Sepilih



Orang Asli Jahut naigei ku daerah Temerloh ru Jerantut ku lengrik Pahang. Kampug Penderas berupe kampung Orang Asli Jahut terentoi bebanding kampug-kampug Jahut de kilek. Care per lai mai masarakat Jahut had unik bebandeng kaom sengoi kilek mende naigunak Sepilih.

Sepilih atao sakat buang berupe nanek neuker jehuk de bigunak ya masarakat Jahut

ha perlai mai nyaknyik. Neukir de biui mongloh kateh mentok menatang macot ataopen mentok sengoi. Sepilih senalo biui ju jehuk merbau atao rengas.

Sepilih biasak bijol ku balei. Mai halak kigei ku kerop balei. Ilei kicereg ruwai de kirasuk mai nyaknyik dek kijeg nu Sepilih. Timpoh perenglai adeh mongloh seleneu nar kelem. Sepilih an bipej nu batagari telas dij timpoh bepantag.



Ektiviti

1. Kernal pasti ayat de mong engrok neimboh ku kemil ru beh 10 ayat.
2. Jijoi penecayak engkek, begehharok care perenglai secare tradisonal ku kampug engkek.



Kenukoh

Tejemah Laguk

Berteh nu Sungai Pahang

Berteh nu Sungai Pahang
Singgah bukbet nu Pasir Tambang
Was sejarah pahlawan tebilang
Mara Tok Gajah nu medan perag

Berteh nu Sungai Pahang
Loiloh nej nu Pulau Tawar
Was biperyos pahlawan Mat Kilau
Makam Diraja biabadi ku pajeh

Berteh nu Sungai Pahang
Agok sip nu Kuala Semantan
Lubuk Terua kateh neingat
Besimpang siur tarog pahlawan

Berteh nu Sungai Pahang
Kampung Chenor kigiwej mesre
Lagenda Pahlawan Bukit Segumpal
Tesemei ibukti ku Inderapura

Berteh nu Sungai Pahang
Kengwilloh kentop kemik menawan
Lei nu Chini tasek misteri
Tebeg riwayat cerite rakyat

Berteh nu Sungai Pahang
Singgah nu Pekan Bandar Diraja
Agok sip Pulau Tioman
Negeri Pahang tebeg penejuang.

(Biubah suei ju laguk *Menghilir Sungai Pahang*)

Sejahtera Malaysia

Puji dan syukur pada Ilahi
Anugerahnya tiada terhingga
Kedamaian kemakmuran
Malaysiaku bahagia
Dengan tekad untuk berjaya
Berbakti pada nusa dan bangsa
Kami junjung cita-cita luhur
Perpaduan seluruh negeri

Seia sekata sehati sejiwa
Menghadapi cabaran
Kami sedia kami setia
Berkorban untuk negara
Bersemarak Malaysia tercinta
Kibarkan panji kebesarannya
Kami rela menjaga namamu
Sejahtera Malaysia.



Ektiviti

1. Tejemah lirik laguk patriotik ku kemil:
 - a) Engrok Semai nu bahasa Melayu.
 - b) Bahasa Melayu nu engrok Semai.

UNIT 6

Kazanah Alam ku Bumi Betuah



Cerngai ru Belwal

Kernal ru Pelek Serag



Pelek larah



Pelek cupu



Pelek kasai



Pelek setel



Pelek bajeh



Pelek likuj



Pelek jentik-jentik



Ektiviti

1. Kateh kumpolan, bincang bekenat pelek-pelek ku kemil ju segik ijehuk ru ikenjip. Telas ajeh hubongkaet samakmong pelek-pelek serag adeh an tejejas atao tok ku mase nungar.
2. Amen engkek berupe pegawei pertanian, beh ayat eknej kaha semanj mai kampug ha naicet pelek-pelek serag adeh.



Sambung Nyawak Herbe Behasiat

◆ *Cirik-cirik jehuk*

Isais sederhane entoi, buleh kicuai lei 4 meter ilasik amen tok bicerei ibatag. Ijehuk ru iselak bekaler belaar. Iselak sederhane entoi, bementok bujur cereg, mol iselak tajap ru tebal.

◆ *Was kicuai*

Jehuk adeh senang kicuai ku belok pen. Senalo bicet ku was kampug atao ku taman sebegei cetnet henias atao neulap. Ulap adeh tok bijual ku pasar.

◆ *Care bicak*

Ipucuk nyennyam bicak berei ru sambal belacat, cencalok atao budu semase cak canak. Iselak biceret macot buleh bipermuj kateh menasak rah canak ulap.

◆ *Kenandong*

Kikandong teu, karbohidrat, serat, kalsium, kalium, zink, zat besi, fosforus, alkolid, tanin ru vitamin.

◆ *Hasiat*

Kep kirawat diabetes, genggit, lodkit, kolesterol, darah tinggi, sinusitis, tumor, ru gastrik. Selaen ajeh, ihasiat mampuk kiog dil awet muda ru antioksidan.

◆ *Ikenjip*

Ikenjip lemak-lemak ceet ru rangop.

◆ *Bengsat*

Ulap adeh tok buleh bicak bebirel jeoi mende buleh hikenjip hagu kakek. Bok de mong nyaknyik darah rendah tok bigalak ha cak ulap adeh.

(Sumber: Siti Fuziah Yusof, *Ulaman di Sekeliling Anda*, 2012)



1. Bacak ru olah maklumat penteng ku kemil kateh mentok peta minda de sesuei ru kretip.

Ektiviti

2. Secare bergu, beh ayat gunakan laras engrok de sesuei kaha pegalak mai jengoi ha cak ulap sebegei neamal.

Menules

Resipi Sambal Kalak

Ibahan

- 4 kuntup bungak kalak
- 100 gram kak milis
- 1 sudu teh empoj
- 1/2 sudu teh gulak
- 1 kepig asap sengruk
- 100 gram ladak macot ceher
- 1 kebek bawang entoi
- 3 kebek bawang biyeg

Care-care ha beh:

1. Bungak kalak biceret macot
2. Kak milis bigureng garing.
3. Gunak senem gureng kak bilis ha tumis bahan biseh.
4. Tamah asap sengruk ru empoj kateh bahan tumis ru bercet lei huj isenem.
5. Permuju bungak kalak, gulak ru tamah teu.
6. Bercet nej lei sot iteu.
7. Telas siap permuj kak milis gureng ru cukeh.
8. Siap boleh bicak ru canak beket.



Kalak iceti kantat



Ektiviti

1. Secare beregu pileh nanek sambal de engkek panei ru bincang iresipi. Tules hasel penebincang resipi ajeh kateh bob.
2. Bandeng benize sambal bungak kalak adeh ru sambal de engkek panei. Bentang kateh kelas gunak prasa ru bebegei banse ayat.



Seni Engrok



AUDIO 7

Kazanah Alam Milik Hik

Sajak Kazanah Tok Tenilei

Bumi adeh
 cenipte ya Nyenang
 sempurne, Indah, bor ru belaar
 ku kemil cenan, ku tik, ku teu ru ku laot
 depnap alam
 cenipte de hebat
 adeh nanek amanah ha hik
 adeh nanek anugerah ha hik.

Berajal besukor mai sengoi
 ku padeh hik ha kep belehem
 berajal besukor mai sengoi
 ku padeh hik ha kep nengneng bor de alam
 de tebek kazanah hebat
 de tebek senegar.

Bei hik sepakat
 hik jagak alam adeh
 hik petahan lei hik dat
 hik pewares ha kenon cenok
 amen mong teg-teg de rakus
 ha cubak musnah
 agok hik biar
 agok hik abai
 lawan teros lawan.

Ingatloh
 tiktok tik, tiktok sinui
 petahan lei ku mol nyawak
 mende adeh kazanah tok tenilei.

Gurindam Duniak Nanek Amanah

Amen duniak tok hijagak
 Adehloh sipat de senagak.

Amen alam hik gunak ru bor
 Pasti sinui hik sarat ibernor.

Amen hik cerngai bengsat mai raknak
 Pasti bumik hik kekal tejagak.

Amen hasel serag bikot beagak
 Lei bejaman kekal higinak.

Amen bipatoh neajar ya Nyenang
 Sinui ku duniak pasti an senang.

Amen alam senalo bihurmat
 Secengreg jaman sinui biberkat.

Amen genmar alam bipunah
 Ajehloh tandak tiktok amanah.

Amen hik anggap duniak kazanah
 Pasti tok an belakuk menusnah.



Depnap iceti hilai
Senagak iceti selnel



Ektiviti

1. Deklamasi ru bacak bahan ku kemil gunak nada ru intonasi de betol.
2. Secare kumpolan, beh analisis unsur sastera de mong kateh bahan ku kemil. Telas ajeh beh ektiviti krusi beket.



Neulap Kerileng Hik



Cekur

Jeoi ihasiat ru had popular nu amek-amek de pai naiperyos ha kiperhol pinui kateh berog, kiog kederat ru kipekuat berog. Selaen ajeh, cekur jugak bicak ha kirawat kenghol, pehod rungkok ru nyaknyik. Cekur mong bahan de betindak sebagei antibakteria, antifungus ru antiradang. Amen senalo bicak ulap adeh kep kicegah pehot jeag ru awet muda. Ikenjip pejet-pejet.



Kerdas

Amen hik cak ulap adeh ha kep perhuj selere cakkak, kirawat darah tinggi, diabetes ru serempit. Buleh jugak bicak ha suj ket, ha awet muda ru antioksidan. Ikenjip lemak-lemak ceet ru bergoi lekhep.



Mengkudu

Bor bicak mase tiktok selere cakkak. Ulap adeh kep kirawat pehod kui, cawam, renawat amek-amek telas peryos, genggit, lodkit ru menghany. Sesuei jugak bicak ha antioksidan. Ikenjip gek kedej-kedej ru keer-keer.



Putat

Ulap adeh sesuei ha kicegah luwig, darah tinggi, ha berseh behip, kipelahat pruses jadik engrak. Buleh kiperkuat berog amek-amek telas kiperyos. Ikenjip lemak-lemak ru ceet-ceet.



Selasih

Bor bicak ha kirawat genggit, selei-selei berog, tiktok selere cakkak, pehod jeag, radang usus, batuk karang ru nyaknyik. Bor jugak bicak ha kep dil awet muda ru antioksidan. Ikenjip ceet-ceet ru gek-gek pejet.



Ektiviti

1. Bacak ru kernal pasti engrok gande kateh maklumat ku kemil. Gunak engrok gande ajeh ha beh ayat de lenkap.
2. Beh kenarang lenkap ru susut isik-isik penteng jijoi maklumat ku kemil ru gunak tandak bacak de betol.



Kenukoh

Kempen Jok
Cakcak Neulap

Kep perwil
ju nyaknyik

Dil awet muda

Kep perhol toksik
kateh berog

Perhuj sistem imun
berog

Og selere cakcak



Jijoi maklumat ku kemil, beh poster bekenaeet kempen cakcak neulap. Engkek hodloh susut nej prasa ru rangkei kate de sesuei jijoi bahan de biog.

Ektiviti

UNIT 7

Senubai



Cerngai ru Belwal

Senubai Mai Kampug



Luhew



Berpag



Bernyeng



Bercag



Ektiviti

1. Jijoi gambar ku kemil belwal ru cikgu ha resipi de sesuei menasak senubai.
2. Pileh nanek senubai ru tules nanek resipi. Bacak ru beh lenakon cara menasak secare spuntan kateh kelas jijoi resipi de bitules.



Senubai Temahal Ku Duniak



Pucuk Hop

kamerek RM4,000.00 sekilogram

Senubai adeh had bigunak ya sebahagian masarakat duniak teutame ku Eropah tenuju penetapai. Senubai adeh ikenjip ceet gek. Senubai adeh mahal mende ipruses penetuai had terik. Semase pruses ajeh, hik hod pileh ru teg ru had terik ha kek ipucuk mende tok kicuai tentuk. Ku sampeng ajeh ipucuk had macot lei hod hik pileh beratos-ratos canuk peksendok ha permuj kateh beg. Pucuk Hop adeh terik ikerjak tapik kiog hasel de lumayan.



Ubi kentang La Bonnote

kamerek RM3,000.00 sekilogram

Kentang adeh bipercayak mahal mende jarang bibake ru had bicet ku nanek pulau ku rual pantei barat Perancis iaajeh Noirmoutier. Nutahut had 100 tan ihasel taleh. Nujap nukebek ubi kentang hod bitoj ru teg. Hamaka pruses penetuai kikit mase de cereg. Rimdij kentang bibajak ru teg gunakan alga ru rumpei laot. Ubi kentang adeh had bijamuk ku restoran-restoran eksklusif ku Perancis.



Bayam Yamashita

kamerek RM200.00 sekilogram

Bayam yamashita bicet ya Asafumi Yamashita de beasal ju Tokyo. Bayam Yamashita bicet ku Perancis ru bijual ru regak de had mahal. Bayam Yamashita kikit mase betahut-tahut ru jenagak de sempurne. Bayam Yamashita boleh bianggap senubai tepileh mende had bijual nu tujoh pelanggan taleh iaajeh tukang masak de mong perloi Michelin.



Reis Wasabi

kamerek RM700.00 sekilogram

Amen engkek et restoran sushi mewah, engkek kenak bayar mahal. Ya tentukloh regak kak atao caknak laot de mahal tapik iregak kijadik betamah mahal mende wasabi de bijamuk ialoh wasabi segar ru enyuk de kek bipruses. Wasabi biurok mahal mende tok jeoi selai wasabi ujud ku duniak. Amen engkek hod wasabi segar, hod berkep ku Jepun atao berkep ju selai ku Eropah.



Ektiviti

1. Bacak maklumat ku kemil adeh ru beh kateh mentok neulas.
2. Bincang kateh kumpolan ru og pendapat engkek care-care ha tarek minat mai nyennyam ha cebori kateh bidang penetani ru kijadik sebegei sumber berengkep.



Ibernor Cak Senubai



1. Jijoi maklumat ku kemil, bincang isik-isik penteng bekenaget ibernor cak senubai ru beh kenarang.

Ektiviti

2. Kek ayat topik kateh kenarang ru beh ayat henurei.



Peteri Selak Gag

Ku kampung Lanjut Manis mongloh nuperingak naigei ru empat urag kenon. Ikenon de iluj imuh Bah Ujang. Ilei tok kigenmar tulog mai ru segat hamaka biperdeks imuh Bah Ujang Segat.

Mong nanek jis ubai iamek apak ru memenang naiet nu bendang. Ku padeg had mong Bah Ujang kihalei.

Bile cuag iked, ilei mulak kikakek ha caknak. Ilei kiet nu bendang kaha semanj caknak nu iamek.

“Mek ... mek ... og eng telei nukebek,” semanj Bah Ujang nu iamek.

“Et semanj nu apak hek,” balas iamek.

“Pak ... pak ... og eng telei nukebek,” semanj Bah Ujang nu iapak nej.

“Semanjloh nu amek hek,” kaleh iapak nej.

Bah Ujang kibelal mende kipanei mabek itenek dij naikep telei tapik ilei kihalei tok biog. Bah Ujang kiet nu beg bendang. Ilei kineng selak gag de kicuai kennem ru er. Ilei kihuj ku kemil salah nanek selak gag de paleng entoi ru kiseru.

“Anj eng selak gag, amek ru apak eng tok naihoek eng,” seru Bah Ujang nu selak gag. Ilei tok kipanei selak gag ajeh mong ruwai.

Haj, selak gag ajeh kihieg kianj Bah Ujang nu suwig. Bah Ujang kibelaguk lei pek kisedar ilei ya bianj heg ya selak gag lei nu rahuk. Bah Ujang kiloi nu nanek was de bor bicereg lengrik mai tepas. Bile ilei kiloi teros bisambot ya peteri rajak ru bianj mengadap rajak. Ilei bilayan begei kenon rajak.

“Hek an ngperjeg ru peteri beta tapik ru sarat hek hodloh gunak jeag empat kerat,” titah rajak. Ku kateh bilek jenuh Bah Ujang kiserangik mai ceti engrok rajak.

“Hek hodloh kerjak ku selai rajak. Hek cetloh senubai ru pelek. Amen ya mong ihasel ceknet perneng nu rajak,” urok Peteri Selak Gag.

Bah Ujang jenoh jugak kiserangik mende selame adeh ilei serlei ru tok genmar tulog mai tapik ku isengik kaha jeg peteri rajak. Telas kiserangik leu, ilei pen kisetuju kerakjak ku selai rajak. Bah Ujang kicet jeoi senubai ru pelek.

Telas nugecek, ceknet Bah Ujang kisui er. Senubai had kennem ru iceknet pelek had ilembat. Bah Ujang pen kianj ihasel ceknet kiperneng nu rajak.

“Ha ... ha ... ha ... adehloh mengsauh de nghod. Hunen hek buleh hek jeg peteri beta, anj jug nu lengrik lihek,” titah rajak.

Pek sempat Bah Ujang kaha ucap abor haknuk rajak ya gaib. Haj, Bah Ujang ya mong kijinjeg ku ngar pintuk. Tuan peteri selak gag pen mong ru ilei. Hasel senubai ru pelek bebakul-bakul mong rek ru ubai.

Rimnar iamek ru iapak had baikeramik baineng Bah Ujang ya kijug. Betamah naikeramik nej Bah Ujang kianj kenah de kemek ru hasel ceknet de jeoi. Ju kenjeh Bah Ujang tok kiségat nej. Enai nu peringak naisui aman ru bahagie.



Ektiviti

1. Jijoi nepetek ku kemil, pileh nanek babak ru beh lenakon.
2. Kek ceti tesurat ru tesirat kateh cerite ku kemil.



Tatamengwal

Betei Cener



Betei cener tegulong kateh peringak *Schizophylaceae* mong bebegi spes. Ilei berupe nubanse betei de buleh bicak ru jeoi bijual ju pasar tani. Ku Malaysia betei cener kicuai ku dendog kening ceber berupe banse paleng tekenal bikutep dek bijadik bahan caknak de had sedap. Beter cener bikernal mende itekstur de liat ru bibercet kateh bebegi menasak.

Betei cener kicuai rah ombak batu karang de rapat. Isag bebize ju kaler pehog bekrim atao biyeg set. Bahgian kemil macot, ilebar 1– 4.5 sentimeter ru tekstur berog de tebal tapik selun rah span. Betei cener adeh buleh bibake ku Myanmar, Thailand, Malaysia, Indonesia, Madagascar, Nigeria ru Timor Laot India. Betei cener bibake ku serag kateh jehuk-jehuk de karok telas jis manik kijoi ru jis beket. Kayat betei cener adeh kicuai secare semulak jadik. Beter cener bipeccayak mong inilei perenglai de lasik ha ektiviti imunomodulator, antikulat de lebeh lasik ku sebatian karbohidrat glucan de kilek.



1. Kernal pasti senalah engrok sendi muh kateh nepetek ru salit nej ayat-ayat de bipebetol kateh bob.

Ektiviti 2. Kek maklumat bekenae betei de kilek ru gunak renujuk Internet.



Kenukoh

Perie Katak



Perie katak atao imuh saintifik *Momordica Charantia*, nubanse senubai kedej ikenjip tapik biurok mong seribu nanek hasiat nu senihat sengoi. Buleh hek peterang nu eng, ma ihasiat perie katak adeh nu senihat hik?

Perie katak adeh mimang jeoi ihasiat, iantare ialoh buleh kijadik penawar diabetes. Penyelidik enai urok perie katak adeh kiog dil hipoglisemik ru kibetindak kipeceleh paras gulak kateh behip. Selaen ajuh ...



Ru gunak menudah Internet ku sekulah, kek maklumat tenamah bekenaeet hasiat perie katak nu senihat sengoi.

Ektiviti

UNIT 8

Berkus Negara



Cerngai ru Belwal

Muzium Negara



1. Muzium Negara biui tahut?

2. Bok arkitek de kirike mentok Muzium Negara?


3. Memerip muzium mong ku Malaysia?

4. Senarei muh muzium ku Malaysia.



Ektiviti

1. Cerngai audio ru og peniker bekenaeet Muzium Negara ru jawab senual ku kemil.
2. Jijoi peniker engkek, ma penenteng muzium ku negara?





Lebuh Raya tol Petame ku Malaysia



Lengrik Perak tekenal sebegei lengrik petame kikep teknolujru menudah ku negara adeh ju jaman pemerintahan British leiloh merdeka. Hal adeh tok tekecuali ru penebne lebu raye bertol petame ku Malaysia.

Lebu raye adeh kihubong bandar Slim River lei Tanjong Malim na bibukak ku gecek Mac 1964. Nong nar ala secereg 24 kilometer adeh bipermuh Lebuh Raya Slim River - Tanjong Malim. Lebu raye

adeh sebegei nong altenatip Jalan Slim Village. Nong de bekuna inyaknak 33 kilometer kihubong nar-nar pekan ajeh.

Lebuh Raya Slim River - Tanjong Malim adeh teletak ku jenajar Federal Route 1. Jenajar adeh berupe jalan persekutuan petame kihubong Johor Bahru lei Perlis ru siap bibeh ku tahut 1909.

Sistem tol petame adeh bikenak cas RM1.00 ha kerite, RM2.00 ha tenenbot nyeh begei luri ru bas. RM0.50 ha mutu peksendok bahneh Projek Lebuh Raya Utara - Selatan (PLUS).

Iawal bahneh, kerajaan kikernak tol ha rimnar ala nong. Telas memerip kenaji, kerajaan kikenak tol ha nanek nong ala taleh iaajeh ju Slim River nu Tanjong Malim.

Lebuh Raya Utara - Selatan de mulak bibeh ku tahut 1988 ru siap ku awal tahut 1994. Telas siap lebu raye pai adeh, kerajaan kikot penutos ha mansoh kenutip tol ku Lebuh Raya Slim River - Tanjong Malim ku gecek April 1994 ru istatus nong adeh bitukar nu jalan persekutuan. Was plaza tol adeh hunen kijadik was Rehat ru Rawat (RnR) Slim River ru ibangunan kijadik sebegei stor Jabatan Kerja Raya.



Ektiviti

1. Bacak bahan ku kemil ru paham secare pintan.
2. Jawab senual penengham ku kerop adeh:
 - (i) Bile tareh Lebuh Raya Slim River - Tanjong Malim bibeh?
 - (ii) Yama Lebuh Raya Slim River - Tanjong Malim bibeh?
 - (ii) Jijoi pendapat engkek, ma penenteng penebne lebu raye de mong ku Malaysia?



Menules

Hertak Awam ru Tanggongjawab Masarakat



Ipemulak:

- a) Iceti hertak awam – hertak de bisediak ya kerajaan ha menudah rakyat
– berupe hak milik besamak ru tok buleh pindah milik
- b) Sebegei rakyat hik hodlah pasti hertak awam hik jagak ru tok hik perusak

Isik-isik:

Penenteng hertak awam ku masarakat:

- a) Kipemudah neuros rakyat – was ibadat, sekulah, tandas ru kekilek
- b) Kiperapat henubong masarakat – taman mennan, dewan awam, padag ru kekilek

Langkah-langkah jagak hertak awam:

- a) Dided ya apak amek – lateh kekenon jagak hertak bende awam
- b) Peranan sekulah – bemulak ru pekare asas. Jagak hertak bende ku sekulah
begei krusi ru mije
- c) Peranan medie massa – pengaruh de entoi kateh masarakat
– kitimul kenjip betanggongjawab
- d) Kuat kuasak undang-undang – kernak tenindak undang-undang amen vandalisme belakuk

Iserengkol:

- Nujap masarakat hodloh paham an peranan ru tok naiperusak hertak bende awam
- Nujap lenapes masarakat jugak hodloh bisemei kenenjip tanggongjawab ru senedar penenteng menudah awam



1. Kateh kumpolan ui penebincang henurei "Hertak Awam ru Tanggongjawab Masarakat". Telas ajeh bentang kateh kelas.

Ektiviti 2. Tules kenarang de lenkap.



Penebangun ha Bok?

Ku padeh eng ha becerite
negara eng de rual biasak
jeoi bangunan kicapei rahuk
tok begei jaman penjajah.

Ku padeh eng ha becerite
penebangun hunen rual biasak
jeoi penebangun de setarap duniak maju
hik boleh bebanggak.

Ku padeh eng ha becerite
penebangun adeh tok tibak pecume
tapik adeh wenares mai manah
tapik adeh kazanah ha cenok molsog.

Ku padeh eng ha becerite
agokloh hik pedajal kederat pemimpen manah
agokloh hik perneng henajap jiwak
mende tik adeh milik hik.



Ektiviti

1. Deklamasi sajak ku kemil.
2. Telas ajeh, peterang ceti tesurat ru tesirat sajak ku kemil.
3. Jijoi maklumat sajak ku kemil cipte nanek sajak de beceti.



Tatamengwal

Balai Seni Visual Negara (BSVN)

Entem bikernal sebegei Balai Seni Lukis Negara (BSLN) bituboh ku 28 Ogos 1958 iaajah telas Malaysia kicapei kemerdekaan negara. Idie penetuboh na bikemuke ya Majlis Kesenian Persekutuan ju tahut 1954 de binaung ya Mubin Sheppard ru Frank Sullivan.

BSVN adeh berupe badan bekanun ku kerop nanek kementerian kateh kerajaan persekutuan. Turot naikep senumbang ju badan korperat ru penaje kilek amen naiui ektiviti seni senampeng.

Neujud BSVN kep promosi senedar ru apresiasi seni nu rimdij perinkat masarakat. Objektip utame balei adeh mongloh ha beh penamer ju kateh ru rual negara, ui seminar, bengkel, penetanding ru ektiviti seni kilek. Selaen ajeh, BSVN naibeusahe ha pekembang koleksi tetap de hunen kirangkom lebeh 2500 karya.

Bangunan BSVN mong tujuh kebek galeri, nanek bengkel ru gudang kreatip. Selaen ajeh, balei adeh jugak kisediak pusat sumber, auditorium de buleh kimuat 144 tempat giknei ru pejabat pentadbir.

Bangunan adeh bibeh ru kos RM40 juta ru ilengwas bangunan 15 ribu kaki persegi. Rike mentok unik de kigabong elemen prinsip tradisional ru moden. Kerangke bementok 'A' de bekerileng pelog bejubin ru renuang de mampuk kiog perneng bebegei sudut. Renike adeh mongloh hasel idie Dato' Mir Shariman Mir Sharuddin de kimenang penetanding merike mentok bangunan BSVN.


Ektiviti

1. Bacak nepetek ku kemil ru kernal pasti engrok tenerbit. Telas ajeh cadang 10 engrok dasar ru ui ayat de mong engrok tenerbit.
2. Bacak ayat de kiui kateh kelas.



Kenukoh

Latar Kenog Putrajaya



Kateh kumpolan macot, beh kenaji bekenat
Putrajaya kateh mentok bob skrap.

Ektiviti

**UNIT
9**

Menatag Ces Tanggongjawab Besamak



Cerngai ru Belwal

Cep Kuak Gu Teancam

Cep kuak atao imuh saintipik *Nycticorax Nycticorax* ialoh spesies cep teu de mong ku Malaysia. Cep kuak jeoi ku was serag payak bakau ku pantei bepajak teutame ku lengrik Perak, Kedah, Selangor, Melaka ru Johor. Cep ibek isentol bekaler belaek ru bejambul. Cep ikenan nej isentol bekaler belaek ru coklat serte tok bejambul. Cep adeh genmar sui kateh kumpolan entoi lei memerip ribuk ikor. Cep adeh jugak genmar naibeh ensop ku was jehuk api-api ku was tebig pantei. Mong jugak cep kuak de naibeh ensop ku jehuk teberau atao jehuk perupok. Koloni cep kuak de jeoi boleh hik neng ku was penelindung cep ku Kuala Gula, Tanjung Piandang, Pulau Kalumpang ru Pulau Burung ku Perak. Cep kuak ialoh spesies cep ces de bilindung ku kerop Akta Pemuliharaan Hidupan Liar Bilangan 716 Tahun 2010. Koloni cep adeh hunen gu pupos.

Neancam Utame Cep Kuak

Nyep ihabitat	Henakis Pantei	Penecemar
<ul style="list-style-type: none"> ☞ Sais serag bakau atao jehuk api-api gu macot mende sengoi naigik jehuk adeh ha tenuju penebangun. ☞ Penetambak pantei jugak na kijejas habitat asal cep kuak. 	<ul style="list-style-type: none"> ☞ Adeh kikayat pantei bepajak gu macot ru nyep sumber caknak spesies adeh. ☞ Henakis pantei jugak kikayat giknei spesies adeh musnah. 	<ul style="list-style-type: none"> ☞ Was pantei de gu tecemar mende kelakuk sengoi. ☞ Penegunak racut serangge secare belebeh ku was bak jugak kikayat sumber caknak rah makin kak nyep. Adeh punce populasi cep kuak gu gek.



Ektiviti

1. Bacak maklumat ku kemil. Bincang kateh kumpolan ru hurei idie-idie kateh maklumat ru beh serengkol.
2. Og komen engkek bekenaet punce-punce menatag ces gu pupos.

1.3.3
3.1.2



Jabatan Perhilitan

Berupe penetuboh kerajaan de betanggungjawab kijagak, kiuros ru kipelihare hidupan ces ru Taman Negara ku Semenanjung Malaysia.

Latar Kenog

Jabatan Perhilitan peksendok adeh bikernal sebegei Jabatan Mergastua. Ku tahun 1955, nanek perundangan pai, *The Wild Animals and Wild Birds Protection Ordinance* na biujud ha kilaras penguatkuasaan ha penelindung hidupan ces ku rimdij Semenanjung Malaysia. Ku tahun 1972 ru 1976, Kerajaan Persekutuan na kikit aleh penetadbir rimdij Jabatan Mergastua lengrik ku Semenanjung Malaysia jijoi penguatkuasaan Akta Perlindungan Hidupan Liar Tahun 1972, Akta 76. Telas ajeh, Jabatan Mergastua biog muh sebegei Jabatan Perlindungan Hidupan Liar dan Taman Negara atao Jabatan Perhilitan.



Objektip

- ☞ Ha pekase progem konservasi hidupan ces jijoi ektiviti peneuros penguatkuasaan, penekayak ru peneselidik hidupan ces.
- ☞ Pekekal integriti was penelindung ha paedah peneselidik, penedidek, ekonomi, estetik, rekreasi ru pungsi ekologi.
- ☞ Perhuj penanei, senedar, penebangun modal insan ru penelibat masarakat nu ala konservasi hidupan ces.
- ☞ Penejane ekonomi jijoi ektiviti konservasi hidupan ces.
- ☞ Pekase penepakar, penekungsi maklumat ru penegunak teknolujji kateh konservasi hidupan ces.

(Sumber: Jabatan PERHILITAN)



1. Bacak maklumat ku kemil ru senarei isik-isik penteng kateh mentok jadual de sesuei.

Ektiviti 2. Jijoi pendapat engkek, mong ka Jabatan Perhilitan bejaye naiog penelindung nu hidupan ces ku Malaysia?

3. Begeiharok masarakat naikep bantuk pelihare hidupan ces ku negara adeh? Og pendapat engkek?



Menules



Pusat Konservasi Hidupan Ces

Pusat Konservasi Hidupan Liar ku Sungkai Perak na bituboh ku tahun 1971. Ku padeh bilaksane program pennebiak secara ex-situ iaajeh pennebiak ku rual habitat asal rah spesies rusak, seladang, cep kuang, cep yag ru cep mata merah. Pusat adeh teletak 15 kilometer ju pekan Sungkai. Amen bepeluang cip lenawat ku padeh pasti kep kenenjip sernuk mende hik kep neng hidupan ces de hajap hiburu peksendok adeh. Pusat adeh bibine ha perwel penepupos menatag-menatag adeh mende serag bimusnah ru ektiviti pemburu haram. Kateh pusat adeh menatag-menatag ajeh bipekenan ru bipulihare peksendok biterlas nej ku serag. Pusat adeh bituboh jugak betenujuk dek jenerasi de pai lekat lienai kep naineng menatag-menatag ces adeh ru tok an pupos mende sikap mai sengoi.

Waktu Lenawat

Isnin lei Khamis - 2:00 lei 4:00 dui
Jumaat - 2:30 lei 4:00 dui
Cuti am, Sabtu ru Ahad - Tutop

Jumlah Kakitangan

8 urag kakitangan
1 ketue pusat


Spesies De Mong

Seladang, rusak, cep kuang raya, cep kuang cermin, cep kuok pongsu, cep kuok hijau, cep pegar, pug mata merah, jol.

Program bilaksane

program kicap baka pai
program terlas ku habitat asal
program pekenan
program senedar awam
program sukarelawan

(Sumber: Jabatan PERHILITAN)



Pekenan iceti bibiak

**Ektiviti**

1. Jijoi maklumat ku kemil ru sumber kilek senarei isik-isik penteng ma ipenenteng Pusat Konservasi Hidupan ces biujud?
2. Jijoi pendapat engkek, ma an tejadik amen menatag-menatag ces de mong tok bijagak atao bipekenan ku mase nungar?



Seni Engrok



AUDIO 9

Pantut Naseb Menatag Serag

Cip beintei ku Kuala Pegoh,
Inong bekuna hod lei tok senang;
Menatag ces jengoi de sengoh,
Pelenkap duniak cenipte ya Nyenang.

Tengroj kak baug ku gus manik,
Tengroj jugak kak lampap ru sepat;
Menatag ces jeoi de unik,
Hod hik jagak agok biperdat.

Ceryak lokan ku beg pantei,
Ha bijual ku Kuala Tahan;
Mergas hunen genmar biintei,
Naseb mergas bok petahan.

Cenen Bah Litau bekerajak terok,
Ceryak jerengkeh lei nu Bentong;
Sengoi hunen besipat benarok,
Menatag biperdat ha ceryak untong.

Jehuk ku selai jeoi bigik,
Ha bibeh dag becog ru pos;
Mergas biperdat sesukak sengik,
Amen bibiar pasti an pupos.

Neamal ku kampug begutong-ruyong,
Adehloh tandak sinui bepakat;
Menatag biperdat naiha ceryak untong,
Sengoi rah adeh sinui tok berkat.

Sayet bedajal hod bipetie,
Kijadik tugas nujap peringak;
Jadikloh sengoi besengik mulie,
Kazanah bumik senalo bijagak.

Cip nu selai ru peringak,
Laluk bejeramoh nukawat pos;
Menatag ku serag hodloh hijagak,
Ku mase nungar tok an pupos.




Ektiviti

1. Secare kumpolan, beh sesi soal jawab bekenat pantut ku kemil.
2. Beh analisis ru og pendapat engkek bekenat "Punce Menatag Ces ku Malaysia Gu Pupos".



Tatamengwal

Tulogloh Jik Nyenang!



Belakuk teknod serag. Jengoi menatag najeg nu was kilek ru peringak naiha selamat dirik. Amek Banred ru ikenon Litau lekat tok naikep jeg alaopen os teknod gu rek. Apak Cig ru Amek Cig naimur Amek Banred.

Apak Cig: Amek Banred! Amek Banred! Yama engkek lekat tok engkek jeg?

Amek Banred: Eh, hek apak Cig! Eng lekat tok ngjeg mende kenon eng Litau ijug lukak. Ilei tok kep begerak. *(kijap sambel kineng nu ikenon)*.

Apak Cig: Ee, terok jugak ilukak adeh! Litau, hek tok buleh langsung ka cekcip?

Litau: Tok kep, pehod betol. Adoi, amek pehod betol jug eng deh! *(kijap sambel kicap teg iamek)*.

Amek Banred: Sabar ya Litau.

Amek Cig: Amek Banred, hik hod jeg gej, os adeh gu rek, amen hilamat tok sempat hiselamat dirik.

Apak Cig: Betol, Amek Banred! Cubakloh hek paksak jugak kenon hek deh cekcip.

Amek Banred: Kenon eng mimang tok kep cekcip. Tok maloh, ciploh engkek canuk selamat dirik. Eng tok an ngwes kenon eng ku padeh.

Amek Cig: Acut, beket jug eng deh Apak Cig! Apak Cig os gu rek adeh, nengloh jug eng adeh terkenal barak os. Hik hod begerak gej Apak Cig. *(kisengoh sambel kiher belalei igensir)*.

Amek Banred: Ciploh Apak ru Amek Cig, selamat dirik engkek gej.

Apak Cig: Habis hek hod dat ngej ku padeh? Beiloh hik jeg. Hek wes taleh kenon hek mende ilukak pen terok.

Amek Banred: Yok, sanggop hek yap begei ajeh! Eng tok an ngwes kenon eng ku padeh. Amen dat pen datloh. Eng sanggop dat demi kenon eng.

Amek Cig: Beiloh Apak Cig hik begerak. Biarloh Amek Banred ru ikenon ajeh.

Litau: Amek, eng ngsemanj maap ... eng na og nehajap nu amek. *(kikarau)*.

Amek Banred: Tokmaloh Litau, numom amek tok an kiwes ikenon alau ma pen de tejadik. *(kijap sambel kiep ikenon)*.

(Haj ... ubai cerngai engrok de kuat ku suig ru ju suig jugak celeh manik lebat).

Litau: Yak, manik lebat amek! Mergak ku suig ajeh kiceleh manik. *(kisurak sambel kernyim)*. Hik na selamat ka amek?

Amek Banred: Hooch Litau tapik tok panei nej ma naseb hik telas adeh. *(sambel kinengneng kerileng de kamerek musnah)*.

Litau: Tulugloh jik ya Nyenang!



1. Bacak skrip drama ku kemil ru kernal pasti engrok seru de mong.

2. Beh ayat gunakan engrok seru de engkek kep.

3. Jijoi pendapat engkek, ma inaseb amek Banred ru ikenon telas ajeh?

Ektiviti



Mergak iceti bendak



Kenukoh

Biancam Penepupos



mergas



banred



cep botak upeh



tuntong



kak kelah



seladang



jol



orang utan



Ektiviti

Jijoi gambar ku kemil, ceryak maklumat yama menatag-menatag ajeh biancam penepupos ru ma ilangkah ha atasi?

UNIT 10

Inovasi ru Daye Kreativiti



Cerngai ru Belwal



Produk Jehuk Palet



Ektiviti

1. Besual jawab ru cikgu ha bekenaet gambar ku kemil adeh. Og cuntoh kilek selaen ju gambar ku kemil.
2. Ru gunakan bahan kitar semula, rike nanek produk joi kreativiti masig-masig ru peterang igenunak?



Inovasi Teknologi Robotik

MANTIN, 7 Oktober – Ha og penededah awal nu teknolui robotik, lebeh 200 urag mureb ju daerah Mantin, Negeri Sembilan najoi bengkel robotik serte kenenjip penedidik kateh bidang Sains, Teknologi, Kejuruteraan dan Matematik (STEM).

Projek bengkel bikernal sebegei STEM Robotik kikep tenaje Yayasan Amal Tenaga (YAT) ha sukong penekembang Revolusi Industri 4.0 (IR4.0). Ketue Pegawei Eksekutif YAT, Mohd Marzuki Yasoa kiurok, bengkel ajeh mampuk kipekukoh nej cenempet mureb ru kipetinkat peluang kerenjak nu mase pigoidoh.



Kiurok nej, bengkel STEM Robotik YAT mongloh antare kurikulum ku kerop Kementerian Pendidikan Malaysia (KPM) de kiog penetekan nu aspek kreativiti ru inovasi kateh kenalag mureb jijoi pembelajaran beasas kenenjip de menarek serte sernuk.

Turut tibak jugak, Pengarah Urusan Sinergi Ilmu Resources, Mohd Jaini Mohamad de kilaksane bengkel robotik tesebot. Ilei kiurok IR4.0 kikaler gaye sinui ru tenindak masarakat duniak de kihod rimdij pitak betindak pantas seireng penebangun pesat kateh produk beteknologi serte sistem automasi pintar.

“Icuntoh, hunen hik boleh mulak begibang bekenae deg pintar, kerite pintar, telipon pintar ru jeoi nej elemen pintar biterjemah kateh teknolui pintar jijoi IR4.0. Malah, hunen tivi nyiknyuk sebegei medie inpormasi ru henibor tapik boleh behubong secare langsung ru sengoi rah kikesan nu belok sengoi kibegerak atao kijadik penggera,” ilei kiurok.

(Biubah suei ju *Harian Metro*, 7 Oktober 2019)



Ektiviti

1. Bacak nepetek ku kemil adeh ru beh serengkol.
2. Tules nanek berite bekenae Karnival Sains dan Teknologi joi pormat de betol.



Menules

Penenteng Teknolujru ru Inovasi Kateh Penedidik



Kikerip mase ru tenage

Kipetinkat daye neingat mureb

Kitarek minat mureb

Kiteroke maklumat
kilintas sempadan



Ektiviti

1. Jijoi maklumat ku kemil bincang isik-isik penteng kateh kumpolan.
2. Beh kenarang sarahan betajok "Budaya Inovasi sebegi Wadah Penementok Negara Malaysia de Sejahtere" ru permuj peribahase de sesuei kateh penetules.

3.3.3
5.4.3



Seni Engrok



AUDIO 10

Era Pintar

Duniak tebeg imaginasi
 sengoi pencetus inovasi
 nu ala penetinkat prestasi
 beinovasi ubah pesepsi ku jaman teknolujji
 gu nyak hik jar, gu jeoi hik bese
 tinkat nilei hidmat ru produktiviti
 kawal selia kipintan kreativiti.

Demi ha hik harung cenabar
 demi hipetinkat lemu penanei
 kateh era globalisasi digital
 tentukloh hik nyek akuk kalah
 pasti hik sahut revolusi
 rah pahlawan jaman pigoidoh
 duniak sebegei saksi
 bukti era pintar.

Hunen
 sinui begerak deras
 seireng teknolujji pintar
 deg pintar, kerite pintar, telipon pintar
 ru segale-gale pintar
 mimang hebat cenipte duniak.

Kateh hik capei menajuk moden
 agok hik sip dirik
 agok hipenteng dirik
 cenemerlang ugame, bangsak ru negara
 lekat jadi agenda de utame
 cap nu janyik terlas rimdij neego
 demi kijamen senejahtere negara.



telipon pintar



kasut bemuto




jarop cencuk













Ektiviti

1. Bacak sajak ku kemil ru og iceti nujap rankap.
2. Ru gunak menudah Internet, kek maklumat bekenaet teknolujji ru tules nanek sajak. Bincang kateh kumpolan.



Tatamengwal

Engrok Hubong Genabong

1. Anuar atao Ali baiet nu penamer Karnival Sains dan Teknologi ku Dewan Merdeka. 
2. Lauren kikerakmik mende kimenang Anugerah Inovasi ru Teknolujji hamaka imenang kisedeh kayat kialah. 
3. Rimdij peserte kusus naibekumpul nu dewan mende mong ceramah multimedie ru biperloi ya pegawei betugas. 
4. Cikgu Milah kiog nearah nu mureb ru hasel robot gunakan bahan kitar semulak. 
5. Kempen Teknologi Hijau bilancar ya Yang Berhormat Tan Sri Bakar bin Wahab tapik kep leniput pehak medie massa. 
6. Sempena Hari Inovasi ku perinkat daerah, Wak Liya kinyanyik manakale kiberunggen. 
7. Wak Rina bejaye kibeh eksperimen kateh kelas sains serte bipateh ya ikawat-kawat. 
8. Eng, menang ru tenek atao apak ru amek an jik cip neng penetanding melukes poster sempene mingguk Panitia Sains. 
9. Majeles Anugerah Pertandingan Pendidikan Robotik birasmi ya Puan Zalina ru sempurne sambel kateh keadaan manik lebat. 
10. Gutong-ruyong peberseh dewan telas program Inovasi Pendidikan bibeh ha kiujud penepadu ku nanek ru samak mai kilek. 



Ektiviti

1. Gantik engrok hubong genabong de sek kateh ayat-ayat berikot ru tules jenawab kateh petak de bisediak.
2. Engkek ru kekawat na engkek cip nu Karnival Sains dan Teknologi. Beh dailog gunakan engrok hubong genabong bekenaaet kenenjip engkek.

DUNIAK CERITA



UNIT 11

Benisik Serag



Cerngai ru Belwal

Lengrik Bermuh Perak



Ku jaman manah, mong nanek kampug mai sengoi. Mai kampug ajeh senalo naitulog naibeh kerjak.

Ju kenyak, mong nanek bot ku semadek batagari.

Nanek jis, mabek keral naibepakat naimuj nu serag ha naikke hasel serag.

Hamaka, nakhoda kapal tepaksak kiwes ikapal mende tok kikep ui ma-ma. Mai sengoi pen najuk nu kampug. Ju kenjeh jugak, mai pasak naiog muh tempat ajeh Perak.

Mai kampug ajeh naiperek nu batagari. Bile enai lei pajeh, nakhoda kapal kisemanj tulog. Enai pen naicubak tulog ru care naigik kening jehuk ajeh tapik tok buleh mende cegeh. Kening jehuk ajeh kaler belack.

Telas nik tenem enai kep jeoi hasel serag. Enai becadang naiha juk najioi nu nanek lod. Ku lod ajeh enai behentik laluk naineng nu batagari.



Ektiviti

1. Neng semiyak gambar ku kemil ru pileh ayat de sesuei ru igambar.
2. Yama hik hod tulog mai de hajap?



Menacak

Tujal ru Pinoi



Mai tepas iceti mai bunian

Ku nanek kampug mong numom sayet keral imuh Tujal. Ilei mongloh suku kaom Temuan. Deg peringak Tujal rek ru batagari de entoi ru kerileng serag tebal.

Nanek jis ilei kiet nu serag ha kek yas. Mase ku serag ilei kicerngai nanek engrok de selak sot. Telas ajeh ijis haj betukar jadik sengur. Selak-selak sot perheg selidaj seolah-olah kibelwal gunakan engrok pelek. Pinoi gu leu gu kuat.

Tujal kineng nu kemil, haj mong nanek pinoi belak begei kineng ilei. Selak jehuk berengrok begei kirakrok. Cag jehuk mulak begut ru ijis betamah guer. Tujal kikenjip tok selamat laluk kijar tok behenti kateh serag walah ala tujuk. Pinoi begei kitulak Tujal lei kiyog betol-betol ku ngar tudeng.

“Tudeng ku belok ala kampug eng,” tanyak Tujal. Tudeng kijawab tok panei laluk kijar ju kenjeh.

Tujal kiteros iceknip de walah ala tujuk nej. Pinoi lekat kibese ku kenog Tujal. Telas ajeh, Tujal kijeramoh nuikor gau tunggal.

“Hek panei ka kampug eng nu belok?” sensual de samak kitanyak nu gau tunggal.

“Eng tok ngpanei,” balas Gau tunggal ru kilug ha Tujal. Ilekng besenggoh bernor. Pinoi gu tamah kuat ju coinek.

Tujal kijar. Tujal kikenjip selei ru kaha jinjap. Haj ilei kijeramoh becog. Tujal kitanyak sensual de samak.

“Becok hek panei ka deg eng ku belok?” tanyak Tujal.

“Deg hek ateih,” becog kijawab ru bor. Becog jugak kiternyul nu nong kampug.

Tujal pen teros kicip leiloh kiloi nu nanek jehuk entoi. Ilei kibeparik ru kiberencep ku kenog jehuk entoi mende pinoi lekat kibese ilei. Pinoi ajeh kitehol gu kuat ala ku was kigei. Tujal kikenjip selei ru kaha hajap nej mende kiserngik ilei rikroj ku serag. Teu mat Tujal mulak kijot.

“Yama hek gei ku was sengij,” engrok mai raknak sambel kiulur iteg. Paknyak nek teg apakjob. Tujal teros kieb ilei ru kijap.

Tujal kicerite ma tejadik ku apakjob. Iapakjob kibual ku serag mimang jeoi penunggu ru hik senalo biserngoh amen hik cip halei. Gau tunggal ru pinoi berupe semangat tok bor amen hi jumpak ku serag. Ju kenjeh jugak, Tujal tok kimuj serag halei nej.



Ektiviti

1. Bacak nepetek ku kemil ru ma peneajar engkek kep.
2. Analisis unsur sastera de engkek kep ru bentang kateh kelas.



Menules

Eng Mai Kuat

Eng Badang sengoi beasal ju Kampung Sayong, Johor. Eng bekerjak nu nanek ladang Mai Kayak Nira Sura ku Seluang. Berog eng tokloh entoi tapik eng mong kengwat rual biasak. Eng nghod ha behidmat ru rajak tapik walah peluang leiloh nanek jis ...



Raja Seri Rana Wikerma – kipelawe rakyat-kek selak kuras-santapan baginda



selak kuras- ku tempat de senusah ha kot-Badang kitawar dirik



kot selak kuras-kiyok kenak batu-batu ceerahak kep panei-kagum



Badang biog penehurmat-biog set penesalen ru og gei ku istane



Badang tulak kapal-englag teg-biangkit jadik hulubalang



penetanding ru utusan India pej gesuk-kep angkit gesuk ru pej nu laot



Ektiviti

1. Neng nu jap gambar ku kemil ru cerot jadik nanek ayat de lenkap.
2. Telas ajeh, ulas ru peterang kateh kelas secare beadat.

3.3.1
4.1.1



Lengrik Darat Legep



Mong nanek was de kijadik kampug sengoi ju manah. Kampug adeh aman damei ru kayak sumber alam. Yas ru hasel serag senang ha berkep. Bah Perah berupe numom ketue masarakat ku kampug ajeh. Ilei senalo kijadik renujok amen mong masalah. Bah Perah ru mai kampug jugak senalo bejual belik ru mai rual amen mong lenebeh hasel serag rah cog, damar ru pelek-pelek serag. Hasel-hasel adeh kep senmanj lasik ju mai Gop.

Bah Perah ru mai kampug senalo beneuros tukar arap ru mai bangsak kilek teutame mai Gop. Nanek jis, mase Bah Perah kilaluk nanek nong ilei kibakek numom mai aseng. Mai biperdag ilei sengoi kemil pinoi. Igetek cehei, iberog cereg ru engrok bebize ju mai Gop. Mai biyek ajeh cubak kaha perek Bah Perah ru mai kampug tapik naijar muj nu kateh serag. Telas ajeh, mai biyek kidol nucengkop caknak ku beg serag ru kiwes peninin. Mase adehloh Bah Perah ru mai kampug naihol ru naineng ma de mai biyek ajeh kiwes. Laluk enai bukak cengkop caknak ajeh.

“Sendap hei caknak adeh. Laen bernor ju caknak hik ku serag.” Bah Perah kicak ru kipelawe ikawat.

Telas nar tenem, mai biyek ajeh kipoj ku was de samak ru kianj jeoi caknak. Bah Perah kiperek alaopen kisengoh.

“Bei madeh. Adeh jeoi caknak.” Mai biyek kipelawe ru kiulur iteg. Gu leu gu rek ilei.

“Eng James,” engrok mai biyek ajeh sambel kaha salam.

Tok sangkak ju kenjeh henubong ubai kijadik rapat. Bah Perah jugak senalo kianj James muj nu serag ru kampug ilei. Kekadang ilei kigei bemingguk-mingguk. James jugak senalo kitules nota ru kikit gambar care sinui mai kampug Bah Perah. Selaen ajeh, James jugak kiberajal engrok sengoi. Tok leu ju kenjeh James dah panei bedol gek-gek engrok sengoi. James kipasal telas adeh kek kaha tibak nej ru ikekawad. Bah Perah kikernyem taleh.

Tik de naigei adeh gu jeoi mai rual. Mong Cerawas, mong Lel, mong mai Gop ru bebegei bangsak. Penempatan pai enai bukak gu rek ru kampug Bah Perah. Senalo jugak Bah Perah kicerngai mai kampug biperet ru bicacek. Kekadang ceknet enai bisij ru binakal. Gah ju kampug kilek jugak mong mai kampug biculek.



Telas Bah Perah bebincang ru mai kampug, Bah Perah kikut penutos naiha jeg nu jeres nyak ju kampug mai rual. Jis ajeh jugak Bah Perah ru mai kampug naibesiap naiha jegjeg. Bah Perah tepaksak kisip James ha senelamat mai kampug.

Telas nugecek, James tibak ru nar urag kawat. Enai poj ku nong senalo naitibak tapik bok hentok pen ha sambot. James kikenjip pelek ru betamah runseng. Laluk enai naiikot penutos ha naimuj nu serag teros nu kampug Bah Perah. Serait kampug Bah Perah mende bok hentok.

“Yama hek ha dek tok ha poj eng Bah Perah?” James kibual kihalei ru nada sedeh. Telas ajeh James kijuk nu lengrik ilei.

Ju kenjeh kampug ru was kerileng kikus ru deras. Tapak kampug Bah Perah kijadik tapak stesen kerite os. Lengrik enai jugak tok bikernal Lengrik Darat Legep tapik Teluk Anson. Teluk Anson kijadik bandar tekenal ru was peneniage mase ajeh.



Ektiviti

1. Bacak cerite ku kemil ru beh nelakon, telas ajeh og serengkol de engkek kep.
2. Ku peniker engkek, yama Bah Perah ru mai kampug naidek tegesa-gesa?



Penelantik Penghulu



Berkes kelemnek, pegawai kerajaan najempot eng ku kampug. Pegawai ajeh kibual eng bihaog peneiktirap ya kerajaan sebegi Penghulu Kampug. Eng kenjip begei tok pecayak ma kibual. Eng teros ngsiap arap peksendok eng ngjoi ilei. Ceknip jik kicak nanek jam ru huj kerite nu pekan Tapah. Eng bianj nu nanek asrama kerajaan. Eng tok nghalei ku pajeh mende mong nej sembilan ketue kampug ku daerah Batang Padang. Salah nuurag de eng ngkernal ialoh Penghulu Semilang bin Penghulu Bongkok berupe penghulu Sungai Bikam, Slim.

Ikelem ajeh nuurag pegawai kiperloi maklumat ha aturcare majeles huper ru kior jik besiap awal. Peluang bekumpol bejengoi adeh jik tok sie-sie ha bekungsi kenenjip, cerite ru gah kampug masig-masig. Eng sernuk cerngai cerite penghulu kilek. Jik begibang leiloh jik bukbet.

Ihuper, jik bekumpol ku padag ru biog taklimat care-care ha kot surat kuasak penelantek penghulu. Ku kerileng eng jugak gu jeoi mai sengoi naiterbeg kerileng padag. Tengloh kehurmat kitibak tok leu ju kenjeh iaajeh Mr. Frank Rodger. Ilei kibual penelantek adeh berupe de majeles julong-julong kali biui betenujuk ha pileh penghulu. Selaen ajeh, penghulu hodloh kijadik penghubung antare kerajaan ru mai kampug. Ilei turot kibesat jagakloh kampug begei jagak neuros deg lihik. Telas dij majeles ajeh jik pen bianj juk nu kampug masig-masig.



Sakai iceti jijoi Kamus Dewan Edisi Keempat kitakrif sakai berupe nanek muh de bigunak ha Orang Asli.



Ektiviti

1. Bacak nepetek ku kemil ru hasel 10 ayat tenanyak de sesuei.
2. Og penandang engkek ma peranan ketue kampug?

UNIT 12

Cerite Rakyat Tetap Ku Nus



Cerngai ru Belwal

Yama Jajok Berengoi Pandan

Ku jaman manah entem, jajok berupe menatag de genmar kihalei-halei ru tok jeoi ikawat. Menatag-menatag de kilek, nainyek bekawat ru jajok mende ingoi sok ru kuat. Jajok kikenjip sedeh mende isinui senyong ru tok bekawat. Jajok kilengleg ru beh penutos kaha perdat ilei ru care kaha tau ku batagari.

Kateh cepnip ku batagari, jajok kineng nuikor kebog na kicap ru kikap ikenyek nuikor cep de had bor. Cep ajeh kisemanj tulog. Bile kebog ajeh kibeleh jajok, teros kiterlas cep ajeh ru kijar ha selamat idirik. Jajok kiangkit cep de lukak ru kidek cep ajeh ku kemil jehuk de entoi.

Telas ajeh, jajok kiteros icepnip nu batagari. Telas kicip seleneu nar tenem, ilei pen tibak ku beg batagari. Pai kaha tau kateh batagari, ilei kicerngai becereg imuh. Jajok kineng nu ikenog, paknyak ajeh cep de bor de kiselamat nar tenem telas. Cep kiheg kiceleh nu kertik ru kitanyak, “Yama hek tibak ku padeh?” “Eng na tok sanggop nej ngsui ku duniak adeh cep,” balas Jajok sambel kijinjap. Jajok pen kicerite kisah sedeh ilei nu cep. Cep kikenjip cenen nu Jajok. “Agok beh penutos ha perdat lihek rah adeh jajok, tok bor,” bengesat cep. Cep kiog cenadang ha selesai masalah jajok ru bejanyik ha tulug jajok.

Cep pen kianj jajok muj nyak kateh serag ru kior jajok cak nubanse tenumbuh de berngoi relahui iaajeh selak pandan. Jajok kicak selak pandan ajeh seleneu tujuh tenem. Jis ketujoh jajok kikekjet iberog ilei kiperhol ngoi de ceeng begei kasturi. Jajok kikenjip sengoh ru susah isengik mende kiserngik ngoi ajeh lebeh terok ju ngoi peksendok adeh. Jajok pen kiceryak ha cep ru kaha perdat cep ajeh mende kiserakngik cep ajeh kilenlod. Tapik bile jajok kiterbuk cep, cep kipeterang nu jajok berog jajok an kiperhol nar ngoi, nanek ngoi relahui ru nanek nej ngoi sok. Ngoi sok an kiperhol bile jajok kibekelahik.



Lengleg iceti merajuk



Ektiviti

1. Bacak cerite ku kemil. Gunak teknik ‘krusi beket’ beh sensual ru gunak bebegei banse sensual.
2. Beh ayat ru belwal gunak laras engrok eknej amen engkek ha ej jajok dek tok kiperdat ilei.

1.2.1
4.5.1



Menacak

Asal Usul Muh Rembau



Ku jaman manah entem, mong nukumpulan mai sengoi naiha bukak kampug de pai. Mai sengoi adeh iketue ialoh Batin Skudai. Telas memerip jis lienai cip kateh serag, lienai pen naipileh was ku kaki Gunung Datuk ha bukak kampug pai. Mase lienai sibok babeh kerjak cahnah ru naigakgik naiha perlau was ajeh, lienai naibeleh nanek jehuk de had entoi ru birel ilasik de bikernal sebegei jehuk merbau. Batin Skudai kikenjip tok selamat amen lienai bukak kampug ku pajeh mende kirisau ku mase nungar jehuk ajeh an kikul.

Telas kibebincang ru iikut, lienai pen naibeh penutos ha naiha gik jehuk merbau ajeh. Yah ru kelem seleneu tujuh tenem tujuh kelem lienai bekerakjak ha naiha gik jehuk merbau ajeh tapik jehuk ajeh lekat tok kikul. Mai sengoi ajeh naikerek mende jehuk adeh tok kikul. Batin Skudai pen kibeh penutos kaha semanj benantuk ju numom tok halak de hebat ilemu ku kampug.

Telas tok halak kineng jehuk merbau ajeh, ilei kior kenumpol mai sengoi ajeh naicat Gunung Datuk naiha semanj izin ju gunik lod ajeh. Henlep memerip urag mai sengoi ajeh pen naicat Gunung Datuk ru naianj bebegei jenamuk ha naiog nu gunik lod. Lei nu jelmol lod, lienai naiseru muh igunik ha semanj izin ha gik jehuk merbau ajeh. Telas seleasei iupacare, lienai pen naijug nej nu kampug. Kelem ajeh, manik kiceleh lebat ru pes ru jear kuat.

Awal huper, lienai cip nej ku was jehuk merbau ajeh ha peteros kerjak-kerjak gankik jehuk ajeh. Lei ku pajeh, lienai naikekjet mende naineng jehuk merbau ajeh na kikul ru had entoi. Ku jelog jehuk ajeh, 40 mom buleh bigei. Lienai pen naibeh caknak sambel naibesukak mende bejaye naiperkol jehuk de entoi ajeh. Mong antare memerip sengoi ajeh, lienai naidoi dengdog jehuk merbau de kol ajeh naiha neng imol.

Mong cerite mai manah imol jehuk ajeh lei nu batagari de bikernal sebegei Sungai Ujong. Was jehuk merbau de kol ajeh biog muh Kampung Merbau Tua, telas ajeh bikernal sebegei Rembau lei hunen.



1. Bacak cerite ku kemil ru og neulas berkenaet latar masarakat ru penecayak de mong kateh cerite.

Ektiviti 2. Pileh babak kateh cerite ru beh dailog ru lenakon.



Menules

Yama Telei Poi Bekaler Rengai

Ku jaman manah, mong ubai kenah gensir de pai baijekjek. Igensir bermuh Suni ru ikenah bermuh Liah. Ubai rajit beselai ku kerileng deg. Lieubai cetcet jagug, senubai ru bak. Sinui lieubai sederhane taleh.

Ku nanek jis, pepergelap mase lieubai hod cip nu selai, Suni kikerek mende ku ngar deg cuai nubatag kening telei. “Liah ... Liah, hek ka cet telei ajeh?” tanyak igensir. Ikenah kikekjet ru kijawab “Tokloh ... eng tok ngcet telei ajeh.” Suni ru ikenah ubai cip rek nu kening telei ajeh. “Biarloh, amen bepelek buleh juga hicak,” balas Suni.

Memerip jis telas ajeh, haj Liah kinyaknyik. Ikui pehot ru ilei kikek tok behentik. Suni kikenjip susah isengik ru cenen kineng ikenah rah ajeh. Suni kisemanj benantuk nu iapak ru iamek ha ceryak penglai nu ikenah. Apak ru amek Suni pen kisemanj jenampik nu tok halak ha penglai nyaknyik imengsau.

Tok halak pen kitibak nu deg Suni ru kimulak ijenampik. Tok leu ju kenjeh, tok halak kipasal, “Suni ... kenah hek adeh bimur ya cemenak telei ku ngar deg engkek adeh. Cemenak ajehloh kikatay kenah hek adeh nyaknyik.” Bile kicerngai engrok tok halak, ilei kikenjip beket inus. Ilei kicip nu dengwal kaha kot yog cereg. Ubai iapak amek baicubak kerlag tenindak Suni tapik tok kicerngai. Suni kibernos teros kiceleh ma tik ru kigik jehuk telei ajeh. Haj, Kening telei ajeh kiperhol behip de jeoi ru kikarau semanj tulog. “Adoi ... agok gik eng, tulog, tulog.” Behip cemenak kikenak dij nu kening telei. Tok halak gej kijampi cemenak telei ajeh kaha perdat iruwai.

Telas memerip jis, ikenah pen na tok kinyaknyik nej. Ju kisah ajehloh hunen mong telei bekaler rengai. Hunen lekat mong sengo de tok buleh naicak telei rengai ajeh.



Ektiviti

1. Jijoi cerite ku kemil, kateh kumpolan beh serengkol “Ma an belakuk amen Suni tok kicereg tok halak ha kiperlai ikenah?”
2. Mai Gop pen mong icerite punce telei bekaler rengai. Gunak Internet ceryak icerite versi mai Gop ru olah sebegei kerjak projek.



Peteri Beltop

Yok Kana kimuj penetanding becerite neanjor Kelab Bahasa Semai ku sekolah. Beiloh hik cerngai Yok Kana becerite.

Ku jaman manah entem, mong nuperingak kenah gensir ru enam urag kenon keral. Lienai naigei ku nanek kampug de nyak kateh serag. Antare enam urag kenon ubai ajeh, kenon de iluj becereg Yok Luj had rajit ru bergol beintei. Nujap noh kicip beeintei mimang ilei an kikep jeoi yas. Yok Luj jugak senalo kiperendah dirik ru tok sumbong. Yok Luj senalo bipateh ya iapak ru iamek. Adeh bebize ru kelakuk mabek itenek. Itenek Yok Luj had serlei bekerjak ru keknek caknak.



Limak itenek Yok Luj ajeh lienai naigenmar besakik nu imenang. Lienai senalo nainye, naibelal ru naipal imenang mende naikenjip tok puas sengik. Nanek jis, itenek de sulog saje kipej belau haknuq Yok Luj kateh batagari. Yok Luj kikenjip sedeh. Ilei kilengleg ru kijinjap. Iapak ru iamek baiej ikenon tapik tok bejaye.

Ku kelem ajeh, telas rimdij iperingak bukbet, Yok Luj na kianj dirik nyak ku darat. Ilei kianj ibelau ru iyoy. Ilei kilei nu nanek was de jeoi jehuk beltop, Yok Luj beh penutos kaha beh deg jambor. Jeoi jehuk beltop, hamaka senangloh ilei kaha beh jambor. Telas ideg jambor siap, pajehloh ilei kibetede ru kibukbet. Yok Luj kibeh selai ha cetnet bak ru ilei jugak kicip beintei.

Ku nanek dui, ilei kilei nu madeg, ilei kikekjet mende ku deg jambor ya mong caknak bijamuk. Yok Luj kikerek mende bok hentok sengoi kilek. Ilei kicuag teros kicak caknak de bijamuk. Jap-jap jis caknak bijamuk tapik Yok Luj tok kipanei bok de bercet caknak ajeh. Kelem keenam, Yuk Luj na berapok, numom kerdor de bor irenis kiyap ileiloh de bercet caknak ajeh. Ilei berupe peteri beltop ru ilei kimek nu Yok Luj. Ilei jugak kaha jadik kenah Yok Luj.

Bile Yok Luj kisedar, peteri ajeh na mong ku deg ilei. Yok Luj kikekjet kineng ulah peteri de had kemek. Yok Luj kisetuju kaha jek ru Peteri Beltop. Tok leu ju kenjeh, Yok Luj kibecadag kaha

kianj ikenah ha terbuk ru iperingak. Peteri Beltop kiog sarat dek Yok Luj tok kiog panei iasal usul ikenah ku iperingak. Yok Luj ru iperingak jugak tok boleh naiyur muh beltop, amen bilanggar senumpah an belakuk. Yok Luj pen kibejanyik kaha dek irusiye ikenah.



Lei ku kampug, iperingak naikekjet bile naineng Yok Luj kianj kerdor de had kemek. "Apak, amek ru tenek, adeh kenah eng," yap Yok Luj sambel kernyim. Rimdij itenek naisakik. Henlep, iamek ru iapak ubai beh pesta neasek mende naibesukak ha naikep mensau. Mase beasek, amek Yok Luj kigenmar kineng imensau kibegengsag. Yok Luj kisip bepasal nu pitak iperingak dek tok naiyur muh beltop. Amek Yok Luj kimur Peteri Beltop. "Mensau, panei hek begengsag, yahnoh berog hek rah selak beltop." Haj, imensau teros kinyep. Rimdij lienai naikekjet. Yok Luj kijinjab bile ikenah nyep ru kiyap, "Amek yama jen mur mensau rah ajeh?" Eng semanj maap apak, amek, tenek, enjen na engkek langgar pantag. Bok-bok de kimur kenah eng rah beltop an bisumpah. Tok leu ju kenjeh iperingak beubah naijadik menatag. Rimdij lienai naijar ku serag.



Ju kenjehloh, menatag-menatag ku serag betamah ibanse ru ijengoi ha kijadik ente ku mai sengoi ha mase nungar.



Ektiviti

1. Jijoi cerite ku kemil pileh babak de engkek sukak. Beh skrip ru lenakon.
2. Jijoi skrip pesembah lenakon engkek kateh kelas.

4.4.1
2.4.2



Cermor Cenar Beserei

Kateh nanek kampug, mong numom menaleh bermuh Seri. Ilei beumor 16 tahut. Seri ikelakuk bor. Ilei kigei ru iapak ru iamek tirik. Nujap jis, iapak kicip nu selai kicet bak lei dui. Nujap jis jugak Seri kigei ru iamek tirik ku padeg. Iamek tirik tok kiog Seri cakcak. Iamek tirik senalo kirakrok amen Seri kismanj caknak. "Hek adeh hek hod caknak taleh tapik segat tulog eng beh kerjak. Amen hek hod cakcak hek poj apak hek kijug. Tok dij-dij hek perhajap ha eng." Seri kijinjab mende ilei kicuag.

Mase iapak kijug ku padeg ru kaha cak kelem, Seri kigei enlag iapak ru kesemanj caknak nu iapak. Seri kibeh gekjeh dek iapak kisedar de ilei peksik kicakcak. Tapik iapak kikerek ru kitanyak nu ikenah, "Seri peksik kicakcak ka?" tanyak apak Seri. "Ilei na kicakcak, saje ilei kikacau hek," balas iamek tirik. Bile kicerngai bengwal ikenah ajeh, iapak terok kirok Seri "Seri, cip muj bukbet!" Seri kikenjip sedeh ru kiet nu bilek. Seri kijinjab kikenang ha inaseb. "Amen amek lekat sui, tokloh naseb eng begei adeh," bual Seri kihalei.

Begei ajehloh naseb Seri nujap jis. Kadang-kadang taleh kikep cakcak. Nanek pegelap, mase gus bak pai, iamek tirik kior Seri cip nu cenar kateh serag kior ham serei. Mai kampug lienai tok beranik naimuj kateh serag ajeh mende mong menatag ces. Seri tok kiserakngik, teros kicip nu cenar ajeh. Telas terik kaha lei ku cenar ajeh, ilei teros kiroit serei begei bior ya iamek tirik hod gunak sabit. Haj, ket Seri kicer kenak selak serei. Seri kikarau mende pehot. Lukak ku iket had entoi, jeoi behip kihol. Seri kismanj tulog tapik bok hentok panei. Tok leu ju kenjeh, Seri pen kidat.

Amek tirik Seri mulak susah isengik mende Seri peksik kijug. Apak Seri kipanei Seri tok kijug, ilei kicubak ceryak ku kerileng kampug tapik tok kibakek. Amek tirik Seri kijinjab sengoh ru kibual ru igensir, Seri kiet nu cenar beserei. Apak Seri teros kimuj kateh serag. Lei ku cenar, apak Seri kikekjet kineng Seri tiktok ilehem nej. Apak Seri kiep ikenon sambel kijinjab. "Seri kusloh kenon eng, hek taleh kenon eng de mong," urok iapak Seri. Ju peristiwa ajehloh, cenar ajeh bikernal sebegei Cenar Beserei.



Mergak iceti bendak



1. Jijoi cerite ku kerop, secare bergu bincang ceti tesurat ru tesirat de mong kateh cerite. Bentang kateh kelas.
2. Kernal pasti engrok penegas, engrok kerjak ru engrok adjektip kateh cerite.

UNIT 13

Henibor Mai Manah



Cerngai ru Belwal



AUDIO 11

Kemor Jelongkot

Ku jaman manah entem, mong numom jajak kigei kihalei. Ilei kikenjip senyong mende tiktok ikenon. Kuibeg deg mong kicet selak bakau had ikenam.



?



Ilei pen kianj jug sayet ajeh nu imadeg. Had senukak isengik mende sayet ajeh buleh kibeuh irop. Ilei pen kihok ru kijagak sayet ajeh. Jajak ajeh kipermem sayet ajeh begei kenon ilei.



?



Laluk ilei ki becadang kaha perdat kenon kemor ajeh. Ilei pen kiet nu serag kikek ceos ru rangas. Jajak pen kikerbat ideg cegeh-cegeh ru kidek rangas ku kerop deg. Ilei pen kitot ideg loi ngej.



?



Ektiviti

1. Cerngai audio penoh cermor Kemor Jelongkot ru catit cerite lenkap. Og nilei-nilei de mong kateh cerite de bi cerngai ju audio.
2. Beh dailog ru lenakon joi cerite ku kerop.



Senumpah Kenon Nagak

Ku imol kampug, mong tujuh urag beradek naigei kateh serag. Kek iluj bicereg Bah Luj. Mong nanek jis, rimdij lienai naidag bubu ku beg batagari. Lienai naiperdeh bubu enai seleneu nik tenem. Jis ku inik, lienai najjet bubu enai. Rimdij bubu tenek Bah Luj heg kak selak ru kak tengas tapik bubu ilei mahentok. Bah Luj kibelal mende pek kikep kak. Ilei kijet ibubu teros kianj ru kidag ibubu ku darat nej. Yah huper kisuek ibubu, kikekjet kineng ibubu mong biheg pengleg. Ilei kikeramik teros kicot pengleg ajeh kianj jug nu madeg. Ilei tok kipanei pengleg ajeh ialoh pengleg nagak.

Lei ku madeg, rimdij itenek ru ubai iapak amek naijar mende naisengoh Bah Luj kianj pengleg nagak. Kigeiloh Bah Luj kihalei ku padeg ajeh. Mong nanek jis Bah Luj kicip ratah lei nu madeg Mak Inang istane. Pug Mak Inang kibesenyog kimur ha sengoi. Mak inang kirok ha ipug ha renyah kayat pek kibakek Bah Luj ku ikenog.

“Oh, panyak nek hek bei! Patotloh eng mamuh tok kaanj, ngsikat sog tok jelos, ngcackak tok behek. Panyak nek hek de hol,” urok Mak Inang.

Mak Inang kipelawe Bah Luj huj nu madeg. Bah Luj bijamuk telei ru gale. Bah Luj kigei ku deg Mak Inang mende ilei ya biwes ya iperingak. Mong nanek jis adeh, ilei kiet tengroj ku batagari. Mase kitengroj, ilei kibakek tujuh peteri naimamuh. Bah Luj kiperibit ju kenyakna. Telas ajeh teros kijuk nu madeg kicerite nu Mak Inang. Ya memerip jis ju kenjeh, Bah Luj kinyik mende kiriyag ha mabek peteri ajeh. Mak Inang kitarah papat kianj kidek beg mahnuh peteri dek enai til bajuk nai ku papat ajeh.

Idui ajeh peteri-peteri naiceleh naimamuh. Enai naitil bajuk ku papat daknek Mak Inang. Mak Inang kikit baju peteri kek iluj kiog nu Bah Luj kior berencip. Bah Luj kiberencip baju Wak Luj ku kateh gepog. Wak Luj tepaksa kigei ru Mak Inang mende walah ibajuk kaha juk nu ilengrik ku rahuk.

Cukop nik tenem, Bah Luj ru Wak Luj biperjeg ya Mak Inang. Ubai pen baisui kateh aman ru harmoni lei baikep kenon nuurag. Bah Luj kisemanj kaha et nu laot kaha ep ipengleg nagak. Bile ikenon ya raknak beumor enam tahut, Bah Luj bior juk neng ikenon. Cukop taleh enam tahut umur ikenon, ikenah kibake bajuk de kiberencip ya Bah Luj kateh gepog. Ikenah teros kicot ru kianj jar ikenon juk nu rahuk.

Bah Luj lekat ku laot kiep ha pengleg nagak. Pengleg ajeh pen kicoh, holloh ha kenon nagak. Kenon nagak adeh kisangkak Bah Luj iamek, teros kicagoh Bah Luj dek kijadik nagak. Ipenyudah Bah Luj betukar kijadik nagak kigei ku laot.



- 1. Bacak ru paham nepetek ku kemil ru beh serengkol.
- 2. Cerite nej sinopsis gunak gaye becerite de sesuei secare beadat.



Menules

Punel

Ku nanek kampug, mong nuurag litau bermuh Bah Alang. Ilei bikernal sebagei mai de halak. Bah Alang kigei ru iamek ru apak.

Mong nanek jis, Bah Alang behej ikui. Ilei kisemanj tulog nu iamek hod neng ikui de behej ajeh.

“Mek, tulog nengloh kui eng behej adeh,” urok Bah Alang.

“Eng segatloh bei, jeoi kerjak eng,” balas iamek.

Telas memerib noh kior iamek neng ikui tapik iamek lekat kinyek, Bah Alang teros kiet nu serag kaha petput. Bah Alang pun kicip kihalei kianj ru ibelau. Pek leu ju kenjeh, Bah Alang pen kilei ku serag. Ku kateh serag, Bah Alang kibakek had ijengoi perog ku kemil jehuk. Bah Alang pen kihuj kemil jehuk kaha put perog ajeh. Bah Alang kiput jeoi perog yog nu matik. Haj, kicerngai begei ha ceknip jug sengo ku kerop. Bah Alang keperibit ju kemil jehuk, kibakek nuurag kerdor tapik niknij irenis begei ha kimoj. Kerdor ajeh panyak Punel iajeh kimoj kerdor. Bah Alang deras-deras kiceleh mende kisengoh iperog bisij ya Punel ajeh.

“Hek agok sij perog eng,” urok Bah Alang.

“Eng walahloh tok ngsij perog hek, eng ha tulog hek mende eng yog sengik nu hek. Renis hek pen bor ru rajit isengoi,” balas Punel ajeh.

Bah Alang kikeradik taleh. Selese kivetput Bah Alang pen kaha juk nu imadeg. Punel ajeh kaha bese Bah Alang tapik kiget ya Bah Alang. Genaleh Punel ajeh kibese jugak Bah Alang lei imadeg. Lei ku padeg rimdij mai kampug ru ubai iapak amek najjar mende naisengoh naineng renis Punel ajeh. Mong mai kampug naicacek ha renis Punel ajeh.

Bah Alang kibeh ikenah Punel ajeh alaopen bikeratil ya mai kampug. Nu kelem, Bah Alang kiberapok bior ya igunik hod permuh ikenah ku tenglor kening jai amen kihod ikenah jadik sengo bernor. Telas memerib tahut, Bah Alang de halak kijampik ru kiubah renis ikenah ju niknij lei jadik kemik. Telas ajeh sinui ubai nukelamin baijadik senang mende ha ibernor sengik Bah Alang nu ikenah. Reski ubai senalo mong. Apak ru iamek baijuk nej nu madeg ajeh ru baisemanj maaf mende baicacek kenah Bah Alang. Ipenyudah Bah Alang ru ikenah baidek ju kampug ajeh ru baigei bahagie.



Ektiviti

1. Bacak nepetek ku kemil ru og respon positip ru negatip secare betules.
2. Pileh nanek babak kateh cerite ku kemil ru man peranan.



Bareh Silan

Ku jaman manah entem, mong nanek tempat bicereg Bareh Silan. Jengoi mai kampug naisengoh naiha et nu was ajeh mende biuruk jeoi pelep. Mai manah entem naiperdek muh pelep ajeh Bah Ungel.

Ma de mong ku Bareh Silan?
Eng ha muj nu was ajeh. Eng ha neng, ma de engkek sengoh?

Wes, pek buleh muj. Mai kampug tok pernah naimuj was ajeh, doh belakuk pekare de tok bor.


Menatag anoh de naisengoh panyak! Amen pelep anoh hunen buleh eng perdat

Hey ... mai nyennyam ma hek beh nu lengrik jih adeh?

Eng sumpah, mulai jis adeh, dui adeh, tahut adeh rimdij keturunan eng an nailot behip sengoi.

Hahaha ... eng perdat rajak pelep.

Hahaha ... alau boleh eng ha perdat rimdij pelep-pelep.



Yama hek perdat rajak jik? Hek an sesal doh mende kelakuk hek de jahat.

Telas memerip tenem ...

Eng besumpah, ku kemil muh Barih Silan was ajeh nyiknyuk nej giknei pelep-pelep.




Terimakloh benalas perbuatan hek de jahat.



- Ektiviti**
1. Secare bergu, bincang watak ru pewatakan kateh cerite ku kemil.
 2. Cerot daiolog ku kemil gunakan ayat lilei jadik cerite de lenkap.

4.2.3
5.2.2



Cemenak Senger



Ku jaman manah entem, mong tujuh urag tenek menang keral. Kenon penyudah bicereg Bah Luj. Ku nanek jis, enai ha et beintei. Enai pen naiet beintei seleneu tujuh jis. Lienai pen nailei nanek was ru naibeh deg danem. Lienai mong tujuh ikor cok. Cok Bah Luj paleng cerdek ru bergol. Cok Bah Luj kiberkep jeoi yas kianj nu Bah Luj.

Ku nanek jis, hol Cemenak Senger nu madeg ajeh. Cemenak kihol madeg ajeh mende kikerngoi ngoi sej. Cemenak ajeh kisij dij perog mabek litau kaha bercak ikenon menaleh tujuh urag jugak. Ilei kaha cak mabek litau adeh tapi kipoj mase de sesuei. Bah Luj kikerek menong perog de kidag seleneu enam jis gu nyep.

Jis ketujuh Bah Luj kipoj ya ilei ikedeg de kibeh, lei kibet ru kiberakpok. Kateh iempok bior ya igunik hod sor cog. Ya huper Bah Luj kiui ma de bior ya igunik. Bah Luj kisor cog ru kibeg ku iberog. Hol Cemenak Senger adeh kineng Bah Luj kibeg iberog ru cog. Ilei pen kihod bibeg iberog ya cog. Bah Luj pen kibeg cemenak ajeh ru cog de kijampik. Cemenak Senger pen kiselei ru kibet. Bah Luj kikot os teros kitot Cemenak Senger ajeh. Cemenak Senger ajeh kijar loi imadeg ru ngej ru ideg dij. Bah Luj kijampik kenon menaleh Cemenak Senger jadik sengoi bernor.

Bah Luj ru mabek itenek najjeg kenon menaleh Cemenak Senger. Bah Luj kijeg ikenon de iluj tapik naisakik ya mabek itenek mende kenah Bah Luj kek paleng kemek. Telas nar tenem, mabek itenek naiha perdat Bah Luj tapik Bah Luj kipanei canuk mende kipasal ya igunik.

Bah Luj kispupah icog jadik ikenah begei kitaj sekek, igul jadik ilei begei kisahseh ru kenik kispupah buleh kibelwal kimanyol suarak ilei ru ikenah. Lienai naiserangik Bah Luj ru ikenah mong ku padeg bile naicerngai kenik kimayol suarak ubai. Bile mabek itenek naijerop ha cog naisergik ikenah lienai naiheg ha cog. Bile naipoh naisangkak Bah Luj panyak ya gul. Ipenyudah mabek itenek pek kep naiperdat Bah Luj. Bah Luj pen kidek ju kampug ajeh kianj ru ikenah.



1. Pileh nekate de sesuei kateh cerite ku kemil, beh ayat gunakan engrok penguat.
2. Besual jawab ha bekenaet cerite ku kemil kateh kumpolan.

Ektiviti

UNIT 14

Santuniloh Enai



Cerngai ru Belwal

Henulur Teg, Hayok Baneban



Ektiviti

1. Ma cuntoh de bor engkek ui?
2. Jijoi gambar de biog, beh lenakon reingkas ha bernor kiui ru og komen.

1.1.2
4.4.3



Wak Teratai: Perek Enai

“Eng senang cenen ru sengik eng betol-betol tesentoh bile ngneng enai de kateh nehajap. Kayat ajeh, eng ru memerip kawat an beusahe kek nong ha tulog enai.”



Berog tokloh entoi tapik isemangat rual biasak ui mai de kernal an kenjip. Muh Wak Teratai a/p Bah Arom tok aseng nu masarakat pasak pajeh. Senibok nujis sebegei ektivis masarakat nyiknyuk kenerlag ha elei perek masarakat de kateh hajap. Ilei kijeg ru Tan Yoke Ling ru hasel kenungsi sinui bekurnie nik urang cahaye mat iaajeh Tan James, Tan Jinesoan ru Tan Lilian. Igensir berupe penyukong de paleng kuat ju awal bai jekjeg ha teros bebakti nu masarakat.

Wak Teratai kiyos ku Batu 6, Jalan Pahang Tapah Perak ku 6 Januari 1981. Iasal ju kampug kimentok keperibadiana dirik

elei. Ileh kikep penedidik awal ku Sekolah Kebangsaan Batu Tujuh ku tahut 1988 lei 1993. Telas ajeh kicerot pelajaran nu Sekolah Menengah Kebangsaan Sri Tapah ku tahut 1994 lei 1998. Ilei kihod ubah isinui ru hod teros bejaye. Telas sekulah menengah, ilei kicerot nej pelajaran nu Universiti Teknologi Mara Sarawak (UiTM Sarawak) kibeh pradiploma ku tahut 1999. Ku UiTM Merbok ilei kicerot diploma seleneu nik tahun. Telas berajal, ilei kikerjak ku bank Tapah. Jiwak ilei lebeh nu bidang peneniage. Ilei kikit penutos de penteng de ru kibehenti kerjak ru kimulak peneniage lilei ru senukong igensir.

Kimulak ru peneniage ru kijadik peraih rah kibelik sempak ru ceber ju mai kampug. Secare beperinkat ilei ru igensir baikumpol modal ha naibukak kedei hardware. Selaen ajeh, ilei turot kibelik hasel yas mai kampug ru telas ajeh kijual nu pehak kuinik. Ku sampeng ajeh jugak, ilei ru kekawat mulak naiperek ru ektiviti kemasarakatan teutame kateh tenulog





mai hajap. Hasel sepatat besamak, enai naituboh pesatuan de beasas kebajikan.

Ilei kigemar bekungsi kenenjip de bekenat ektiviti kemasarakatan. Icuntoh, ilei na pernah kitulog mai engrak de kihidap nyaknik kencing manis. Ilei bekerjaksamak ru JAKOA ru Jabatan Kebajikan Masyarakat naiog benantuk ru senumbang ku mai engrak ajeh.

Selaen ajeh, ilei ru kekawat jugak turot naikumpol dana ha belik krusi ruda ha numom mai engrak de lumpoh. Jijoi iperingak, peksendok adeh mai engrak ajeh tepakse bibok amen kiet

deg teu. Senumbang de biog adeh kep kitulog de mai penerlu benantuk.

Wak Teratai jugak ektiv kateh soal Penedidek masarakat hik sengoi. Ilei senalo bijempot ha og ceramah ru mutivasi ku kekenon hik sengoi rah Sekolah Kebangsaan Batu Tujoh. Selaen ajeh, ilei jugak turot bekerjaksamak ru pejabat kesihatan bekenat isu malaria.

Wak Teratai kibeharap kekenon hik an teros naituntot lemu penanei ru beusahe naiubah tarap sinui. Walah usahe de jitu begei kapal walah mai kemudi.

Ilei jugak an teros bantuk masarakat hik sengoi de kiperlu benantuk. Ilei kikenjip tanggungjawab sosiel mongloh nanek newajip ru wajar bisemarak nej. Jijoi ilei, agokloh hik bantuk mende hihod ha muh, habuan ataopen pangkat tapik bantukloh ha senedar ku sengik.



Ektiviti

1. Bacak nepetek ku kemil ru ui serengkol de lenkap.
2. Beh nanek surat rasmi ha senmanj benantuk krusi ruda nu pejabat kebajikan hak tulog mai hajap.





Tanggongjawab hik

Amen hik serngik sinui hik hajap, ingatloh mong mai kilek nej de hajap. Sinui ku rual tokloh sebor de hik serngik mende mong masarakat de bitimpak ru bebegei masalah. Hik hodloh senalo besukor ru reski biog ya Nyenang. Selaen ajeh hik hodloh tulog mai hajap.



Ektiviti

1. Secare kumpolan, hurei nujap peranan ku kemil secare semiyak.
2. Engkek bigalak ha ui renujok bebegei bahan elektronik kateh penebincang.



Insan Istimewe

Piknoj jar bimakbol ya Nyenang. Telas sekian leu jar poj jarpen bikurnie numom cahaye mat. Sinui jar lenkap begei peringak kilek. Henadir Cris kiog cenerie ru kiui sengik jik bahagie. Cris begei kenon normal rah kenon mai kilek. Namun senangkak eng meleset.

Bile Cris beumor nutahut eng ngkenjip ikelakuk bebize ju kenon normal. Jap noh eng ngcereg imuh ilei langsung tok kiog respon mat. Bile iumor nik tahut, eng ngkenjip kelakuk ilei belawan ju irespon kiperneng. Icuntoh, bile kijap ilei kitepuk teg. Nyenang, ma ujian de Jun og nu jar adeh. Eng bebincang ru kenah eng ha rujok kenon nu hospital pakar ha diagnosis imasalah.



Telas memerip noh bidiagnosis seleneu nutahut, doktor pen kiperhol penutos. Doktor kiyap bahawe kenon eng *autism*. Bile kenah eng kicerngai penasal doktor ilei teros kieb kenon ru kijap. Eng panei kenah eng tok buleh kiterime hakikat.

Mase jeknug, kenah eng kigei sengek begei truma. Cris nej kibed selet ku ilempak iamek. Eng ngej kenah dek kiterimak tenentuk Nyenang.

“Yama hik senalo biuji bagei adeh?” engrok kenah eng begei kesal.

“Nyenang tok besalah kateh hal adeh. Anggaploh ma de belakuk adeh ujian ku har. Cris berupe kenon mengkah.” Eng ngkop teg kenah. Kicerngai engrok eng begei kiog nanek kengwat ku ilei.

“Tapik hei ... mase nungar kenon har begehharok?” kenah eng kitanyak nej.

“Tok ma ... hik didek ru hijagak ilei. Cris lekat mong imok, ibah ru ikej de naihok ilei,” balas eng.


Nyak ju sudut sengik eng ... eng kenjip sedeh ru ma de belakuk. Tapik ku ngar kenah, eng berencip sengik de sedeh. Seleneu adeh eng nglayan ru jagak kenon istimewa ku sekolah pendidikan khas ru haknuk. Eng ngkenang renis bah Usop ru Bah Nan de kijadik penyeri ku sekolah. Tapik tok sangkak pekare adeh belakuk ku peringak eng.

Lei ku deg eng ngangkit Cris nu bilek. Eng nggei ku ienglag. Eng ngsempur kui kenon eng. Selat bernor kenon eng kibet. “Tok ma Cris ... apak tetap an kijagak hek lei apak walah pigoidoh. Sengik eng sayu bile ngneng irenis,” tok eng ngsedar teu mat keral jot ku ming.




Ektiviti

1. Secare beregu, analisis unsor sastera de mong kateh cerpen ku kemil.
2. Ma tenindak de engkek kot amen engkek kateh jenim ajeh? Tules ku bob tules.





MAKNA Kiog Seribu Henarap



MAKNA

Majlis Kanser Nasional
National Cancer Council

Bile eng bidiagnosis positip kanser tahap nar, walah engrok de buleh ngucap ha gambar ku sengik adeh. Duniak eng begei lei ku imol sinui. Namun, naseb eng bor mende eng lekat mong henarap mende jeoi mai naiog senukong ku eng teutame peringak ru kekawat. Enai senalo naiog motivasi dek eng teros lawan nyaknik ajeh. Eng panei sinui mai nyaknyik adeh sukar mende nujap mase kikenjip susah sengik, emusi tegangguk ru jeoi mase biperdij nu hospital.

Eng lekat ngingat nej, nanek jis numon kawat eng kipecereg muh eng nu agensi MAKNA. Ku pajeh bemulak sinui eng ru MAKNA sebegei mai nyik ru hunen sebegei sukarelawan ektip.

Masa eng jadik sukarelawan MAKNA, eng ngngeng semangat rual biasak nenumom de buleh kikurban imase kaha tulog mai nyaknyik dek teros kilawan nyaknik de kihadapi. Eng ru kekawat ha ucap abor haknuk ku MAKNA atas senumbang de biog ru teros bebakti ku masarakat. MAKNA kinyate jugak jenaye kikumpol dana nyiknyukloh usahe nanek pehak tapi usahe besamak. Eng sukarelawan MAKNA, ha seru rimdij engkek dek besamak-samak og senumbang sambel bebakti.



Ektiviti

1. Kernal pasti engrok napi kateh nepetek ku kemil. Telas ajeh beh 10 ayat napi.
2. Senarei agensi de buleh engkek og senumbang selaen MAKNA?

UNIT 15

Neutame Senelamat Ku Belok Pen



Cerngai ru Belwal

Senelamat ku Tempat Kerjak

Peraturan Am Senelamat ku Tempat Kerjak

- Senalo kiog penerhati nu senelamat dirik ru kawat sekerjak
- Senalo jijoi protokol kerjak secare selamat
- Senalo patoh nu nearah secare sistematik
- Senalo bewaspade.



Paktor Penyumbang Kemalangan ku Tempat Kerjak

Tenindak pengurus senelamat	Keadaan mental pekerjak	Keadaan fizikal pekerjak
<ul style="list-style-type: none"> • Nearah tok lenkap • Peraturan tok bikuat kuase • Gek interaksi antare majikan ru pekerjak • Nealat pelindung tok biog ya majikan • Isu senelamat tok biuros ru bor 	<ul style="list-style-type: none"> • Gek senedar ha penenteng senelamat • Kelakuk de tok bor • Gek daye tenumpuk • Emusi tok stabil • Gej panik ru bernos 	<ul style="list-style-type: none"> • Selei • Kurang daye kicerngai • Sabor mat • Pizikal lemah • Dadat • Orang Kurang Upaya



Ektiviti

1. Analisis bahan ku kemil ru belwal ha bebegi isu senelamat ku tempat kerjak.
2. Bincang kateh kumpolan ru beh poster bekenaeet cirik-cirik penakei de selamat ku bengkel.



Tip Peksendok Himulak ceknip Nyak

Peksendok himulak ceknip nyak, engkek hodloh periksak tenenbot ha pasti ceknip jelos ru selamat. Berikot langkah hod hijoi peksendok himulak ceknip.



1. Engkek hodloh periksak rimdij tayar termuj tayar gantik. Hipasti tayar lekat bor ru tenekan tayar cukop.



2. Periksak senem pelincir ru gunakan tolok pengukur bisediak ku injin tenenbot.



3. Periksak tenegang cog kipas udare tenenbot engkek lekat bor.



4. Hik pasti teu peberseh cermin cukop termuj pengelap cermin kibepungsi ru bor.



5. Periksak jumlah senem brek, teu bateri ru bor.



6. Periksak jumlah ru keadaan teu pendingin kateh radiator cukop ru ipenutup radiator bor.



Ektiviti

1. Bacak bahan ku kemil ru olah maklumat kateh mentok peta minda de sesuei.
2. Jijoi maklumat ku kemil ru maklumat tenamah kilek beh kenarang betajak "Langkah-langkah perwir kemalangan nong entoi ku negara hik".



Menules

Langkah-langkah Hik Jagak Senelamat Mai Sayet ku Pabeg Deg

Kes peneculik mai sayet hunen gu serius ku negara hik. Nujap apak ru amek ubai kenjip susah sengik ha senelamat mai sayet teutame kekenon de mong ku pabeg deg. Amen mai sayet tok bikawal ya mai raknak, lienai mudah biculik ya penjenayah. Bile tejadik pekare rah adeh tok gunak hisesal nej mende canak na kijadik bubur. Mong bebegei langkah ha boleh bikot ha hijagak senelamat mai sayet.

Antare ilangkah ialoh hik hodloh senalo petiye kekenon hik ku tempat awam ha hiperwir belakuk peneculik atao pemerdagangan mai sayet. Apak ru amek bior senalo cap teg kekenon amen ku pabeg deg teutame ku kompleks beli-belah. Apak ru amek jugak hodloh baiperop kekenon bile lienai menman ku pabeg deg. Sebegei cuntoh, jeoi kes peneculik de belakuk ku negara hik bepunce ju sikap lalai apak ru amek ha adeh kiog peluang ku penjenayah ha kiculik mai sayet. Amen apak amek senalo ubai peka ju keadaan kerileng, kes peneculik pasti kep bipergek.



Selaen ajeh, peneculik ru pemerdagangan mai sayet jugak boleh bikerlak amen mai sayet senalo mong kateh kumpolan. Kes peneculik de senalo belakuk amen mai sayet mong ku pabeg deg kihalei. Apak amek jugak hodloh senalo naiog bingsat nu kekenon dek menman kateh kumpolan ku taman menman atao cekcip ru kekawat. Kes peneculik boleh belakuk ku belok-belok pen mende penjenayah senalo naipoj peluang de mong ha kiculik mai sayet de besikap senang pecayak ku bok-bok pen.

Ku sampeng ajeh, mai sayet jugak hodloh pelenkap dirik dek tok senang biculik ya penjenayah. Apak amek bior ngeng kekenon berajal seni penetahan dirik ku pusat-pusat pembelajaran seni petahan dirik. Adeh kep kijamen senelamat kekenon amen mong ku pabeg deg. Sebegei cuntoh, mai sayet de berajal seni petahan dirik naikep lindong dirik lienai.

Iserengkol, rimdij pehak hodloh bekerjaksamak rah awat ru terikbes. Masarakat naiman peranan masig-masig ha kibanteras jenayah rah adeh dek mai sayet naikep peteros ha henarap bangsak ku mase nungar.



Ektiviti

1. Bacak ru beh renumos *secare* betules jijoi bahan ke kemil.
2. Kernal pasti ayat topik kateh perenggan ku kemil.

3.1.2
5.5.1



Seni Engrok

Bei Belakon

Jenim 1

Han Nia kiman telipon. Ilei kigenmar cerngai laguk kateh telipon. Ilei tetap kiman telipon alau pen itelipon bicas. Iperingak senalo naimur kelakuk Han Nia de tok pernah kipikir bahaye man telipon amen bicas. Tapik ilei tetap kigaleh.

Jenim 2

Bah Abu ru ikekawat naigenmar man meskar. Ilei kiubah suei imeskar alaopen kipanei tenindak ajeh buleh kianj bahaye. Ilei jugak kigenmar belumbe meskar ru ikekawat ku nong entoi alaopen na bimur benoh-noh.

Jenim 3

Yok Kasan numom petani. Ilei numom de rajit kiusehe iselai ru an kiracut lalag ku selai nugecek nunoh. Tapik ilei genmar cackak sambel kiberacut. Ilei jugak tok kipakei pelindong dirik mase kiberacut rah jerengkop empag. Amen bimur ya kekawat Yok Kasan kibelal.


Jenim 4

Wak Sarita kigenmar cackak penglai herbe de bijual ku kedei-kedei jamuk. Alaopen penglai ajeh tok kep lenulos ju Kementerian Kesihatan. Selaen ajeh, Wak Sarita jugak genmar kidek ipenglai merate-rate tempat alaopen ilei mong imenang de lekat macot. Iamek senalo kimur kelakuk Wak Sarita tapik tok kipeduli.



1. Jijoi jenim ku kemil, pileh nanek jenim ru man peranan begehharok engkek buleh ej watak-watak ku kemil.
2. Jijoi bengwal kateh man peranan ru kekawat engkek, kernal pasti ayat eknej de bigunak ru catit.

Ektiviti



Tatamengwal

Genunak Bahan Kimia/ Racut Perusak Secare Selamat ru Bekesan



1

Senalo bacak label peksendok
gunak racut perusak.



2

Agok tehol muncung penyembur racut.
Gunak penyucuk amen nozel tesumbat.



3

Senalo dol racut perusak kateh stor de
bekunci nyak ju caknak ru mai jengoi.



4

Agok cakcak atao ngut amen
gunak racut perusak.



5

Gunak senukat de betol ru gunak
penakei pelindung.



6

Agok gunak bekas racut perusak ha
dol caknak atao teu.



7

Gunak penakei de bisyor ru agok
bisembor betentang pui.



8

Amen tekenak racut, cip gej
na kep perenglai.




Ektiviti

1. Jijoi maklumat ku kemil kernal pasti engrok peninyap ru engrok kerjak de mong.
2. Engkek berupe pegawai pertanian ru bisemanj hod og ceramah betajok "Care-care Genunak Racut de Betol." Beh henurei jijoi tajok de biog.



Kenukoh

Langkah- langkah Penecegah Teknod



6. Periksak pendawaian dek bor ru gunak produk letrik de kep lenulos SIRIM.

5. Amen belakuk cog gas teluh bukak tinkap ru pintuk.

1. Hipasti wal gas bitutop telas bigunak ru senalo periksak cog gas.

4. Dek gures ku balig ru pernyak bahan mudah teknod ju sayet.

2. Agok beh senambong lebeh nunanek *plug*.

3. Hipasti dek alat perenled os kateh deg.



Ektiviti

Jijoi maklumat ku kemil, perlei sarahan ru yaken ru betatasusila.


UNIT 16

Aktip Dirik Hik



Cerngai ru Belwal

Senaman Renis



Sebot empat kalik hurop
AEIOU



Sebot empat kalik hurop
X ru O



Sebot empat kalik suku engrok
MA ME MI MO MU



Ektiviti

1. Jijoi gambar ku kemil, kot masa engkek limak minit beh generak senaman renis joi cikgu engkek ru og respon engkek.
2. Ru gunakan menudah Internet, kek ru catat maklumat bekenaeat senaman de mudah bibeh kateh mentok jadual.



Yoga

Yoga nanek istilah de sinonim ru gaye senaman kibeparik minda. Ku mase hunen, yoga gu popular ru kiog bebegei manpaat nu pengamal senaman adeh. Jijoi *Kamus Dewan Edisi Keempat*, yoga ialoh sistem palsafah Hindu de betenujuk kipesatu dirik ru Nyenang ru care kibeparik minda ju senaman gerak berog ru hik beserangik. Hunen, senaman adeh tok tebatas nu kaom tetentuk tapik bebegei kaom naiamal senaman adeh kemil paktor senihat, tenenang ru terapi jiwak. Antare generak yoga de boleh hibeh ku padeg walah hiet nu kelas.



1. Sukhasana

Generak giknei de betol mongloh gei besile ru posisi berog tegap, teg ku kurul, enteh nu depan, kui biangkit ku kemil ru hod tenang. Generak adeh betenujuk ha pekuat otot ru petenang berog.



2. Natarajasana

Ha beh generak adeh, kot posisi de betol ru bukak jug. Angkit jug kentop nu kemil megadap nu kenog lei kimentok sudut 45 darjah ru teg kengtop kicap jug kengtop ajeh. Jinjeg ru jug kengwil ru angkit teg kengwil nu ngar. Generak adeh kibantuk kiregang berog bahgian depan rah gelpal, ked, enteh ru sangkil.



3. Balasana

Beh generak adeh, hod gei bekurul ru kop berog nungar lei lempa ru kui kikenan ku lantei. Hulur teg nungar ru kirak memerip minit. Perbet mat ru tarek lehem kateh-kateh tahan seleneu nar minit, generak adeh kilateh hipelehem ru renegang sangkil ru lempa.



4. Matsyasana

Generak adeh had begunak ha lateh otot sangkil ru kibantuk kiperlai cenedera ku otot sangkil. Generak adeh hod hidak papah, jug hod terhan ru sangkil hod angkit. Teg kengwil ru kengtop hod dek ku beg berog. Generak adeh penteng kibantuk tergak postur jeag.



Ektiviti

1. Bacak ru olah maklumat ku kemil kateh mentok risalah.
2. Ru gunakan menudah Internet, kek generak yoga de kilek ru beh bob skrap.



Menules

KARNIVAL SUKAN RAKYAT

TAREH: 14 & 15 JUN 20



- ACARE:**
1. TEKNAJ TEMPOK
 2. TEKNAJ PELOG BELTOP
 3. MENNAN CEK RIKNOJ
 4. PEKNUT
 5. KASOT SEBOK
 6. TAREK COG
 7. HUJ CENOL SELEJ

BELTIBAK AJENGOI

HADIAH LUMAYAN

NEANJOR:
Persatuan
Kampung Gelpet



1. Neng poster ku kemil, cerlah maklumat de engkek kep kateh mentok isik tesirat ru tesurat secare bekumpolan.
2. Bentang ku kateh kelas hasel penebincang ru besual jawab ru kumpolan kilek.

Ektiviti

3.1.1
1.2.2



Sukan Aspirasi Negara

Gagah beranik kaler bendera,
Identiti Sarawak Bumik Kenyalang;
Sukan wadah aspirasi negara,
Kiberkus modal insan cemerlang.

Biarloh gagal tok putos ase,
Senalo bealah kerlak bitindas;
Jadikloh sukan nanek budaye,
Kiperyos rakyat sehat ru cerdas.

Pileh pemimpen sebegei wenares,
Nengloh remaje ku mase hunen;
Ibernor sukan nu rimdij lenapes,
Sinui beceti kiog yenaken.

Rimdij masarakat man peranan,
Ujud budaye neunik identiti;
Pupokloh ku dirik minat besukan,
Jadik landasan ha sinui bekualiti.

Remaje bewawasan gah ku pesada,
Jadik pembimbeng ru kawat sebaye;
Sukan kibantuk memajuk negara,
Kijane ekonomi bukti jenaye.

Berajal lenipat teknoj tempok,
Wenares mai hik teros hiteraju;
Penepadu masarakat mampuk bimentok,
Demi sukan rakyat besatu bepadu.

Adat manah tulah ru terlaj,
Jadik bingsat engrok mai engrak;
Tinkat senedar semangat tok kilaj,
Perhuj sukan negara ku mat duniak.



Ektiviti

1. Secare bergu, ulas ceti pantut ku kemil ru bentang kateh kelas.
2. Jijoi ceti pantut ku kemil, og pendapat engkek:
 - a) Yama sukan penteng kilibat mureb-mureb?
 - b) Begeiharok care ha her minat mureb kateh sukan?
 - c) Ma paedah hik kep amen hilibat dirik kateh sukan?



Tatamengwal

Tips Kekal Sehat

Nujap mai naihod sinui de sehat ru kekal cergas. Gaye sinui sehat penteng biamal ha perwir risiko hidap nyaknik de bebahaye ru kekal awet mude. Antare petue de boleh hiamal mongloh ngut jeoi teu kusong. Hik hodloh ngut teu kusong paleng gek lapan gelas. Teu kusong mampuk kilancar sistem penehandam.

Selaen ajeh, agok ngut ngeknut ceet ru kafein. Ngeknut adeh mong kenadung gulak de lasik ru pek bor ha senihat berog. Amen hik kot benelebeh an kikayat diabetes, huj nyaneh berog ru risiko hikep nyaknik de kilek-kilek nej.

Beknet de cukop jugak penteng ha pasti sinui sehat. Namun, hod ingat ga bet telebeh mase atao gek mase. Adeh mende tenage ru imunisasi berog an selei amen tok bijagak ru care de betol. Hamaka, hik hodloh bukbet selenue lapan jam.

Caknak de seimbang berupe kunci sinui sehat. Cak lebeh senubai ru pelek. Wes cak caknak de lasik kalori ru cak joi penerlu tuboh berog hik. Hik hodloh hijoi saranan Kementerian Kesihatan Malaysia cak jijoi piramid caknak. Neamal suku-suku engleg had bor ha pasti hik tok telebeh cakkak.

Ku sampeng ajeh, hik hodloh rajit besenam atao besukan seleneu 30 menit nujap jis. Adeh mende ha pekekal tuboh berog de sehat, hik hodloh perhol sengep ha pekekal tenage nujis ru pekuat stamina.

Iserengkol, sesibok belok pen hik, penejagak senehat hodloh kijadik neutame. Nujap mai kiharap isinui senalo sehat ru bipernyak ju nyaknik de bebahaye. Hamaka sahutloh cenabar dek kekal sehat ru hiamal gaye sinui sehat.



1. Jijoi nepetek ku kemil kernal pasti engrok perintah ru beh ayat.
2. Jijoi nepetek ku kemil, beh renumos de lenkap.

Ektiviti

5.1.2
5.5.3



Kenukoh

Joging bor ha Senihat

kipekuat otot

kiransang kelop

kipetinkat daye tahan kardiovaskular

beknet lebeh bor

lebeh segar ru betenage

kipekuat jeag



Bincang kateh kumpolan ibernor senaman joging ru beh neulas.

Ektiviti

UNIT 17

Kenepimpen



Cerngai ru Belwal

Rakit Jenaye



Nearah:

1. Cikgu kicerlah mureb nu memerip kumpolan.
2. Nujap kumpolan biog nu helei pipe ru nailai ku lantei.
3. Cikgu kiog nearah nujuap kumpolan dek naigunak kreativiti masig-masig jingjeg kemil pipe seleneu 15 saat.
4. Kumpolan de tok kilaksane tenugas atao iahli kihol ju pipe bianggap alah.
5. Kumpolan menang an teros mennan ru pipe bilipat nar atao benoh-noh lei kep nanek pemenang.



Ektiviti

1. Og peniker engkek, ma engkek kep ju ektiviti kemil?
2. Ketua berupe individu de kitentuk jenaye nu nanek organisasi. Bincang ru tules kateh bob.

1.4.3
3.1.3



Mentok Nilei Kenepimpen Remaje



De berusaha benares hakim de bijaksane, benares guru-guru de bihurmati ru kekawat sepenejuang. Bor huper eng ngucap.

Hadirin de bihurmat,

Belie hunen berupe pemimpen negara pigoidoh. Namun gikjeh, remaje de berupe tunjang negara lekat bibelenggu ya bebegei kemelut sosial. Jijoi engrok mutiare “amen hik hod neng mase nu ngar, nengloh remaje ku jis adeh. Ipenesoal, ma cirik-cirik de perlu mong nu remaje ha jadik pemimpen nu mase nungar?

Cirik utame ha jadik pemimpen hodloh mong iltizam de lasik. Remaje hodloh berajal besunggoh-sunggoh ha capei cenemerlang kateh aspek akademik. Cenemerlang akademik berupe salah nanek elemen ha mentok remaje de bekualiti demi penenteng negara. Senehubong ajeh, remaje hodloh proaktip naitimbe lemu nyiknyuk taleh kateh kelas tapik naituntot rimdij lemu penanei. Hamaka, amen tiktok remaje bijak panei penebangun negara an tebantot.

Ku sampeng ajeh, remaje hodloh beetika ru besahsiah mulie. Penatoh de tegoh nu neajar nyenang hodloh mong kateh dirik dek kijadik benteng kuat. Cirik adeh penteng ha remaje naijagak henubong ru Maha Pecipte dek sinui biberkati. Jijoi care adeh jugak, remaje tok an tepengaroh ru cenelaru masalah sosial de buleh naicemar muh bor negara. Secare tok langsung disiplin an tementok kateh dirik remaje.

Selaen ajeh, cirik kretip ru inovasi jugak hod bititik nyeh ya remaje ha naipacu penebangun negara. Semangat inkuri de lasik hodloh bipupok secare beteneros ju alam sekulah rendah nej. Hal adeh mende, had enai de beranik bekretip kep kicapei jenaye. Icountoh, numom remaje ju Nepal na kicipte nanek panel solar ju sog sengoi ha selese masalah tenage ku ikampug de walah akses ku benekal karen. Jijoi idie adeh, ilei ru benantuk kekawat naiberkus solar sog sengoi de mampuk kijane 18 watt tenage de cukop ha cas telepon. Justeru ajeh, penebangun negara an tecapei amen remaje mong benares pelapes de kretip ru inovasi.

Seteros nej, remaje hodloh naikekal jati dirik sebegei rakyat Malaysia. Hik rimdij sediak panei, jaman hunen serba-serbi jeoi bebegei budaya kerileng de kimentok kelakuk remaje. Jijoi jati dirik de kuat, remaje kep naitulak budaya negatip ru naipetahan nilei-nilei ketimuran. Rah engrok peribahase, **ku belok bumik bijag, ku pajeh rahuk bigulab.**

Iserengkol, aspek-aspek ku kemil hodloh remaje naipraktik kateh sinui. Remaje hodlah bipupok, bibimbeng ru bididek ru nilei-nilei positip. Tok mustahil nanek jis pigoidoh Malaysia an sebares ru negara majuk ru gah ku pentas antarebangsak.



Ektiviti

1. Bacak nepetek ku kemil ru og penandang isu ku kemil.
2. Og idie care-care ha pupok sinui de positif kenalag remaje.





Pemimpin Biperyos atao Bimentok?



Pemimpin berupe individu de buleh kiog pengaruh ku individu kilek kateh penetuboh, organisasi ataopen komuniti.

Kenepimpen kirujok neujud pemimpen kateh organisasi de mong struktur lilei ru ujud henubong pemimpen ru mai jijoi ha capei matlamat.

Penebize ketue ru pemimpen



1. Bincang ru og penandang ha gambar ku kemil ru tules kateh bob.
2. Bahas isu ku kemil kateh mentok porum.

Ektiviti

3.4.3
1.2.3



Anugerah Kenepimpen Mureb

Jam kiternyul pukul dua berkes, benares pentadber ru ketue bidang naipoj tenibak Tuan Pengetua nu mesuarat peneuros ajeh. Sementare naipoj tenibak Tuan Pengetua, Penolong Kanan Pentadbiran, Cikgu Man lekat sempat kiui penesiap bahan penebentang. Tok leu ju kenjeh, Tuan Pengetua pen kimuj nu bilek gerakan. Ilei teros kipengerusi mesyuarat ajeh.

Telas Tuan Pengetua kiog engrok nealu, memerip agenda bibincang ru naiminit tenindak.

Lei ku agenda penyudah, lei giliran Cikgu Man kibentang senarei muh penerime Anugerah Kenepimpen Mureb.

“Eng teros ru pekare utame. Hasel penebincang rimdij cikgu-cikgu sekolah hik, mong nik urag mureb layak bicalon sebegei penerimak Anugerah Kepimpinan Mureb. Nik-nik mureb adeh mong lenebeh lienai ju segik akademik, kokurikulum ru sahsiah,” Cikgu Man kimulak itaklimat. Tuan Pengetua kidengoh ikui. Imat tetumpuk nu penepapar biyek.

“Calon petame ialoh Bah Rizal a/l Bah Til ju kelas 5 Alpha, keputusan peperiksaan petengahan tahut Bah Rizal bor ru kikep 7A. Ju segik kokurikulum, Bah Rizal pernah kiwakel lengrik ru daerah kateh sukan sepak takraw. Berpewatakan cerie ru bigenmar ya ikekawat.”

“Calon kuinar ialoh Wak Ita a/p Bah Nik ju kelas 5 Alpha jugak, keputusan peperiksaan petengahan tahut kikep 7A. Ju segik kokurikulum, Wak Ita berupe mureb de aktip kateh penebahas perinkat lengrik ru daerah. Bepewatakan tegas ru bisenang ya cikgu-cikgu ru ikekawat.

“Calon kuinik nej Bah Ateng a/l Bah Ni ju kelas 5 Progresif, keputusan peperiksaan petengahan tahut kikep 7A. Ju segik kokurikulum nej, kiwakel lengrik ru daerah kateh kejohanan *softball*. Aktip kateh pesatuan ku sekolah. Ilei jugak pai biperhuj pangkat sebegei Staf Sarjan KRS daerah,” bentang Cikgu Man.

“Lenebeh calon lebeh kurang samak. Penutos tok boleh ui ratah. Begeiharok penandang Cikgu Ali ru Cikgu Muna?” Pengetua kitanyak sensual ku Penolong Kanan Hal Ehwal Murid ru Penolong Kanan Kokurikulum.

“Eng pen tok boleh ui penutos. Hik hodloh mong hujah kukoh ha pilih calon de layak dek tok ujud petikai ju pehak kilek. Mong cikgu Man neng ju segik henadir nu sekolah?” Cikgu Ali kitanyak Cikgu Man. Cikgu Man kiog isarat tiktok.


“Betol ma bibual ajeh. Hik hodloh mong hujah. Boleh cikgu-cikgu semak nej maklumat tenamah kilek de boleh hik jadik jehuk pengukor de kukoh. Cikgu jugak boleh rujok guru kelas atao guru penasihat,” tegas Tuan Pengetua. Benares pentadber ru ketue bidang naipaham.

“Hik jumpak nar jis nej ku bilek eng,” Tuan Pengetua kiperdij neucap kateh mesuarat.



1. Bacak cerpen ku kemil ru besual jawap.
2. Secare beregu, bincang ru og penutos bok engkek pilih ru yama?

Ektiviti



Tatamengwal

Pingat Lasik Persekutuan



- Bah Daan: Ma igah encik? Bor huper.
 Ramli: Gah Bor. Ma igah jugak. Selamat tibak nu ruang penejuang negara. Eng Ramli, kurator ku muzium adeh.
- Bah Daan: Eng Bah Daan, adeh Bah Tuyut. Jar ju Sekolah Menengah Kebangsaan Sri Tapah.
 Ramli: Ooh, engkek mesti ju renumbong sekolah. Jis adeh muzium terimak 10 kenunjong ju sekolah. Jik mimang alu-alu henader engkek kateh semarak nej ektiviti muzium.
- Bah Daan: Wah? Ibernor pingat adeh. Boleh jun cerita bekenae pingat adeh kepada Wah, ibernor pingat adeh! Boleh jun cerite bekenae pingat adeh?
 Ramli: Adeh Pingat Seri Pahlawan Gagah Perkasa atao seningkat S.P Bintang Kehormat adeh berupe anugerah de lasik ru birel kentop kateh senarei Anugerah Persekutuan. Pingat adeh bikurnie ku nenumom de kiperneng iberanik rual biasak, gagah beranik serte penoh penekurban. Pingat adeh bizahir ku 29 Julai 1960 ru biwarta ku 11 Ogos 1960. Giknei pingat adeh lebeh lasik ju Darjah Kerabat Diraja Malaysia.
- Bah Tuyut: Bok penerime petame?
 Ramli: Penerime petame Pingat Seri Pahlawan Gagah Perkasa monglah mendiang Vello a/l Rajavelu ku tahut 1963. Ilei bianugerah mende kiperneng iberanik ru semangat kemasarakatan kateh kibanteras renompak ku Klang ku Ogos 1962 lei kiragot inyawak.
- Bah Daan: Adeh pingat ma nej ya?
 Ramli: Adeh nej Pingat Panglima Gagah Berani atao seningkat P.G.B. Pingat adeh mongloh pingat keberanian nunar de lasik kateh senarei Pingat Keberanian Persekutuan. Pingat adeh bizahir ku 29 Julai 1960 ru biwarta ku 11 Ogos 1960. Pingat adeh boleh bianugerah amen penerime kidat.
- Bah Tuyut: Bok penerime petame?
 Ramli: Antare penerimak Pingat Panglima Gagah Berani petame mongloh YBhg. Leftenan (B) Datuk Abdul Rahman bin Haji Khamis ku tahut 1958. Ilei bikurnia pingat adeh mende keberanian ru cenempet rual biasak kateh operasi kilawan geniat komunis sekitar tahut 1957.
- Bah Tuyut: Wah, mesti enai kenjip megah bile kep pingat adeh!
 Ramli: Oh, mimang kenjip megah. Kenalag hik sengoi pen mong naikep jugak.
- Bah Daan: Bok ya?
 Ramli: Jerkek hod kek nok maklumat ajeh kateh muzium adeh ku bahgian mai sengoi hik bejaye. Telas kep maklumat, tibak nu madeh nej. Eng mong hadiah ha jerkek hehehe.
- Bah Tuyut: Hadiah! Boleh-boleh, jar cip kek nok. Encik Ramli poj ya ... agok jar ya hehehe.
 Ramli: Ok, eng poj.



1. Kernal pasti engrok ganti muh kateh nepetek ru beh dailog patik gunakan gantik muh ajeh.

Ektiviti

2. Beh nanek kenarang ru permuj peribahase de sesuei bekenae keberanian.



Kenukoh

Gaye Kenepimpen

1

Gaye Kenepimpen Autokratik

Pemimpen de kigunak kuasak secare mutlak. Antere pemimpen dunia mong gaye kenepimpen rah Hitler, Napoleon ru Bismarck.

2

Gaye Kenepimpen Demokrasi

Pemimpen kiui penutos secare penesetuju besamak ahli.

3

Gaye Kenepimpen Laissez-Faire (benebas)

Benebas sepenoh ku ahli kateh ui tenugas enai.



Ektiviti

Beh kumpolan ru beh lenakon jijo
gaye kenepimpen ku kemil.

UNIT 18

Jenaye Kijadik Benanggak



Cerngai ru Belwal

Jenaye Sumber Inspirasi



Aimi a/p Mahad
Pelajar Terbaik STPM 2019
kategori Orang Asli
(PNGK 4.0)



Sufiza a/p Majid
Pelajar Cemerlang SPM 2017
(9A)



Suraya a/p Sepit
Pelajar Terbaik STPM 2016
kategori Orang Asli
(PNGK 3.58)



Aleena Suhada Amani Williams Hunt
Pelajar Terbaik Keseluruhan SPM 2016
kategori Orang Asli



Ektiviti

1. Jijoi gambar ku kemil, og cenadang ru pejelas secare spuntan begehharok engkek buleh ha capei jenaye rah lienai?
2. Bincang kateh kumpolan, ma penesediak de hodloh engkek beh peksendok peperiksaan Sijil Pelajaran Malaysia (SPM)?



Gasur Kana Seniman Mai Hik



Sebot taleh muh Gasur Kana, jengoi de kernal teutame katehkenalag mai hik sengoi ku lengrik Perak. Ilei tekenal ru lenukes de hebat ru bor. Gasur Kana berupe muh pena ilei. Muh sebenar ilei ialoh Pandak a/l Kana. Ilei berupe mai Semai de beasal ju Kampung Sungai Galah, Tanjung Tualang, Perak. Gasur Kana kikep penedidik ju tingkatan 1 lei tingkatan 5 ku Sekolah Menengah Hamid Khan, Tapah (tahut 1969 lei tahut 1973). Ilei pernah behidmat sebegei Pembantu Luar ru Pegawai Luar Jabatan Hal Ehwal Orang Asli (JHEOA) ju tahut 1974 lei tahut 1990.

Gasur Kana berajal asas seni lukes mase ku sekolah rendah ru sekolah menengah. Ilei kihasel lenukes rah potret, pemandangan, ilustrasi ku bob-bob ru mural. Lenukes potret ru pemandangan boleh bitempah ru ilei ku Facebook ru WhatsApp. Antare potret de pernah kilukes ialoh potret Tun Dr. Mahathir Mohamad, potret Duli Yang Maha Mulia Sultan Perak ru Permaisuri, potret Tan Sri Muhyiddin Yassin, potret Dato' Sri Ismail Sabri Yaakob, potret Menteri Besar Perak, Dato Sri Zambri Abdul Kadir ru Dato' Sri Faizal Azumu ru kekilek. Ilei jugak na kihasel lenukes mural rah mural ku Dewan Methodist School, Kampar, mural ku Taman Rekreasi Kampung Timah New Village, mural ku Pusat Kesihatan Kecil Chenderong Kelubi, Tadika Kampung Chenderong Kelubi, Tadika Kemas Kampung Tangkai Cermin ru kekilek. Lenukes ilustrasi de na kibeh ialoh ku bob *Animal Tales* karya Dr. Lim Boo Liat, novel *Hamba'* karya Akiya, bob *Bah Luj* tenerbit UPSI ru jeoi nej.

Jenaye de had beceti nu Gasur Kana ialoh bile ilei bipelawe beh penamer ku Annexe Gallery, Central Market seleneu numingguk ku tahut 2010. Bengsat ilei nu mai hik hunen, hik hodloh beusahe agok meoh kateh ma pen bidang de hik hod cebori. Tuntutloh lemu penanei mende usahe ajeh rangkal jenaye, amen gagal nunoh nyiknyukloh gagal ditechjeh. Ilei jugak kibeharap mai nyennyam hunen teros beusahe ha capei jenaye ru hodloh beubah agok hik beharap nu naseb taleh.



1. Bacak maklumat ku kemil ru beh renumos jijoi neutame.
2. Jijoi peniker engkek, ma sipat-sipat de hodloh hik amal amen hik hod bejaye kateh bidang seni rah Gasur Kana?

Ektiviti



Pengurus Ladang de Bejaye

Muh eng ialoh Khairul Anuar Bin Aseh ru eng ju suku kaom Jakun. Eng beasal ju Kampung Orang Asli Gedung Siam, Kuantan, Pahang. Telas dij tingkatan limak ru kep keputosan de bor kateh peperiksaan Sijil Pelajaran Malaysia (SPM), eng bejaye lanjot pelajaran ku Universiti Teknologi Mara (UiTM) ku Jengka, Pahang kateh bidang Diploma Industri Perladangan dan Pengurusan. Telas ajeh, eng cerot nej pelajaran ku Universiti Teknologi Mara, Shah Alam kateh bidang Ijazah Teknologi Perladangan dan Pengurusan.



Dij taleh berajal, eng mulak behidmat sebegei Pembantu Pengurus ku Syarikat Boastead Holding Berhad, Trong, Perak ju tahut 2008 lei tahut 2010. Telas ajeh eng behidmat ku Felda Plantation Sdn. Bhd. Kuala Lipis, Pahang ju tahut 2010 lei tahut 2013 ru ku Tradewind Plantation Berhad, Daro, Sarawak ju tahut 2014 lei tahut 2016. Ku tahut 2017, eng behidmat pulak ku Syarikat Golden Palm Grower Bhd, Gua Musang sebegei Pengurus Bahagian. Ju tahut 2018 lei hunen, eng behidmat sebegei Pengurus Perkhidmatan Agronomi ku syarikat Virgin Greens X Sdn. Bhd., Petaling Jaya, Selangor.

Yama eng beminat kateh bidang peneuros ladang adeh? Apak ru amek eng berupe petani jadik eng mimang na biasak kateh bidang penetani. Bekerjak kateh bidang adeh kiog eng berajal ha bidang penetani de moden de boleh kiog hik peluang ha berkep berengkep de lumayan. Selaen ajeh, behidmat kateh bidang peneuros ladang adeh kiog peluang nu eng ha bekerjak nu jeoi tempat ru kiog kenenjip de bor. Jengoi mai nyennyam hunen tok naibeminat ha cebori bidang adeh mende naibeanggap bidang adeh kerjak susah ru tepaksak kerjak ku was beket. Ku eng, amen hik cebori bidang adeh, hik kep timba lemu penanei de boleh hik gunakan amen hihod beh ladang lihik.

Antare tugas eng sebegei pengurus ladang ialoh eng bertanggungjawab ha rancang, laksana ru kawal rimdij ektiviti-ektiviti ku was ladang jijoi penandu sarikat. Selaen ajeh, eng jugak ha uros penebelanjak ru kakitangan ha capei produktiviti de optimum. Eng jugak ha pantau pekerjak ru pelawat mong akses nu ladang. Henarap eng, semoge lebeh jeoi mai nyennyam hik de beminat cebori kateh bidang adeh. Bidang adeh kiog kenenjip ha uros ladang, care-care belwal nu mai kilek ru hik kep berajal care-care ha uros peneniage bekenae penetani.



Ektiviti

1. Jijoi maklumat ku kemil, hurei isik-isik penteng secare betules.
2. Jijoi bahan de biog, og cenadang ru pejelas secare spuntan, begehharok bidang penetani boleh kiog hik berengkep de lumayan?



Seni Engrok



AUDIO 12

Kicapei Perloi

Nujap sengoi mong neimpi
Hod capei jenaye kateh sinui
Bebegei usahe hodloh bibeh
Dek an tecapei rimdij neimpi.

Sipat petame amen hod bejaye
Agokloh hik gej beputos ase
Agokloh jugak hik gej bealah
Hodloh tekad nus tok merana.

Sipat kuinar hodloh hik gigih
Agokloh hik senalo telalei
Og tenumpuk kateh krenjak
Dek jenaye hikep tecapei.


Sipat kuinik yakin nu dirik
Pecayak ru neupaye lihik
Hodloh hipanei bor ru niknej
Agok jugak gej beubah sengik.

Sipat kuiempat hodloh beranik
Agok hik sengoh nu genagal
Genagal kiog kenenjip nu hik
Amen hik gagal terosloh hikus.

(Diadaptasi ju laguk *Seloke Pak Pandir*)



1. Bacak seloke ku kemil. Bincang ru hurei ceti tesurat ru tesirat kateh seloka ajeh.
2. Jijoi peniker engkek, ma sipat-sipat de kilek hodloh hiamal amen hihod jadik sengoi bejaye?



Peranan Apak ru Amek Kateh Naibantuk Pencapei Cemerlang Kekenon kateh Pelajaran

Apak ru amek berupe sengoi de kiman peranan penteng kateh peringak. Kekenon mimang naihod benantuk ru senukong apak ru amek ha naicapei jenaye kateh pelajaran. Apak ru amek naigulap tanggungjawab de entoi kateh naipasti jenaye mase nungar kekenon. Penehati de serius hodloh apak ru amek baiog dek kekenon tok tecicir kateh bidang pelajaran. Ma usaha-usahe de hodloh bibeh ya apak ru amek ha naibantuk kekenon ha capei jenaye de cemerlang kateh pelajaran?

Peranan petame de boleh biman ya apak ru amek ha bantuan kekenon ha capei jenaye cemerlang kateh pelajaran ialoh apak ru amek hodloh naimentok jenim de aman ru bor kateh peringak. Sipat haknuk, betulak ansor ru saleng paham kateh peringak kep kijamen kekenon sui ru selamat ru sehat. Sinui de bor ru bahagie ru walah masalah kateh peringak kikayat kekenon naikep berajal kateh jenim de harmoni. Adeh an kibantuk kekenon naicapei jenaye de cemerlang kateh pelajaran.

Selaen ajeh, apak ru amek jugak hodloh senalo petiye kelakuk kekenon ru kekawat. Henubong kekenon ru kekawat kiog pengaroh de entoi kateh sinui nuranis ru mase nungar lienai. Kekenon naigej tepengaroh ya kekawat ru lienai mudah percayak nu kekawat ju apak ru amek lei naisusah ha bize pekare de bor atao niknej. Amen kekenon bekawat ru kekawat de bemasalah, adeh kikayat kekenon tok beminat berajal. Ya ajeh, apak ru amek hodloh senalo naipetiye bok kekawat ikenon dek naikep peryos kekenon de cemerlang kateh pelajaran.

Ku sampeng ajeh, apak ru amek jugak hodloh naisediak menudah de lenkap ha kekenon berajal dek kekenon naikep og tenumpuk nu pelajaran. Apak ru amek jugak hodloh naiog motivasi ru senukong nu kekenon ha berajal. Kateh hal adeh, apak ru amek kijadiak cuntoh teladan de bor. Amen mampuk, apak ru amek jugak hodloh naingeng kekenon ku kelas tenamah ru sediak bob-bob renujuk dek kekenon naikep beh ulang kaji pelajaran ku padeg. Ya ajeh, kekenon an mong senedar ha penenteng lemu penanei kateh sinui lei lienai an beusahe ha capei keputosan cemerlang kateh pelajaran.

Tenamah nej, apak ru amek hodloh senalo bebincang ru behubong ru pitak sekolah ha masalah kekenon. Usaha adeh penteng mende amen kekenon mong masalah kateh pelajaran atao masalah disiplin, masalah ajeh kep biselese ru gej. Apak ru amek jugak hodloh naicerngai amen kekenon naipasal masalah. Masalah ru kenjip sedeh kekenon hodloh bikungsi besamak. Kekenon de senalo naidek masalah, lienai tok kep og tenumpuk kateh pelajaran. Ya ajeh, pintaanloh apak ru amek hodloh naikot nyeh ha masalah kekenon ru senalo bebincang ru guru-guru dek kekenon naikep tenumpuk kateh pelajaran.


Jijoi penebincang ku kemil, kepluh bibeh serengkol iaajeh apak ru amek menman peranan de penteng ha bantuan kekenon kateh naicapei jenaye de cemerlang. Peranan apak ru amek ajehloh kicorak ru penentuk mase nungar cemerlang kekenon kateh bidang pelajaran.



1. Jijoi bahan ku kemil, kernal pasti engrok bantuan ru engrok penegas de mong. Beh ayat gunakan engrok bantuan ru engrok penegas de engkek kep.

Ektiviti


2. Kateh kumpolan, kernal pasti ayat topik kateh perenggan ku kemil.





Kenukoh

Teliti bahan ku kerop ru hurei pendapat engkek ha cirik-cirik mai bejaye ru gunakan ayat de gramatis.



UNIT 19

Inspirasi



Cerngai ru Belwal

Idola Eng

Ku tareh 8 Januari 1984 yos nuurag permate nus hasel kenungsi sinui antare Encik Bah Kajang ru Puan Wak Disi iaajeh Kamizar a/p Bah Kajang atao lebeh mesre bicereg Wak Adek. Ilei kiyos ku Batu 8, Jalan Pahang, Perak. Ilei berupe kenon kuinik ju limak urag tenek menang. Kamizar Bah Kajang kimulak penesekulah darjah 1 ku Sekolah Rendah Kebangsaan Kroh, Pengkalan Hulu loi darjah 6. Telas ajeh kicerot nej penesekulah Tingkatan 1 loi Tingkatan 5 ku Sekolah Menengah Kebangsaan Pengkalan Hulu. Iseteros ilei kicerot ipelajaran ku perinkat de lebeh lasik ku Universiti Teknologi Mara kateh bidang Diploma Pentadbiran Awam ru Ijazah Sarjana Muda Sains Pentadbiran Awam.



Walah usaha de gige tok mungken nuurag ajeh an bejaye. Palsafah sinui de kicap ceknip beribuk batuk bemulak ru langkah petame berupe kunci utame ijenaye. Hasel tenekun ru berkat doa apak amek Kamizar na kilalui rimdij peperiksaan ru kikep keputusan de had bor. Kamizar Bah Kajang na kikep keputusan de cemerlang kateh peperiksaan bemulak ju Ujian Penilaian Sekolah Rendah kikep 3A 1B, Penilaian Menengah Rendah kikep 2A 5B, Sijil Pelajaran Malaysia kikep 3A 4B 1D, Diploma Pentadbiran Awam kikep CGPA 3.51 ru Ijazah Sarjana Muda Sains Pentadbiran Awam kikep CGPA 3.40.

Kamizar Bah Kajang pernah kijawat jenawat Pegawai Kebajikan Masyarakat Daerah ku Pejabat Kebajikan Masyarakat Daerah Hulu Perak. Ilei kibetugas ju Julai 2008 loi Februari 2015. Telas ajeh kikep tukar nej ru kijawat jenawat Penolong Pengarah ku Jabatan Hal Ehwal Veteran Angkatan Tentera Malaysia ju Mac 2015 lei 2017. Hunen Kamizar Bah Kajang kijawat jenawat sebegi Penolong Setiausaha ku Kementerian Pembangunan Wanita, Keluarga dan Masyarakat ju Jun 2017.

Sebegi Penolong Setiausaha ku Kementerian Pembangunan Wanita, Keluarga dan Masyarakat bidang tugas ilei hunen mongloh kibantuk ru kipantau penelaksana progrem kerjaksamak strategik ru kibantuk kiselaras jenalen kerjaksamak besamak rakan strategik kementerian. Penewatak ilei de cerie, komited, dedikasi ru bertanggungjawab kateh kerjak kijadik ilei nuurag de bihurmat katehkenalag rakan sekerjak.

1. Jijoi maklumat ku kemil, og peniker engkek ma de boleh engkek beh serengkol ju nepetek ku kemil?
2. Jijoi maklumat de biog ku kemil, beh nanek resume ha semanj kerjak?



Ektiviti



Menacak

Perwira Negara



Sempene senambot Jis Kemerdekaan tahut adeh, Juruhebah Mona kipelawe salah nuurag perajurit negara de jeoi bejasak demi negara haknuk. Beliau berupe wira negara beketurunan Semai de kipetaroh isinui ha keamanan negara ku jis adeh. Kemakmuran de hik kecapi hunen mongloh hasel titik peloh ru senumbang wira-wira rah ilei de bekurban nyawak demi bangsak ru negara.

- DJ Mona: Salam kemerdekaan ru salam mesra ju eng DJ Mona. Jis adeh eng an besamak-samak engkek ju pukul 8 loi 10 pegelap. Sempena Hari Kemerdekaan ku tahut adeh, hik had betuah mende salah nuurag wira negara mong besamak eng jis adeh. Beliau jeoi ijasak ku negara hik ru kiperjuang inyawak ha petahan negara hik nanek mase entem. Cenempet kaknek musoh ru cetak selok-belok kateh jeres berupe lenebeh Sarjan Apot de tiktok ku mai kilek. Ilei senalo biog nu benares hadapan ha jejak dil-dil komunis. Lenebeh de mong ku dirik ilei lei bikermuh *The Big Nose* mende ru imoh taleh boleh kikerngoi ngoi musoh. Jik warga Bor FM kenjip kebanggak ru entoï sengik mende jik kep jempot ilei ku jis adeh. Kenenjip isinui semase menentang musoh had beceti demi kaha petahan negara hik. Peksendok hik cerngai ikenenjip de menarek, bei hik kernal ru wira negara hik. Selamat tibak ku konti jik, tuan. Ma igah ru boleh ka tuan pekenal dirik nu mai cerengai rediu jik pegelap adeh?
- Apot: Gah bor DJ Mona, peksendok ajeh eng ha ucap abor haknuk nu Bor FM mende sudik kijempot eng jis adeh. Muh eng Apot anak Saad beasal ju Batu 14 Jalan Pahang. Amek eng mai Pahang. Umur eng 71 tahut adeh.
- Dj Mona: Eng kenjip banggak mende tuan berupe mai kampug eng de mong senumbang ha negara hik. Entoi senumbang ru jasad tuan nu negara hik. Begeiharok tuan mulak-mulak cebori bidang kerejak adeh?
- Apot: Eng muj kerjak ku umor 19 tahut. Mase ajeh mong bibukak rekrut pai ha Senoi Peraaq. Eng et temu duga ku Tapah ru pek ngsangkak eng lulos. Eng bianj nu Kroh (Pengkalan Hulu, Perak) ru ngmulak kerjak ku tahut 1968. Telas ajeh, eng bianj nej nu Ulu Kinta ha lenateh asas seleneu empat gecek. Dij taleh lenateh asas jik biperjug nej nu Kroh. Jik bicerlah nu memerip platun ru kompeni. Eng bicerlah nu platun 5 kompeni B kerop Tuan Mat Nor. Eng behidmat kerop Senoi Peraaq nutahut lebeh peksendok ngbetukar kerjak nu Komando 69. Eng kep lenateh Komando seleneu empat gecek ku Pos Brooke, Gua Musang. Was ajeh jeoi komunis mende jeres. Lenateh jik biketuei ya Mai Biyeg. Dij lenateh eng teros behidmat kateh Komando 69 loi pencen.
- DJ Mona: Senusah menentang musoh berupe cenabar de entoï kateh sinui ilei. Namun demi negara haknuk, ilei sanggop kipersip penenteng dirik ru behidmat ru penoh dedikasi demi negara ru bangsak. Boleh ka tuan cerite gek kenenjip semase menentang komunis?
- Apot: Lekat eng serangik loi adeh, ku tahut 1976, petame kali eng ngtumpas komunis, eng ngkenjip sedeh ru ngjinjap mende tok pernah eng perdat sengoï tapik mong nuurag

koperal ajeh kiurok tok gunak hik besedeh mende adeh tanggungjawab hik ha petahan negara. Telaluk terik ha gambar sengik eng masa ajeh. Senalo eng mong ku benares kungar mende eng taleh panei selok-belok kateh serag. Jeoi komunis dat ku teg eng. Mong nanek ketue komunis ipangkat *Distreet Community Member* (DCM) sama begei Pegawai Daerah. Semase jik serang hendap, ilei tengah kiberencet. Mong ipistol kisasat kuiwog. Eng ngbedil komunis ru kenak ku ienteh ru kidat. Jik biog nearah bedil komunis ya bok-bok de sempat. Teros jik bertempo tapik komunis kilek dij enai jar mende enai gei nyak ju kek de dat nek.

DJ Mona: Buleh ka tuan cerite gek begehharok tuan kek dil komunis?

Apot: Isebetol terik ha kek dil komunis ru bebize dil ju mai hik. Komunis adeh cukop cetak. Enai tok an wes dil enai senang-senang. Icuntoh alau mong dil enai, nai an naitutop ru cag jehuk naibeh rah dil menatang rah pos, beruwog atao gau. Tapik mende hik mai serag hik buleh hik panei ajeh dil sengoi atao dil menatag.

DJ Mona: Telas hik cerngai kenenjip de bicerite ya ilei, pai eng ngsedar betape entoi penekurban ilei kipetaruh inyawak demi negara haknuk. Jenerasi pai hodloh senalo naiingit senumbang perajurit ru naiinsap senusah mai manah entem demi petahan negara ru bangsak ju musoh. Sebegei rakyat Malaysia, hik samak-samak betanggungjawab hijagak neaman negara ju segala mentok penejajah moden ru neancam. Secengreg penehidmat tuan kateh Komando 69, mongka penehergak de biog sebegei tandak penehurmat?

Apot: Mimang jeoi penerhergak de biog. Antare anugerah de ngkep ialoh Pingat Kesatria Taming Sari (PKTS), Pingat Pangkuan Negara (PPN), Pingat Keberanian Polis (PKP), Pingat Panglima Gagah Berani (PPGB) ru kekilek. Rimdij anugerah de ngkep adeh an jadik bukti nu cenokmolsog pigoidoh mende atok enai mong ijasak nu negara.



DJ Mona: Tok hik napi rimdij penekurban ru jasad-jasad Sarjan Mejar Apot tok kep hiukor ru anugerah de biog namun sebegei tandak abor hanuk nu jasad-jasad ilei ru pahlawan de bebakti, hik sebegei rakyat Malaysia hodloh senalo hijagak neaman negara dek senalo terlas ju anasir-anasir rual. Ku sampeng ajeh, hik hodloh hisui kateh bebilang bangsak ru aman sentose. Peksendok hik perdidj wawancara adeh, bei hik cerngai engrok bengsat ju Sarjan Mejar Apot nu anggote de lekat behidmat naijagak neaman negara.

Apot: Eng ngharap rimdij anggote de lekat betugas hodloh mong semangat keberanian de lasik nyiknyukloh ha perneng ha mai, bekerjakloh ru ikhlas, berintergriti iaajeh jenujor, tenulus sengik ru tok tepengaroh.

Dj Mona: Abor haknuk nu Sarjan Mejar Apot de sudik kibekungsi ikenenjip de had beceti nu hik masarakat Malaysia. Semoge ru cerite ilei buleh kiog senedar nu hik rimdij ha penenteng petahan neaman negara ju neancam rual. Hik jugak agok hisip senumbang ru jasad perajurit-perajurit negara de bekurban nyawak demi negara haknuk. Selamat menyambot Jis kemerderdekaan tahut adeh. Hik beleh nej huper ku waktu de samak. Salam haknuk ju eng DJ Mona.



Ektiviti

1. Bacak dailog ku kemil ru kot nanek babak beh lenakon.
2. Og peniker engkek, ma peranan engkek sebegei belie rakyat Malaysia ha petahan negara ju neancam rual?



Ikon Penileh

Emaliana a/p Bah Ali



Maklumat Peribadi

Was Yesnos: Hospital Bersalin Kuala Lumpur
 Tareh Yesnos: 03 Mac 1993
 Umor: 27 tahun
 Bangsaak: Orang Asli
 Ugame: Walah
 Warganegara: Malaysia
 Cengreg /Nyahneh: 153cm/56 kg
 Status: Bujang
 Hobi: Bebacak
 Palsafah Sinui: Ku Belok Mong Heknod,
 Ku Pajeh Mong Nong

Latar Kenok Penedidik

- Ujian Penilaian Sekolah Rendah (UPSR) 2005
3A, 2B
- Penilaian Menengah Rendah (PMR) 2008
7A
- Sijil Pelajaran Malaysia (SPM) 2010
1A+, 2A-, 2A, 2B, 1C, 1C+
- Sijil Tinggi Pelajaran Malaysia (STPM) 2011-2012
3.75
- Ijazah Sarjana Muda (Universiti Malaya) 2013-2017
Ijazah Sarjana Muda Undang-Undang (Kepujian)

Kenenjip Kerjak

- Jabatan Bantuan Guaman Ipoh
Jun 2016
- SK Batu 14, Tapah (Guru Gantik)
Januari 2018 – Mei 2018
- Pusat Pakaian Kime Tapah
Oktober 2018 – Disember 2018
- Tetuan Sia Boon Chee & Co, Ipoh
Januari 2019 – Januari 2020

Bidang Tugas Hunen

- Og nasihat ju segik undang–undang bekenae Perjanjian Jual Belik atao kontrak jenual
- Sediak dokumen–dokumen ju segik undang–undang bekenae ru pruses jual belik hartanah

Penewatak Peribadi

- ★ Genmar betanyak
- ★ Disiplen
- ★ Bor isengik
- ★ Bededikasi
- ★ Komited



Ektiviti

1. Jijoi maklumat ku kemil, beh nanek biografi ha ikon Emaliana a/p Bah Ali.
2. Senarei sepuluh engrok hikmah de boleh kiog motivasi nu engkek ha jadik nuurag de bejaye ru beh ayat de sesuei.



Seni Engrok



AUDIO 13

Biar Eng Beempok

Amen ha gapei sagup
 amen ha gapei perloi
 agok had hik beempok ku idijis
 hod cap ku janyik
 agok had betader ku padek arik.

Alaopen sengsare, hod perbet mat
 nunoh eng tekad teros ngcip nungar
 nunoh pen barak os beket tetap ngkop
 tok an terlas ru sie-sie.


Amen jenaye jadik henarap
 eng nyek sekadar neimpi
 kuatloh semangat eng
 agok gunjak terosloh hididoi
 alau yog deras-derasloh hik kus
 dek neimpi kijadik nyate.


Biarloh eng beempok
 an ngtujuk ru tebeg yenaken
 ama los doh hicelog sesal tok dij
 alau jeoi kenerlag tabahloh sengik
 asal loi matlamat de hitujuk.

Nanek jis
 tentuk engkek bebanggak
 berkat usahe ru titik sengep
 bibalas ru jenaye tebilang
 mase ajeh an tibak
 pasti eng tok beempok.

**Ektiviti**

1. Bacak sajak ku kemil ru terang iceti.
2. Hurei ru analisis unsur seni de mong kateh sajak ku kemil.

4.2.2
4.2.3



Engrok Bantuk

Mureb Sengoi Hik de Cemerlang



PEKAN: Mureb cemerlang sengoi hik de kikep 6A, 1B ru 1D kateh peperiksaan Sijil Pelajaran Malaysia (SPM), Ifadla Adi, 18, becite-cite kaha jadik jururawat ru bekerjak ku klinik kesihatan ku rual bandar ku lengrik adeh.

Jijoi bekas mureb Sekolah Menengah Kebangsaan (SMK) Lepar, ju sayet ilei kibeminat ru tugas jururawat de kibantuk mai nyik tok kirak bangsak ru ugame.

Urok ilei, minat ajeh kidurong ilei kiui penesediak kikut peperiksaan ru berkat kesungguhan ajeh tebalas ru keputusan de buleh kibanggak.

“Eng besukor, usaha de gigih ajeh behasel bile ngkep keputusan 6A, 1B ru 1D. Jenaye adeh jugak hasel senukong peringak, guru ru kawat-kawat.

“Lebeh ceet nej keputusan SPM eng samak ru keputusan kikep ya tenek eng Adilah, nar tahut canuk ku sekulah samak,” urok ilei ku SMK Lepar.

Jijoi kenon kuinar ju enam beradek ajeh, ilei kiperuntok limak jam nujis ha ulangkaji pelajaran.

Ifadla kiurok, alaopen gagal kikep keputusan de kiharap kateh peperiksaan Pentaksiran Tingkatan Tiga (PT3), ajeh tok kiperjer isemangat ha teros kibese jenaye.

“Eng beharap ru keputusan SPM adeh kibukak peluang ku eng ha cerot pengajian kateh bidang de eng minat iseteros kep bantuk peringak,” urok ilei de kigei ku Kampung Orang Asli Gedung Siam Paya Bungor, Kuantan.

(Biubah suei ju *Berita Harian*, 5 Mac 2020)



Ektiviti

1. Bacak nepetek ku kemil ru kernal pasti pola ayat ru beh ayat eknej gunakan pola ayat de sesuei.
2. Tules nanek berite ha jenaye nuurag mureb ku sekulah engkek ru permuj peribahase de sesuei.

DUNIAK LEMU PENANEI



UNIT 20

Duniak Mol Jaras



Cerngai ru Belwal

Menudah Aplikasi

Ma tenindak engkek?

- a) Amen belakuk cenemas rah jenayah?
- b) Amen telibat kateh kemalangan ku nong entoi?
- c) Amen memerip pehak kitimol kenjip tok selamat?
- d) Amen ha semak status senmaj?
- e) Amen hod berkep penehidmat?
- f) Amen penetular virus nyaknik?
- g) Amen ha kek maklumat tenamah ku alam maya?

Duniak jis adeh ya beubah ru menudah sengoi ru penegunak aplikasi ku telipon pintar.



Ektiviti

1. Og peniker engkek ha isu ku kemil.
2. Beh renumos engkek ru penandang mai kilek jijoi bahan de biog.



Menacak

Jane Berengkep ju Laman Penekungsi Bideo

Nanek berkes, Bah Lie kibakek Bah Bing ku semadek deg. Kelakuk Bah Bing kitarek penerhati Bah Lie laluk ilei kiperek nu Bah Bing.

Bah Lie: Bor berkes Bah Bing. Ma ha ui ajeh?

Bah Bing: Bor berkes Lie. Eng tengah ui renakam bideo.

Bah Lie: Hek gunakan telipon pintar taleh?

Bah Bing: Hoooh ... senang eng ha sunting ru permuj nu laman pekungsi bideo.

Bah Lie: Ma tenuju hek permuj nu laman ajeh?

Bah Bing: Sekadar genmar taleh. Kateh mase de samak eng ngjane berengkep pasip ju laman ajeh.

Bah Lie: Betul ka, boleh jane berengkep ju pajeh?

Bah Bing: Betul ... boleh. Ru sarat hik rajit permuj bideo ha mai bahaneng.

Bah Lie: Boleh hek kungsi bageiharok icare?

Bah Bing: Bor, begei adeh. Langkah nanek, hek hodloh bukak akaun kateh laman penekungsi bideo ajeh. Langkah kuinar, hek permuj bideo de hek kenjip kep tarek minat mai nengneng ru kijoi akaun hek. Langkah kuinik, bile ya mai jeoi mai joi ru nengneng bideo ajeh lei telas angke minima bitetap ya laman penekungsi bideo, ui senmanj ha tuntut berengkep. Langkah kuimpat, pehak laman penekungsi bideo an sah maklumat ru naibayar berengkep. Langkah kulimak, promosi laman hik ajeh ku bebegei medie. Gu jeoi mai neng ru joi, lagik jeoi berengkep hik kep.

Bah Lie: Berengkep bibayar kateh mentok ma?

Bah Bing: Benayar kateh mentok Dolar Amerika ru bipermuj kateh akaun bank hik. Nanek bideo eng ui nik gecek lepas bibayar 200 dolar. Cubak hek tukar nu duet Malaysia, memerip dah? Ha ... ha ... ha

Bah Lie: Abekdek hei, jeoi ajeh ... eng pen ha berajal ju hek.

Bah Bing: Boleh ... lemu de bor hodloh hikungsi. Hek mong idie bideo ma ha ui? Boleh ui penesediak awal. Begei eng ngpokes ku bungak-bungak. Jadik eng hod bebacak begei sumber ru beh renujuk bekenaet. Telas ajeh, eng nghodloh ui teks care-care ha belwal dek bideo bekualiti.

Bah Lie: Wow... hek boleh jadik idola eng.

Ha ... ha ... ha

Bah Bing: Mong-mong taleh hek adeh. Bei tulog eng ui renakam bideo taleh.



Ektiviti

1. Bacak dailog nu kemil ru beh serengkol.
2. Beh nanek skrip bekenaet ha hubi ha permuj nu laman penekungsi bideo.

2.3.2
3.2.2



Menules

Genunak Dron

tenembot

peguatkuase

peneniage

komersial

penetani

senelamat

medie, kewartawanan
ru pitem



1. Secare kumpolan, hurei genunak dron kateh duniak jis adeh. Engkek bigalak ha ui renujok bebegei sumber kateh penebincang.

Ektiviti

2. Gunak ayat de sesuei kaha belwal isu bekenaet ku kemil.



Seni Engrok



AUDIO 14

Cinte Gajet



Ektiviti

1. Terang iceti sajak ku kemil.
2. Beh ayat de boleh kiperneng dil niknej penegunak gajet tok tekawal.

4.2.2
5.3.1



Penhidmat E-hailing ku Malaysia

Neujud penhidmat *e-hailing* ku Malaysia gu biterimak ku Malaysia. Manah entem penhidmat adeh had kijadik penileh engleg rakyat Malaysia teutame de naigei ku bandar. Hunen, jenim adeh na bebize mende mureb seawal tingkatan 1 pen ya panei kigunak penhidmat *e-hailing* ha et nu tusyén, tempah caknak ataopen bebegei nej.

Ku negara hik adeh mong lebeh 30 penhidmat *e-hailing* de beoperasi. Jeoi penileh de pelanggan naikep ju segik diskaun ru rebat kateh sektor penhidmat adeh. Ju sudut positip, masarakat mong lebeh penileh ha pileh penhidmat enai ru tok terikat ru upah servis de mahal ru tetap.

Penhidmat *e-hailing* popular ku Malaysia mongloh Grab. Grab jugak na kikit alih operasi Uber ku Asia Tenggara secare rasmi ku Mac 2018. Selaen kipersenang pengguna, Grab jugak na kisediak lebeh kurang 10 000 krenjak ju awal penetuboh kiliputi penhidmat begei GrabFood ru GrabExpress.

Selaen Grab, memerip penhidmat kekilek jugak gu kep tempatkenalag masarakat mongloh MyCar, Socar ru Mula. Ku kerop adeh mongloh senarei 31 pengenal *e-hailing* de sah ru bilulos ha beoperasi ya kerajaan ju tahut 2019.



1. Bacak nepetek ku kemil ru kernal pasti ayat tunggal. Telas ajeh, ui 10 ayat tunggal bekenaet *e-hailing*.

Ektiviti

2. Og pendapat engkek bekenaet ha ibernor *e-hailing*.

UNIT 21

Rakyat Sehat, Negara Tejaman



Cerngai ru Belwal

Cakcak Sehat: Suku Suku Separuh

Ma Iceti Diet Suku-suku Separuh?

Konsep “suku-suku separuh” berupe konsep de senang bipaham iaajah suku bahgian pingat biisik ru sumber kabohidrat rah caknak atao ruti, suku pingat nej biisik ru sumber protein rah kak, pug, sej ru kekacag serte enlag nej biisik ru pelek ru senubai. Amen kunsep caknak adeh biamal, nunumom kikep perwir masalah obesiti de boleh kianj bebegi nyaknyik tok bejangkit de gu kitular kateh kenalag rakyat Malaysia.

(Sumber: Kementerian Kesihatan Malaysia)



Ektiviti

1. Bacak ru analisis isu ku kemil, secare belwal cubak hubong kaet yama rakyat Malaysia hodloh naiamal caknak secare suku-suku separuh?
2. Selaen hik jagak caknak, ma paktor kilek de engkek hodloh og penehati kateh penejagak senihat? Og cenadang ru bukti de kukoh.



Menacak

MyHealth, Gerbang Sumber Penedidik Senihat

“Hik hunen sui ku jaman de majuk ru rimdij informasi ru gah kateh atao rual negara boleh bikep ru care nanek klik.”

Kementerian Kesihatan Malaysia (KKM) na kigunak peluang ha og penedidik senihat nu masarakat joi medie sosial. Adeh sesuei ru heknod masarakat Malaysia de genmar nailayar laman sosial.

“Jik hod rakyat Malaysia naikep maklumat senihat de betol ru neujud portal MyHealth adeh berupe sumber penedidik de biharap kep kiperhuj akses maklumat senihat katehkenalag rakyat Malaysia,” urok Siti Sarah Mohamad, Penolong Pengarah Kanan, Bahagian Pendidikan Kesihatan, Kementerian Kesihatan Malaysia.

Jijoi Siti Sarah, portal adeh na biberkus ju tahut 2005 nej. Portal adeh jugak berupe nanek komponen ku kerop projek ICT Kementerian Kesihatan.

“Portal adeh biujud ha kiog maklumat de tepat bekenaet senihat nu rakyat Malaysia. Bahasa bigunak jugak lebeh senang bipaham sesuei ru penengham masarakat Malaysia,” kiurok nej.

Antare penehidmat de bisediak ku Portal MyHealth termuj sembilan kategori artikel senihat (Bahasa Melayu ru Bahasa Inggeris), *e-Majalah*, menman senihat, amaran, isu-isu semase, galeri medie ru bob Garis Panduan Naspal.

“Ha jik jiber minat sesayet, jik na berkus memerip banse menman senihat iantare *bug hunt* iaajeh menman kisuj lemunj ha perdat kuman-kuman kateh empag. Adeh betenujuk ha kiterap idie ha penenteng hik jagak berenseh empag,” urok Siti Sarah.

Joi portal adeh, matlamat KKM mongloh ha optimum penegunak medie sosial kateh kididek masarakat ha isu-isu senihat. KKM jugak kikit inisiatip ha perlei maklumat kateh mentok infografik. Bahan adeh senang bibacak ru mong info padat ru penteng. Joi portal MyHealth informasi penteng de betol kep bikungsi ru kep perwir masarakat ju naipecahay info de tok betol.

(Sumber: *Majalah Isihat*)



1. Bacak maklumat ku kemil ru beh serengkol bekenaet manpaat portal MyHealth.

Ektiviti 2. Ru gunak menudah Internet atao pusat sumber, kek sumber maklumat bekenaet senihat de boleh kijadik renujok ha masarakat ru og ipenenteng.



Menules

Pruses Dermak Behip



Ektiviti

1. Og respon secare betules bekenaeet pruses derme behip ku kemil ru gunak penandak wacana de sesuei.
2. Teroke maklumat lanjot ha paedah amen engkek derme behip ru beh kenarang de lenkap.



Seni Engrok



AUDIO 15

Awas Nyaknyik Kohol Sot

Watak: Apak, amek ru Wah Sira (Kenon)

Babak 1

Ku selai, apak, amek ru Wah Sira, enai beparik sambel begibang ru ngut kupi.

Wah Sira: Apak, yama eng ngneng jun senalo jun kehol?

Apak: (*kikehol sambel kitalek iempag*) Kehol biasak taleh, agok risau.

Amek: Apak hek adeh, mimang na leu kikehol. Amek pakat ha apak cip nu klinik kinyek.

Wah Sira: Apak, ciploh nu klinik, biar dokter kiperiksak sengoh mong nyaknyik bahaye.

Apak: Jeon adeh, susah sengik tok bekayat. Eng adeh kehol biasak-biasak taleh. Memerip jis honjloh. (*teros kikehol*).

Amek: Apak hek adeh Sira kigaleh. Amek jeoi noh na kibesat ... buruk dokter ... buruk dokter tapik kinyek.

Wah Sira: Henlep hik cip nu klinik ya pak. (*sambel kineng nu iapak*).

Apak: (*Engrok kirarok*) Selei eng nglayan jeon adeh. Bor nej eng cerot kerjak (*teros kikus*).

Amek: Nengloh, amen amek kimur kinyek cerngai

Wah Sira: Amek, cubakloh nej ya enjun ej apak nej.

Babak 2

Ku deg, ku padek arik. Haj apak kikehol kuat ru tok behentik. Wah Sira kikekjet ru kimuj nu bilek apak ru amek.

Wah Sira: Amek, kenghol apak deh ya gu terok.

Amek: Apak kinyaknyik adeh. Iberog pen beseem jeoi.

Apak: Sira kot teu. (*teros kikehol*).

Wah Sira: Adeh pak teu. (*sambel kiog nucawat teu*).

Apak kingut teu. Haj apak kikehol kuat ru hol behip.

Amek: Hei, yama kehol hek bebehip? Jok aderas nu hospital. Sira, telipon gejak akenj, urok nu akenj, hik hod anj apak nu hospital.

Wah Sira: Hoohloh amek. (*teros kihol nu bilek kaha telipon ikenj*).

Babak 3

Apak perlai ku hospital. Keadaan apak an stabel. Paknyak apak kihidap nyaknyik kohol sot.

Amek: Borloh hik anj deras apak nu hospital. Dokter kiyap amen lingah nyaknik adeh buleh kianj dat mende inyaknik kohol sot adeh bahaye ru buleh kijekjug nu hik.

Apak: Sukorloh, apak gej kep renawat. Jeon begehharok? Dokter na kiperiksak ka? Ma ipenutos?

Wah Sira: Agok risau pak. Amek ru eng telas ju nyaknyik adeh. Jar tok ma-ma. Sukor sangat-sangat.

Amek: Amen bijekjug nyaknik adeh ... hik rimdij muj hospital rah apak. (*kileklug*).

Wah Sira: Apak, jun hodloh rajit cak penglai ya. Dokter kiyap nyaknyik adeh buleh honj amen hik cak penglai de biog ru betol. Telas honj, jun hodloh jagak senihat.

Apak: Hmm ..., apak an jagak senihat. Jeon pen hod jagak senihat jugak.

Amek: Telas adeh, apak hodloh cerngai bengsat amek ... agok galeh cip nu klinik amen nyik.

Lienai Leklug.




Jeon iceti jerkek
Honj iceti sembuh
Rarok iceti rungut



1. Bacak skrip drama ku kemil. Pileh nanek babak ru beh lenakon.

Ektiviti 2. Kateh kumpolan, og respon engkek ha lenakon ju kumpolan kilek.

4.4.1
4.4.2



Ibemor Ngetngut Teh Belaar

1. **Kikawal nyeh berog**

Teh belaar mong 10 noh jumlah antioksidan bebandeng pelek ru perhuj kadar metabolisme berog. Adeh an kipergek selere caknak ru mampuk kiperceleh nyahneh berog.

2. **Pergek kolesterol**

Teh belaar mong tanin de mampuk kipergek kolesterol LDL (*low-density lipoprotein*) kateh berog. LDL berupe kolesterol niknij de kijadik plak de kikerlak ku arteri.

3. **Kirawat diabetes**

Kenandong antioksidan kateh teh belaar an kikerlak enzim *alpha-glukosidase* ru kep kipelahat peneserap glukos kateh behip. Adeh kep kipergek penegunak insulin.

4. **Getek sehat**

Antioksidan de mong kateh teh belaar bemanpaat ha getek. Kosmetik de mong ekstra teh belaar mampuk kiog penelindong ku getek ju penacar mat jis. *Polifenol* kateh teh belaar kep kipelahat dil-dil engrak.

5. **Kipergek tenekan**

Teh belaar jugak mong *Theanine* de kep kibantuk pergek tenekan ru stres serte kemurungan.

6. **Kipesegar ngoi empag**

Teh belaar kep kikerlak bakteria ru virus punce nyaknyik lemunj. Selaen ajeh, teh belaar bantuk kipergek radang lengsig.

(Sumber: *Majalah Saji*)



1. Jijoi maklumat ku kerop, kernal pasti ayat tunggal ru ayat majmok. Telas ajeh, gunakan ayat ajeh ru betol jijoi kunteks.

Ektiviti

2. Amen engkek berupe jurujual benarang senihat, peterang idie *secare* spuntan ru engrok de bor, yama hik hodlah neamal ngetnut teh belaar?

UNIT 22

Teroke Lemu Pai



Cerngai ru Belwal

Care Daknek Penglai

MITOS 1

Dek rimdij penglai kateh peti ais dek tahan leu.



FAKTA:
Penglai buleh kijadik lembap ru rusak amen hidek kateh peti ais. Had dek penglai kateh peti ais amen bior ya dokter.

MITOS 3

Dek penglai hop (jerhot) kateh kerite amen belakuk cenemas rah hop.



FAKTA:
Suhu kerite buleh kicecah 50 darjah celcius. Penglai hop (jerhot) buleh kimeruap kikayat penglai hop kijadik kusong.

MITOS 2

Dek penglai rek ru dengwal dek senang ha kot amen nyaknyik.



FAKTA:
Suhu dengwal de beket buleh kikayat penglai kijadik rusak. Penglai hod bidek nyak ju dengwal ku tempat de selamat ru tok buleh kicapei ya pitak sayet.



Ektiviti

1. Jijoi maklumat ku kemil, og pendapat engkek ku belok tempat de sesuei daknek penglai ru nyate yama?
2. Gunak renujok tenamah, bincang secare kumpolan, senarei banse-banse muh penglai ru terang ma igenunak?



Kidal

Jeoi mai tok naisedar lenebeh de mong ku teg kengwil atao kidal. Ju kenaji dibibeh, mai de kigunak teg kengwil ialoh nuurag de had panei ru mong peniker de bebize ju mai kilek. Ku kerop mongloh fakta de bikep telas kenaji bibeh.

1. Secare kasar sekitar 10-15 peratus ju masyarakat duniak mongloh kidal.
2. Mai kidal tok semesti mong amek apak de jugak kidal.
3. Jijoi kenaji tiktok bok-bok de boleh kiog definisi yama engleg sengoi biperyos kidal ru tiktok gen de bekaet mai kidal boleh bikernal pasti, tapik ilei mong kenaet kateh keluarga.
4. Jis istimewa ha mai kidal mongloh Hari Kidal Sedunia de bisambut ku 13 Ogos nujap tahut.
5. Lebeh jeoi litau de kidal bebandeng kerdor.
6. Mai kidal biasak kinyam caknak engleg kengwil ru mai teg kentop kinyam ku englag kengtop,
7. Mai Kidal lebeh deras isengik. Joi kenaji, mai kidal kiternyul proses emosional de tok seimbang antare otak kengtop ru kengwil. Adeh salah nanek punce emusi enai selalu tegangguk.
8. Iuntung mai kidal tebutki lebeh cerdas ru cetak ju mai de kigunak teg kentop. Jijoi kenaji ju St. Lawrence University, mai kidal samakmong IQ lebeh ju 140. Ibukti, Leonardo Da Vinci, Michelangelo, Einstein, dan Newton mongloh mai berteg kidal.
9. Ju segik senihat, mai kidal lebeh cenderung mong nealah, senang kep migrain serte lebeh cenderung kijadik mai nyaknyik insomnia.
10. Mai kidal lebeh cenderung kijadik ahli sukan ru mahir bidang komputer, mong cenerdas peniker de lebeh istimewa ru bepiker lebeh deras. Juara duniak tenis Rafael Nadal berupe nusengoi pemain berteg kidal manakale empat ju limak pereke komputer Mac ku sarikat Apple bilapor kidal.

(Sumber: <https://mediamaklumat.com/fakta-menarik-orang-tangan-kidal/>)



Ektiviti

1. Bacak maklumat ku kemil adeh ru olah kateh mentok peta pemikiran.
2. Kernal pasti senalah nekate ru istilah kateh ayat ku kemil ru pebetul.



Menules

13 Fakta Menarek

Mase ramoh, rimdij organ kateh berog tok bepungsi termuj jantung.

Matjis mong tenage de cukop kipeterang bumik ha timpoh lebeh ju 5 juta tahut.

Lentag dalog limak noh lebeh cengreg ju iberog.

Logam besi de mong ku bumik biurok beasal ju perloi raksasa ku rual angkase.

Kenaji kinyate alam semeste teros kibekembang.

Las berupe menatag de tok pernah kibukbet.

Bianggar 80 peratus menatag ku bumik mongloh serangga.

Amen rimdij senalor behip sengoi bicertad, buleh kiliputi 96,000 kilometer.

Kenandong emas ku laot 200 kali ganda jeoi bebandeng ku darat.

Sengoi kepelehem 23,000 nunoh kateh timpoh 24 jam.

Bahayak tok buleh kicip keknog.

Teu liheg sengoi biurok had mujarab ha perlai lukak ku getek atao ngej.

Had kemit ikenan kikap ru kilot behip sengoi.



1. Jijoi maklumat de biog, cerakin joi kategori alam semeste, sengoi ru menatag.

Ektiviti

2. Ru gunakan renujok tenamah, bincang secare bergu senarei pakta-pakta sains ru beh kateh mentok folio.



Abor Haknuk Bumik

“Booom!” Engrok kuat begei ha peladoh mercun kibeh Bah Ewan kikekjet. Bah Ewan deras-deras kiher ibaur ru kot iserok teros kaha jug. Ju kenanyak lau cahayak terang-menderang ku kemil lot rek ru nong jeknug Bah Ewan. Haj Bah Ewan kicerngai mong mai kisemanj tulog.

“Tulog ... tulog ... tulog,” suarak sengoi jelas kisemanj tulog.

“Suarak bok arok?” Bah Ewan mulak kibertanyak kihalei.

Imat kiceryak ditah-direh alau mong bok-bok de semanj tenulog ilei. Bah Ewan teros kicip tok kihirau ha engrok ajeh. Haj memerip meter ju ilei, kibake begei sengoi kilambei iteg sambel kisemanj tulog. Bah Ewan mulak kikenjip sengoh mende tok kipasti samakmong ajeh sengoi atao benda kilek. Maklumloh, kateh serag adeh nyiknyuk sengoi atao menatag taleh buleh hik jeramoh. Bah Ewan kiberanik ilei kiet rek kaha pasti samakmong ajeh sengoi atao nyiknyuk.

“Aduh, tulog eng mai bumik!” urok kerdor isog cereg kihulor iteg nu Bah Ewan.

Bah Ewan kikenjip berlak-berlik isengik kaha sambot teg kerdor ajeh tapi kikenjip nyaknyak. Kerdor ajeh lukak parah, jeoi behip ku ikui. Bah Ewan kiperati ileknog dij caceh tapik kikenjip pelik mende leknog kerdor ajeh begei pek pernah kineng.

“Yama hek jadih begei adeh?” Bah Ewan mula kibetanyak.

“Tulog eng nok, doh eng cerite,” balas kerdor ajeh.

“Tulog cot arap eng de pelantik ku kerop jehuk ateh,” ernor kerdor ajeh.

Bah Ewan teros kikut arap kerdor ajeh tapik ku sengik kikerek iarap ajeh begei kapsul penglai tapik entoi. Bah Ewan kipapah kerdor ajeh kianj jug nu ijambor. Mimang Bah Ewan kigei kihalei mende ilei sengoi reknig. Loi ku ijambor Bah Ewan kiperdak kerdor ajeh. Ilei teros kigap teu seep ru kiperlai lukak kerdor ajeh kigunak selak seraj ru kicah ienas ku ikurul.

“Abor haknuk mai bumik, hek na tulog eng,” ucap kerdor ajeh.

“Samak-samak. Tapik bok hek, ju belok hek tibak?” tanyak Bah Ewan.

“Eng mai nyak, lengrik eng nyak ku kemil gecek,” balas kerdor ajeh

Bah Ewan pek kipaham ma kerdor kibual ajeh. Bah Ewan kiserangik kerdor ajeh makhluk asing ka? Tapik yama begei sengoi biasak? Yama kipanei engrok hik? Ma kibeh ku padeh? Jeoi sensual kimenman ku ikui.

“Agok risau eng tok ngbeh ma-ma nu hek, eng cumak ha semanj tulog taleh,” kerdor ajeh kipeterang bile kibacak bebegei sensual menman ku kui Bah Ewan. Lenebeh kerdor ajeh buleh kibacak peniker mai kilek.

“Salam kernal, eng Rizkitatida nuurag saintis ku planet Marikh,” ilei kiulur iteg.

“Eng Bah Ewan,” balas Bah Ewan lekat kibingung ha jenim ajeh. Kicerngai muh kerdor ajeh de pelik betamah celaru ipeniker.

“Ma isebenar tenuju hek nu madeh?” tanyak Bah Ewan.

Saintis Rizkitatida pen kipeterang tenibak ilei nu bumik ialoh kaha nyong nanek penglai de had bihod ya sengoi ilei ku planet Marikh. Penglai ajeh had mong ku bumik taleh ru igenunak ha perlai nanek nyaknik hawar de kijangkiti kamerek dij masarakat enai ku planet Pluton. Jadik ilei bipetanggungjawab ha selesi misi de biog nu ilei. Ilei had kiharap Bah Ewan buleh kitulog ilei mende cumak Bah Ewan sengoi de kipanei ru kikernal penglai kateh serag. Mimang ajeh kerjak Bah Ewan kikutep penglai ru hasel serak ru kijual nu mai kampug de rek. Ku imulak Bah Ewan tok kipecahay ma de kicerite ya kerdor ajeh tapik ilei kikenjip nyaknyak bile kicerngai jeoi sengoi ku planet ajeh enai nyaknyik ru perlu penglai de had mong ku bumik. Ilei kibeharap rimdij ajeh betol.

“Buleh eng panei ma penglai de hek ha kek ajeh?” tanyak Bah Ewan.

“Penglai ajeh imuh Zingerber Zereumbet atao muh ku bumik berdag,” balas saintis Rizkitatida.

“Baikloh, huper har muj serag ru har kek penglai de hek hod,” janyik Bah Ewan.

Pegelap huper, ubai nar pen baimuj nu serag baikek penglai de bihod. Kaknek berdag ajeh tok mudah mende hod kek nu lod-lod. Ceknip pen hod senalo bejagak-jagak mende jeoi menatang kateh serag buleh hik jeramoh. Tapik Bah Ewan kiyaken niat isengik de bor, Nyenang an senalo kitulog kek.

“Adeh pen berdag de hek kek,” Bah Ewan kiternyul nu selak de sui er ku kemil tik.

“Wah, jeoi bernor,” saintis Riskitatida kikernyim kikeramik.

Ubai pen bairoj rimdij penglai ajeh baipermuj kateh rajot. Telas ajeh baipen baijug nu madeg ru sengik de sernuk. Loi nu madeg Bah Ewan kitulog suj berdag ajeh ru kibungkos bor-bor ru selak telei kiper muj kateh rajot. Ikelem ajeh saintis Riskitatida kisemanj kaha jug nu iplanet pepegelap huper mende ilei ya kikep isarat kapal ya kipoj ku was kije entem.

“Abor haknuk Bah Ewan mende ya hek tulog jik masarakat Marikh. Bile eng jug nu planet eng an cerite rimdij bernor hek sengoi bumik de mong sengik de ikhlas,” ucap saintis Rizkitatida kikenjip sedeh kaha wes Bah Ewan.

“Samak-samak, eng ngharap benantuk eng de macot adeh buleh kiperlai mai nyaknyik de had perlu. Adeh tanggungjawab eng sebegei sengoi biasak de hod saleng bebantuk,” balas Bah Ewan.

“Adeh mong gek hadiah ju jik planet Pluton ha hek Bah Ewan sebegei tandak abor haknuk,” saintis Rizkitatida kiulur nanek benungkos nu Bah Ewan.

“Eng nyek mama benalas tapik sebegei hurmat egnog engkek eng terimak ru sengik de bor,” balas Bah Ewan.

Pek leu ju kenjeh kapal angkase entoi kiloi kinyong saintis Rizkitatida. Kateh sekelip mat kapal ajeh nyep ju mat Bah Ewan. Ju kenanyak Bah Ewan kilambe i teg ru kibedoa semoga saintis Rizkitatida selamat loi serte misi kiselamat imasarakat an bejaye.




Ektiviti


1. Bacak cerite ku kemil ru cerite nej gunakan engrok halus de sesuei.
2. Jijoi cerite ku kemil, pileh ayat de sesuei ru kaet ru peribahase.



Pelik Tapik Benar



* Cig ialoh had nuikor menatang mamalia de tok buleh kilompat.
* ayat sahere?



* Manghel mong imoh ku ijuk.
* ayat sahere?




* Lemunj katem mong ku kateh iket.
* ayat sahere?




* Kucig buleh kibukbet 18 jam nujis.
* ayat sahere?



* Tok mong kirak-kirak 25 000 lemunj ru kibegseg nunoh seumor isinui.
* ayat sahere?



* Kak emas had nuikor menatag de buleh kineng cahaya inframerah ru ultraungu.
* ayat sahere?



* Sutong kurita mong nik ijantong.
* ayat sahere?



1. Jijoi maklumat ku kemil, tukar ayat biasak ku kemil nu ayat sahereh.
2. Cerlah maklumat ku kemil kateh mentok jadual ru kek maklumat de lebeh teperinci ha nujap menatag.

Ektiviti

UNIT 23

Paneika Engkek?



Cerngai ru Belwal

Jurang Jenerasi

Jap sengoi ku duniak bebize perinkat umor mongloh bebize ju segik penepeccayak, nilai budaye, perspektip, genmar, kenenjip ru pesonaliti. Hal adeh bikernal sebegei jurang jenerasi. Jurang jenerasi adeh bipekenal telas Perang Dunia Kedua. Mong limak kelompok jenerasi de bigulong ya ahli sosiologi.



(Sumber: *Shahhanim Yahya (2012), Jurang antara Generasi*)



Ektiviti

1. Jijoi pendapat engkek, yama nu jap jenerasi bebize personaliti?
2. Engkek jenerasi ma? Beh renujok tenamah ru tules kateh bob.

1.1.1
3.2.2



DNA Kirungkei Misteri Sengoi

Kenaji Asid Deoksiribonukleik (DNA) berupe nanek bidang kenaji de kiog manpaat ku sengoi ru duniak. Peneroke bidang adeh bemulak lewat 80-an ku Barat teutame kateh bidang perenglai, senelamat ru neadil. Seteros bidang kenaji adeh bekembang ku serate duniak termujloh ku Malaysia. DNA berupe nanek molekul de bikot rimij maklumat jenetik. Walah DNA nunanek organisme tok boleh tementok.

Ku berog sengoi mong nar banse DNA iaajah DNA Nukleas ru DNA Mitokondria. DNA Nukleas ialoh nubanse DNA ku sel de betindak sebegei kelop ru kikawal rimdij ektiviti kateh berog sengoi. DNA Mitokondria nej de mong ku nanek organel de bepungsi sebegei nanek kilang de kijane tenage de bihod ya berog sengoi.

Sebegei tenamah, DNA Nukleas kikod maklumat jenetik de bihod ha hasel protein de bihod ya berog sengoi. Manakale, DNA Mitokondria lebeh kikot protein de bihod ha penjane tenage.

DNA bipeder boleh kikesan ru kijejak asal usul sengoi. Nanek tenerbit jurnal antarebangsak "Nature" ku tahut 1987 pakar ju Universiti California kinyate sengoi moden de mong jis adeh beasal ju numom kerdor bermuh Eve ju Afrika. Kerdor adeh berupe induk sengoi ku duniak jaman hunen. DNA kidek 1001 kisah de belakuk jaman manah. Kenaji DNA sengoi boleh biui ru og pokes ku DNA Mitokondria mende DNA adeh boleh betahan ju rusak atao tecemar. Kenaji jugak boleh naiui jijoi jeag-jeag de repot.

Ku tahut 2008, bertempat ku Gua Musang, Kelantan, nanek misi na biui ha perhol bangkei pesawat Dakota KN630 ju was ajeh. Pesawat malang ajeh kijer ku tahut 1950 de kikurban 12 krew ru penumpang. Mangse de tekurban tedirik ju nik anggote juruterbang Royal Air Force, enam urag tentere British, nuurag anggote pulis, nuurag mai awam ru penjejak mai sengoi. Jeag-jeag mangse pesawat ajeh bikumpol ru biui ujian DNA Mitokondria ru ui penebandig saudarak englag amek. Hasel ju kenaji ajeh, wares-wares mangse kep bikernal pasti ru bicob ku Johor ru *Commonwealth War Grave Cemetery* ku Cheras.

Iserengkol, bidang kenaji DNA mongloh bidang de boleh bekembang kateh duniak moden. Bidang adeh berupe kunci nu kenaji manah de boleh biteroke. Ipemulak duniak DNA boleh bipekenal ju sekulah rendah nej.



1. Bacak pintan ru paham bahan ku kemil.
2. Jawab sensual penengham ku kerop adeh:
 - (i) Yama bukti jijoi DNA penteng kateh neadil?
 - (ii) Jijoi pendapat engkek, begehharok ha martabat sains ru teknolужи negara ku perinkat duniak?

Ektiviti

Menules

Keknot Gulak de Betol

* Mai raknak



Purate keknot gulak tenamah bisaran tok lebeh 10 sudu nujis (50g)

* Pileh caknak de gek gulak

- pileh ru sediaan pecuci mulut de gek gulak
- gantik caknak ceet de lebeh sehat rah pelek
- perwir caknak begulak ku antare caknak utame ru peksendok bukbet
- semak kenandug gulak ku label caknak peksendok belik

* Pileh ngeknut de gek gulak

- pileh teu kusong bebandeg teu ngeknut begulak
- had gulak ru susu pekat ceet kateh ngeknut
- perwir ngut teu ceet ku antare henidang

* Ma dil keknot gulak lenebeh

- obesiti
- karat lemunj
- pehut lehem
- diabetes
- kanser
- deras engrak



Ektiviti

1. Kateh kumpolan ui penebincang bekenae poster ku kemil. Telas ajeu ui ektiviti kerusi panas kateh kelas.
2. Susut isik-isik penteng jiji bahan de bibincang ku kemil ru ui kenarang gunak tandak bacak de betol.



Mineral Kaolin ku Bidor



Jis adeh eng ru Bah Naim nu kilang Kaolin ku nong Bidor ha nanek janjitemu ru pegawe sarikat ajeh. Terbuk adeh mongloh nubagian ju tenugas jar kateh seryap kerjak kusus. Janjitemu adeh eng ator nu gecek awal. Eng mong ngui kenaji jijoi Internet ha kaolin tapik maklumat birel umom ru gek.

Tenibak jar bisambot ya Encik Liew ku kaunter pejabat. Ilei kianj jar nu bilek tengloh ru turot kipelawe ngeknut. Jijoi ilei, jar rimnar mongloh mai petame ha ui kenaji bekenae

kaolin ju sarikat adeh beoperasi. Ilei teruje ru kibeharap hasel penetules adeh jar boleh bikungsi nu masarakat umom jijoi alam maya atao lisan. Hal adeh mende penanej masarakat ha kaolin had tehad.

Telas kibentang latar sarikat gunak slaid, Encik Liew teros kipeterang bekenae kaolin. Ku bahgian adeh eng og pokes betol-betol. Jijoi ilei, kaolin berupe nanek nubanse mineral ju peringak aluminosikat lempung de begunak kateh duniak industri. Muh kaolin beasal ju China iaajeh *gaoling* beceti tebing delasik nu nanek kampug ku Tenggara China.

Mineral kaolin mong kapasiti kecut-kembong de patik, selun ru cegeh, bekaler biyek atao belae cerah. Batuan de mong kenandong kaolin de lasik bisebot kaolinit. Jadik kaolinit bilumbong ha ui seramik, penglai lemunj, bahan komestik, siknuj renis, cat, gertas ru jeoi nej.




Encik Liew kitamah nej, sarikat kaolin ku Bidor berupe perenghol kaolin de entoi ku Malaysia ru mulak bilumbong ju tahut 1930-an. Gu halus kaolinit bipruses, gu mahal ru bekualiti mineral ajeh. Regak pernah kicecah RM630.00 per tan amen bijual.

Maklumat de engkep memadai jar ha seryap tenugas. Eng ngcadang hui nanek penetules bekenae hasel janjitemu ru Encik Liew kateh laman sosiel.



Ektiviti

- Bacak cerpen ku kemil ru jawab senual ku kemil:
 - ma iceti kaolin?
 - ma genunak kaolin?
- Penebangun de tok tekawal an kikayat rensak alam. Bahas isu adeh.



Planetarium Negara

1. Planetarium Negara berupe pusat penedidik angkase negara ku Kuala Lumpur. Pusat adeh secare rasmi bibukak ku umum ku 7 Februari 1994. Neujud Planetarium Negara adeh kiperneng senunggoth kerajaan ku penebangun sains ru teknolujji negara.
2. Pungsi utame pusat adeh mongloh ha persui seneidar penenteng sains angkase ku kenalag masarakat ru memulak langkah kateh kianj negara ke duniak angkase.
3. Tenarek utame Planetarium Negara monglah:
 - a) Pawagam tenayang angkase ru pilem pormat entoi.
 - b) Galeri de kipamer injin kapal angkase Arianne IV de berupe salah nanek injin de bigunak ha penelancar MEASAT 1, satelit petame Malaysia nu angkase lepas.
 - c) Mong teleskop 14 inci de betempat ku menara tinjau.
 - d) Mong jugak Stonehenge mini ku rual Planetarium Negara ru kiog kenenjip ku pungunjong.



Ektiviti

1. Kernal pasti ayat penyata ku kemil, telas ajeh ui 10 ayat penyate de kilek.
2. Gunak renujuk tenamah, kek isik bekenae MEASAT 1 ru bentang kateh kelas.

5.2.1
3.4.2

Kenukoh

Bacak Canuk Label Caknak

Hik senalo hibelik caknak jioi jename de biiklan ku medie massa. Tapik ma de biiklan pek tentuk bekuqualiti ru behasiat. Hik hodloh mong lemu penanei ha pileh ru bacak label caknak.

Berikut empat penandu asas ha bacak label caknak:

1	Lasik protein	Minimum 10 gram protein nujap henidag.
2	Gek gulak	Kurang 0.5 gram nujap henidag.
3	Gek lemak	Minimum atao gek 3 gram nujap henidag.
4	Rendah kalori	Agok lebeh 100 kalori.



1. Kalori ialoh unit neukor ha tenage.
2. Kalori bigunak ha jane tenage sengoi nujis.
3. Kalori nujis bisaran ha sengoi antare 1600 lei 2000 kalori.
4. Keknot kalori nujis de benelebeh an kikayat obesiti.

Nutrition Facts

5 servings per container

Serving size **1 (200g)**

Amount Per Serving

Calories 290

	% Daily Value
Total Fat 10g	13%
Saturated Fat 0g	0%
Trans Fat 2g	
Cholesterol 0mg	0%
Sodium 50mg	2%
Total Carbohydrate 30g	11%
Dietary Fiber 5g	18%
Total Sugars 5g	
Includes 0g Added Sugars	0%
Protien 20g	40%
Vitamin D 3mcg	15%
Calcium 260mg	20%
Iron 1.8mg	10%
Potassium 470mg	10%

Adeh jumlah caknak de bisukat ha nanek henidang.

Jumlah kalori kateh nanek henidang.

Jumlah lemak kateh nanek henidang.

Jumlah gulak kateh nanek henidang.

Jumlah Protein kateh nanek henidang.

* The % Daily Value (DV) tells you how much a nutrient in a serving of food contributes to a daily diet. 2,000 calories a day is used for general nutrition advice.



Ektiviti

1. Kateh kumpolan, beh kenaji caknak de mong ke kerileng engkek.
2. Telas ajeh, bentang kateh kelas.

UNIT 24

Kibese Jenaye Kateh Duniak Peneniage



Cerngai ru Belwal

Peneniage Macot de Buleh Bicebor



Ektiviti

1. Jijoi gambar ku kemil, og pendapat engkek bekenae peneniage de buleh bipileh ru gunak neungkap de sesuei.
2. Og pendapat engkek, yama kerajaan beusaha kiperyos lebeh jeoi peniage ru usahawan katehkenalag masarakat hik?



Menacak

Dato' TPr. Suki Mee: Usahawan Berjaye

Dato' Suki Mee nanek muh de tok aseng katehkenalag masarakat Orang Asli. Ilei berupe numom usahawan de berjaye ru kijadik cuntoh katehkenalag mai hik. Dato' Suki kiyos ku 29 November 1964. Iapak, Mee Bin Dumat ru iamek, Wak Melah d/o Sagap berupe mai Semai. Ilei beasal ju Kampung Orang Asli Chinggung, Tanjong Malim, Perak.



Dato' Suki kikep penedidik imulak ku Sekolah Kebangsaan Behrang, Tanjung Malim, Perak. Telas ajeh, ilei kicerot iberajal ku Sekolah Menengah Hamid Khan, Tapah (Tingkatan 1 lei Tingkatan 3) ru Sekolah Menengah Teknik, Ipoh (Tingkatan 4 lei Tingkatan 5). Ilei kibejaye lanjut ipelajaran ku Institut Teknologi Mara (ITM) Shah Alam kateh bidang Diploma Perancangan Bandar dan Wilayah. Telas ajeh, kicerot ipelajaran ku Universiti Teknologi Malaysia (UTM) Skudai, Johor kateh bidang Ijazah Sarjana Muda Perancangan Bandar dan Wilayah ru kicerot nej ipelajaran kateh bidang Ijazah Sarjana Falsafah Sains Pembangunan ku Universiti Kebangsaan Malaysia, Bangi, Selangor.

Peksendok Ilei telibat kateh bidang peneniage, ilei mong jeoi kiberkep kenenjip kerjak telas dij kiberajal rah bekerjak sebegei Penolong Pegawai Perancang Bandar ku Dewan Bandaraya Shah Alam (tahut 1986) ru ku Dewan Bandaraya Kuala Lumpur (tahut 1988 lei tahut 1989). Telas ajeh, ilei kijawat jenawat sebegei Pegawai Perancang Bandar ku Jabatan Perancang Bandar dan Desa, Kuantan, Pahang (tahut 1989 lei 1993) ru sebegei Penolong Pengarah Jabatan Bandar dan Desa ku lengrik Perak (tahut 1993 lei tahut 1999). Bemulak tahut 1999 lei hunen, ilei kibukak peneniage ilei sebegei Juru Perunding Perancang Bandar Profesional Berdaftar (TPr) ku Firma Perunding DIGI PLANNERS, Ipoh, Perak.

Selaen berjaye kateh bidang peneniage, Dato' Suki jugak kiog senumbang de entoi kateh penetuboh ru persatuan (NGO). Iantare ialoh sebegei Pengerusi Persatuan Orang Asli Perak (POAP), Pengerusi Koperasi Orang Asli Perak (KOAP), Pengerusi Yayasan Orang Asli Perak (YOAP), Timbalan Presiden

Persatuan Orang Asli Malaysia (PSOA), Naib Presiden Persatuan Pembangunan Orang Asli Malaysia (MOADA) ru kekilek.

Dato' Suki mimang kibeharap dek masarakat mai hik lebeh jeoi de telibat kateh bidang peneniage. Jijoi ilei, mong jeoi lenebeh amen hik cebor bidang adeh rah mase de bebas, mampuk perhuj tahap ekonomi peringak, hik kep beh ektiviti peneniage jijoi minat ru cenempet lihik ru tok bikawal ya pitak neatas. Selaen ajeh, hik buleh bantuok bangsak ru peringak ru kep kitawar peluang kerjak nu mai hik serte perhuj imej bangsak. Bongsat ilei nu masarakat hik de hod telibat kateh bidang peneniage ialoh hodloh mong lemu penanei ru cenempet bekenaet bidang peneniage ajeh. Ku sampeng ajeh hodloh senalo perhuj penanei ru cenempet jijoi heknok penasar semase. Selaen ajeh, hik hodloh tekun ru rajit beusaha ru mong modal de cukup atao mong kawat kungsi de buleh bipeccayak. Hik jugak tok buleh renggah, hodloh panei rancang ru kawal peneuros kewangan, panei belwal nu mai kilek ru uros pekerjak ru bor.

Anugerah kiterimak

- Pingat Pekerti Terpilih (PPT) ya DYMM Paduka Seri Sultan Perak Darul Ridzuan (tahut 1996)
- Ahli Mahkota Perak (AMP) ya DYMM Paduka Seri Sultan Perak Darul Ridzuan (tahut 2004)
- Darjah Paduka Mahkota Perak (PMP) ya DYMM Paduka Seri Sultan Perak Darul Ridzuan (tahut 2009)
- Darjah Dato' Paduka Mahkota Perak (DPMP) ya DYMM Paduka Seri Sultan Perak Darul Ridzuan (tahut 2010)
- Bintang Ahli Mangku Negara (AMN) ya Yang Dipertuan Agong (tahut 2013)
- Ahli Setia Darjah Kinabalu (ASDK) ya TYT Yang Di-Pertua Negeri Sabah (tahut 2018)



Ektiviti

1. Bacak maklumat ku kemil ru beh renumos jijoi neutame.
2. Jawab senual penengham ku kerop adeh:
 - a) Dato' Suki Mee kibeasal ju belok?
 - b) Ma bongsat Dato' Suki nu mai hik de hod telibat kateh bidang peneniage?
 - c) Jijoi peniker engkek, begehharok Dato' Suki buleh bejaye kateh bidang peneniage ru kiog senumbang nu masarakat hik?



Menules

Karnival Usahawan Orang Asli (KUOA)

Karnival Usahawan Orang Asli (KUOA) bemulak ju tahut 2009. Karnival adeh berupe neanjor pehak Jabatan Kemajuan Orang Asli (JAKOA). Karnival adeh kiog jeoi manpaat de bor ku usahawan Orang Asli teutame lienai de naijoi karnival adeh. Peneanjor karnival adeh jugak kep senambot de bor ju masarakat.



Matlamat Karnival:

1. Berupe nanek platform ha promusi produk-produk masarakat Orang Asli.
2. Peryos lebeh jengoi usahawan kateh kenalag Orang Asli.
3. Kigalak masarakat Orang Asli ha beh ektiviti peneniage koperasi.
4. Pekenal 18 suku kaom Orang Asli.
5. Pekenal budaye masarakat Orang Asli nu masarakat kilek.
6. Pekenal peluang peneniage de boleh mai nyennyam hik cebor.

Ektiviti de mong:

1. Jenual produk-produk Orang Asli rah sempog, caknak, herbe, penehidmat ru penelancong.
2. Penesembah budaye rah sewang, teknaj ru menasak.
3. Penetanding rah petput, karaoke, band ru kekilek.
4. Penamer rah kerjak teg, kebudayaan, penakei, pekenal 18 suku kaom ru penecayak Orang Asli.



1. Jijoi maklumat ku kemil, peterang pendapat engkek ma lenebeh peneanjor Karnival Usahawan Orang Asli ajeh?

Ektiviti

2. Kateh kumpolan, bincang ru og idie begehharok hik boleh her minat mai nyennyam ha joi karnival rah adeh?



Seni Engrok

Lenateh Usahawan

Lenateh usahawan berupe pruses ha perhuj lemu penanei kateh mentok lenateh, krusus, seminar atao bengkel de bisediak ya kementerian kateh bebegei bidang. Antare bidang lenateh ajeh ialoh peneuros kewangan, penepasar, tadbir uros koprat, motivasi, peneuros am ru kekilek.


Kementerian atao agensi kianjor lenateh atao krusus ha usahawan betenujuk ha perhuj lemu penanei ru cenempet keusahawanan ha perkus peneniage lienai. Ku kerop berupe kementerian ru agensi de bitawar lenateh atao krusus usahawan:

1. **Lembaga Pemasaran Pertanian Persekutuan (FAMA)**
 - * Program Bimbingan Usahawan
 - * Program adeh an pelenkap dirik usahawan ru cenempet ru penanei ha perhuj tahap profesionalisme usahawan kateh bidang penepasar.
2. **Perbadanan Usahawan Nasional Berhad (PUNB)**
 - * Program Pembangunan Usahawan dan Latihan
 - * Betenujuk ha perhuj penanei ru cenempet keusahawanan ha perkus peneniage.
3. **Institut Keusahawanan Negara (INSKEN)**
 - * Program Membina Blog Pemasaran dalam Talian
 - * Betenujuk ha og penanei bekenaeet peneniage joi internet ru teknik perkus blog penepasar.
4. **Kementerian Pembangunan Usahawan (MED)**
 - * *Professional Training and Education for Growing Entrepreneurs (PROTEGE)*
 - * Program lenateh keusahawanan ru kebulehpenasar ha kimentok ru kibimbing belie ru kerjaksamak pakar industri. Adeh kateh usahe kiperyos lebeh jeoi usahawan de besediak nu penasar global. Selaen ajeh, ha mai de ceryak kerjak de mong cenempet dek buleh kitampung penerlu industri semase.
5. **SME Corp. Malaysia**
 - * Program Tunas Usahawan Belia Bumiputera (TUBE)
 - * Betenujuk ha pegalak jenerasi belie ha cebor bidang peneniage. Program adeh jugak ha pesiap belie de hod mulak peneniage de naimong daye tahan ju segik mental ru pizikal ru bidedah ha cenabar duniak peneniage ibentol.



Ektiviti

1. Jijoi maklumat ku kemil, beh dailog begehharok engkek hod ej kawat engkek ha joi nanek krusus ku kemil?
2. Kernal pasti krusus de sesuei ju potensi engkek ru peterang idie ru engrok de bor serte berdil.



Hasel Tani Punce Berengkep

Bah Rizal kihod wawancare Batin Razak Bin Beretong sebegei tokoh mai kampug de bejaye kateh peneniage. Ilei kihod permuj wawancare adeh kateh blog ilei.

- Bah Rizal: Bor huper, Batin Razak. Eng Bah Rizal ju Kampung Ayer Denak.
- Batin Razak: Bor huper.
- Bah Rizal: Abor haknuk eng ngucap nu enjun mende sudi biwawancare. Buleh enjun kernal ru og panei latar kenog enjun.
- Batin Razak: Eng Razak Bin Beretong. Eng beasal ju Kampung Padang Lalang, Karak, Pahang. Eng ju suku kaom Temuan. Penedidik sekolah rendah eng bemulak ku Sekolah Rendah Sungai Dua, Karak ru besekolah menengah ku Sekolah Menengah Karak.
- Bah Rizal: Buleh enjun cerite sejarah kenenjip kerjak enjun?
- Batin Razak: Peksendok eng beniage, jeoi kerjak de eng ngbeh. Eng pernah bekerjak kontrak. Telas ajeh, eng joi krusus Giat Mara neanjor Jabatan Hal Ehwal Orang Asli (JHEOA) kateh bidang mekanik. Dij krusus eng bekerjak ku bengkel mutu ku Kuala Lumpur seleneu empat tahut. Telas ajeh, eng kerjak hotel ku Kuala Lumpur. Eng kep kerjak tetap sebegei Pembantu Am Bank Simpanan Nasional ku Kuala Lumpur ju tahut 1994 lei tahut 2007.
- Bah Rizal: Wah, jeoi kerjak de enjun beh ya! Lempu enjun mulak bilantek sebegei batin ru telibat kateh bidang peneniage?
- Batin Razak: Eng bilantek sebegei batin Kampung Padang Lalang ku tahut 2006. Ju kenjehloh eng mulak cetcet telei. Hasel jenual telei agak lumayan. Eng beh penutos berentik kerjak ku bank ru og tenumpuk nu kerjak sebegei batin ru betani.
- Bah Rizal: Buleh enjun peterang ma peneniage de enjun beh?
- Batin Razak: Eng cetcet telei ru eng jugak og genalak nu mai kampug dek cetcet telei. Eng og benih pecume nu mai kampug. Ju pajehloh, eng mulak jadik peraih telei. Eng belik telei nu mai kampug sekitar Bentong. Telas ajeh, eng jual telei-telei ajeh ku Chow Kit, Pasar Borong Selayang ru sekitar Rawang. Eng jugak pernah ngjadi pembekal telei ha pasaraya Giant ku Kuantan.
- Bah Rizal: Mesti lumayan berengkep enjun ka. Ma bengsat enjun ku mai nyennyam de beminat kateh bidang peneniage teutame kateh bidang penetani?
- Batin Razak: Eng mimang galak mai nyennyam dek naicebor bidang penetani ru peneniage adeh. Amen hod cebor bidang adeh, hik hodloh mong minat, sanggop berajal atao kot krusus-krusus kateh bidang penetani.
- Bah Rizal: Ma rusiye jenaye ru ma henarap enjun nu masarakat hik?
- Batin Razak: Ku eng amen hik hod bejaye kateh bidang peneniage hik tok buleh sagak, hod berajal care-care belwal, jagak penetampel ru hodloh panei uros kewangan. Eng beharap lebeh jeoi mai nyennyam telibat kateh bidang penetani mende bidang adeh buleh kiog berengkep de lumayan ru kep ubah tahap ekonomi mai hik.
- Bah Rizal: Abor haknuk ha kerjaksamak enjun. Eng ngharap enjun teros maju jaye.
- Batin Razak: Samak-samak.



1. Jijoi wawancare ku kemil, beh ayat sensual gunak prasa ru bebegei banse ayat de pintan kaha beh wawancare tokoh peneniage de kilek?
2. Jijoi maklumat ku kemil, hurei isik-isik penteng bekenat bidang penetani de buleh kijadik sumber berengkep de lumayan ku mase hunen ru mase nungar?

Ektiviti

UNIT 25

Usahe ru Tamah Berengkep



Cerngai ru Belwal

Luri Caknak



Ektiviti

1. Jijoi gambar ku kemil, og kaedah de sesuei ha promosi nunanek benarang dek laku.
2. Og peniker engkek ma peneniage de boleh bicebor ha tamah berengkep senampang ru bincang ku kateh kelas.



Menacak

Hobi Berkep Berengkep

Erna ru Tisah ialoh kawat sekolah. Ubai bebincang ha tajok manpaat blog ku masa hunen de biog ya cikgu Bahasa Semai.

Erna: We ... ma hek beh?

Tisah: Oh, hek panyak Erna! Mahentok be, adeh tengah ha seryap kerjak kumpolan ha subjek Geografi. Hek nek ma hek beh madeh?

Erna: Yok ... sembelok hek sip. Har biog kerjak ya Cikgu Shira ka? Adeh eng tibak madeg hek ha bincang sensual kenarang ha manpaat blog ku mase hunen.

Tisah: Oh, ye. Nasibloh mong hek peingat ha eng, amen tok mesti har bidendak ya cikgu huper. Jok le ha bincang hunen.

Erna: Ku penengham hek ma ajeh blog?

Tisah: Blog ialoh nanek laman web de bitules ha nunanek neulas atao berite bekenae isu-isu semase, politik, caknak ru mong jugak mai bigunak blog sebegei cenatat peribadi. Kateh blog mai boleh bipermuj gambar, bideo, laguk ru audio ha menarek minat pembacak rual.

Erna: Wah, panei jugak hek ha bekenae blog ye!

Tisah: Lemu adeh kenak hik kek ru berajal, senalo eng ngbacak ku Internet ha lemu-lemu pai ru eng berajal. Selaen ajeh, mong jugak eng tanyak mabek tetenek eng.

Erna: Boleh hek terang nu eng ma manpaat blog adeh? Maklum le eng adeh gek lemu penane ha blog adeh. Hekloh penyelamat eng. Hi ... hi ... hi ...

Tisah: Hek ... Erna agok kenjip rendah dirik nej, tokma mong eng. Doh samak-samak har bebincang ru berajal lemu pai adeh. Amen ha panei blog adeh boleh bijadik hobi ru jeoi imanpaat. lantare manpaat blog ialoh medan ha penules naipetinkat menampuk idirik. Ju blog hik jadik lebeh aktip ha joi penekembang semase teutame ku duniak digital. Nuurag penules blog hodloh senalo naijoi penekembang ha beh inovasi pai kateh penetules blog masig-masig.

Erna: Okey ... okey eng panei. Eng mong idie. Selaen ajeh, manpaat blog adeh jugak boleh hisumbang idie ru berajal tules isik-isik cerite de menarek. Kadang-kadang idie de bitules an kijadik inspirasi nu mai kilek samakmong kaha tamah lemu penane ataoopen ha penetules blog mai kilek nej. Betol ka Tisah?

Tisah: Betol le ajeh. Eng ya ngurok ka idie an kihol amen har bebincang samak-samak. Ku sampeng ajeh jugak, blog boleh bijadik tempat mai kiasar produk. Pengguna blog senalo enai panei care ha her pembacak ha promosi barang-barang enai. Secare tok langsung ju blog mai boleh naikek sumber berengkep de lebeh senang.

Erna: Ye Tisah. Tok ajeh taleh, blog kijadik alternatip ha memanfaatkan hobi ku alam maya. Penules blog jeoi enai kungsi hobi de bebegei ru boleh kijadik idola nu mai kilek. Sebegei cuntoh penules blog kikungsi bekenae menasak rah tutorial. Adeh kiog peluang nu pembacak de genmar memasak naitamah lemu penane kateh menasak.

Tisah: Wah, jeoi jugak idie har adeh. Eng kenjip sernuk jis adeh mende kep kungsi peniker ru hek Erna. Bei har tules isik-isik de har bincang kateh gertas nok. Huper doh cikgu kior bentang ku ngar kelas.

Erna: Betol engrok hek ajeh Tisah. Telas dij ha tules doh, eng ha juk madeg kayat ya dui.

Tisah: Hoooh le.




1. Bacak dailog ku kemil ru beh serengkol ha manpaat blog nu penggunak.
2. Beh lenakon joi dailog ku kemil gunakan intonasi suarak de betol.

Ektiviti



Motivasi ru Inspirasi



Nehajap nyiknyuk nealas ha capei jenaye. Sengoi de kiusahe besunggoh-sunggoh kaha ubah isinui an kikep igenanjar. Lingah atao deras ajeh begantong nu reski de biog ya Nyenang. Sebegei sengoi biasak, hik bior beusahe ru agok putos ase.

Mungken jeoi mai pek panei ha kisah pemilik produk tenusu Farm Fresh de bejaye kipasar susu nu merate Malaysia bemulak ru senusah sinui. Salah nuurag pemegang saham had entoi ha produk Farm Fresh adeh bermuh Encik Azmi Zainal. Kisah beliau bemulak 10 tahut entem. Bebegei dugaan ru kenerlak tepaksak bitempoh ya pengasas produk tenusu terkenal ku Malaysia adeh lei kibejaye ku perinkat antarebangsak.

Beliau kimulak ru kiperis 60 ikor lembu sebegei penemulak ru kibelik susu ju penternak ru kingeng stok nu rimdij negara kigunak bas ekspress taleh. Beliau jugak kibej jenual ku ransom-ransom mase mulak kilibat dirik kateh duniak keusahawanan. Ku iberkes nej, beliau kijual susu ku tapak pasar malam ru pasar tani. Ku masa ajeh, beliau kigunak kerite kancil kaler rengai sebegei tenenbot ha jual iproduk susu.

Nehajap isinui tok kibergut isemangat ha teros kiusahe alaopen senalo bilug ru binye ya mai kerileng. Nyiknyuk taleh teu mat kijot, maruah jugak bijebat tapik beliau tok kikenal ceti alah. Jijoi kenenjip beliau de terik adeh, beliau kibeazam kaha og senumbang nu rimdij mai de hajap. Beliau tok pernah kisip nujap mase de kilalui ru kisedar iasal usul.

Tiktok jenaye walah usahe. Amen hik hod jadik mai bejaye kisah ju sedara Azmi Zainal adeh buleh hik jadik inspirasi nujap insan. Nujap penejuang mesti mong penekurban. Amen ya hik bejaye agok sip mai ku kerop ru senalolah tulog mai de hajap ru ikhlas.

(Sumber: <http://majalahlabur.com/inspirasi/kisah-kejayaan-pengasas-farm-fresh>)



Ektiviti

1. Jijoi artikel ku kemil, senarei kate-kate hikmat de sesuei ru hurei kigambar jenim ku kemil.
2. Tules wawancara jijoi cerita ku kemil.



Terosloh Penejuang hek

Lined writing area for student responses.

Rangkap 1

Penyajak kinyate isengik de sedeh mende genagal sinui de tebeg ru masalah. Penyajak kigambar isengik begei sagop jeruek, kelap ru tok kipasti manik atao tok. Ijiwak had becelaru ru ikelop beserabot.

Rangkap 2

Penyajak kineng kerileng, cep-cep naiheg naijug nu ensop enai, kenon pug naibese amek enai ru itandak jis kaha kelem. Jenim adeh kigambar ya penyajak kenitar sinui sengoi de hod hik terimak mende tenentuk Nyenang.

Rangkap 3

Penyajak kiserangik nu rahuk, gecek ru perloi senalo becahaya kiog henarap tiktok manik ku kelem ajeh. Jenim adeh kigambar ya penyajak sinui hik ru tebeg pancaroba hodloh hitempohi alaopen jeoi kenerlak. Penyajak kiged deras putos ase hod teros jerjar, besemangat bese ma de iimpi. Penyajak kiharap alaopen kateh empok, kior kekjet ru hikus pejadik empok ajeh kenyataan.

Rangkap 4

Penyajak kikekjet engrok jeknot teu manik ku kemil pelog. Manik kibehentik telas kikeranj tik ya manah sot. Pek leu cedau kikaler ijis de cerah. Penyajak kigambar jenim adeh ku sebalik senusah pasti mong ibernor. Penyajak kior terosloh jadik de tebaik alaopen seribuk masalah de kikerlak. Penyajak kiharap cet azam de lasik ru bedoaloh semoge Nyenang kirestu penejuang de mong idaknij ku pigoidoh.



Ektiviti

- Bincang kateh bergu, beh sajak jijoi ceti de biog ku kemil.
- Beh ektiviti kateh kelas:
 - Nujap kumpolan hod bentang ru bacak sajak de bibeh.
 - Kumpolan kilek hod og neulas ru kritikan.



jeruek iceti ijis kelap kaha manik



Deras ru Pantas

3G 4G

9:47 AM



Hai, adeh Cik Lisa ka?

Ye, eng adeh. Buleh eng bantuk cik?

Eng Lini. Eng ha tanyak, cik bukak tenempah koi ka jis adeh? Eng neng mong iklan bingeng nu kumpolan whatsapp sekolah, jadik eng ha tempah koi ju Cik Lisa.

Ye betol Cik Lini. _____

Eng ha tempah koi badak berendam RM20.00, popia kanj RM10.00, karipap RM10.00, tepung pelita RM15.00, donat RM15.00 ru onde-onde RM10.00.

Wah, jengoi koi Cik Lini tempah adeh! _____

Ye, eng tempah jeoi mende ha sedekah nu jiran-jiran eng. Tok salah hik kungsi reski nu mai kilek. Selaen ha erat henubog ru jiran hik jugak hod jeoi besedekah nu mai dek berkat. Ku kerop adeh alamat eng jiran-jiran eng.

1. No. 57, Jalan 5, Taman Murni, Tapah Road. Puan Lini-karipap ru badak berendam.
2. No. 52, Jalan 5, Taman Murni, Tapah Road. Puan Ayu – popia kaanj.
3. No. 40, Jalan 7, Taman Murni, Tapah Road. Puan Lettha-donat.

Tapik nanek taleh eng ha besat alau hek og koi-koi de eng tempah adeh _____

Baik Puan Lini, eng tok pasal muh Puan de kiog koi-koi adeh cumak eng an pasal mong mai kaha kungsi reski taleh. Eng an pasti koi loi ku alamat de betol.


Had anen ka tenempah Puan Lini _____ Adeh no akuan eng maybank 10287654390. Eng an anj koi Puan pukul 5.00 berkes. Abor haknuk.

Hooh had anen taleh. Samak-samak.



1. Bacak dailog ku kemil ru permuj ayat perintah de sesuei kateh genares kusong.
2. Beh dailog ha besat ma-ma produk gunakan laras engrok de sesuei.

Ektiviti



5.1.2
5.3.3



Kenukoh

Tamah Reski

beniagak secare dalam talian



menules bob (e-book)



**CARE-CARE
HA TAMAH
BERENGKEP**

penehidmat ngengneng caknak



pemandu e-hailing



Beh neulas jjoi maklumat de biog.

Ektiviti

UNIT 26

Kewangan



Cerngai ru Belwal

Mat Duet ku Asia Tenggara



Malaysia



Brunei



Vietnam



Myanmar



Kemboja



Filipina



Thailand



Laos



Indonesia



Singapura



Timor Leste



Ektiviti

1. Neng semiyak jadual ku kemil bincang ru kernal pasti negara ru mata wang de betol.
2. Jijoi peniker engkek, yama nilei mata wang nu jap negara bebize?

1.3.1
3.2.3



Mat Duet Gertas Malaysia

Nujap negara mong mentok mata wang lienai ru tok kecuali negara hik. Neunik budaye ru wenares serte neindah alam semula jadik negara kijadik sumber inspirasi kateh rika mentok mata wang gertas Malaysia. Tema 'Neunik Malaysia' siri keempat duet gertas Malaysia adeh kipapar ekspresi tradisional beilham seni ru yas teg, neajaib alam semula jadik, plora ru pauna, ekonomi ru tradisi.

Ciri-ciri Am

Ku nungar duet Malaysia na bikekal potret Yang di-Pertuan Agong pertama iajeh Al-Marhum Tuanku Abdul Rahman ibni Al-Marhum Tuanku Muhammad. Selaen ajeh, turot biangkit bungak raya Rosasinensis sebegei bungak kebangsaan ru songket tenunan tradisonel.

Ku iknog nej, jap duet kipapar ciri-ciri alam semulak jadik, tradisi, budaye, plora, pauna ru ekonomi de kusus ha Malaysia.

Speksifikasi teknikal			
Denominasi	Substrat	Neukor	Kaler
RM100	gertas	150 mm × 69 mm	mat setar
RM50	gertas	145 mm × 69 mm	belaar-belaer
RM20	gertas	145 mm × 65 mm	jingga
RM10	gertas	140 mm × 65 mm	ceher
RM5	polimer	135 mm × 65 mm	belaar
RM1	polimer	120 mm × 65 mm	belaer

Duet Gertas RM100: Neajaib Alam Semula Jadik

Nar neajaib semula jadik negara biisytihar sebegei Tapak Wenares Duniak ya Pertubuhan Pendidikan, Sains dan Kebudayaan Bangsa-Bangsa Bersatu (UNESCO) bipapar ku duet adeh.



Neajaib alam semula jadik adeh ialoh Taman Kinabalu ru Gunung Kinabalu ku Sabah. Selaen ajeh, penementok mercu batu kapur de rual biasak ku Gunung Api, Taman Negara Mulu, Sarawak turot kijadik ikon.

Duet Gertas RM50: Penetani ru Teknoloji

Jeer sawit ru bioteknoloji sebegei ikon ekonomi Malaysia. Jeer sawit berupe sumber ceknet utame ju segik ekonomi mende Malaysia sebegei pengeksport jeer sawit duniak. Bioteknologi teros kiperhuj giknei komoditi adeh kateh renantei nilei ru iseteros kisukong sektor penetani, penekilang ru penehidmat.



Duet Gertas RM20: Sinui laot

Nar spesies penyu de tekenal ru had mong ku laot Malaysia mongloh Penyu Karah (*Eretmochelys imbricata*) ru Penyu Belimbing (*Dermochelys coriacea*) de jugak berupe lambang sinui laot de bebegei. Penyu Karah senang bikernal ru nyinyoi de lengkung ru igetek bejerkeh. Penyu Belimbing nej mong getek cegeh ru tujoh jalor ku ihok.

**Duet Gertas RM10: Plora**

Hutan tropika Malaysia berupe salah nanek hutan hujan de engrak ku duniak ru mong bebegei banse bungak. Antare bungak de ikonik mongloh bungak manor (Rafflesia). Spesies adeh mulak-mulak biterbuk ku Hutan Simpan Royal Belum ku tahut 2003. Bungak adeh bikermuh *Rafflesia Azlan II* sempene muh Sultan Perak, Duli Yang Maha Mulia Paduka Seri Sultan Azlan Muhibbuddin Shah ibni Almarhum Sultan Yussuff Izzuddin Shah Ghafarul-Lah.

**Duet Polimer RM5: Menatang Ces**

Cep Enggang Badak (*Buceros rhinoceros*) ialoh nanek spesies cep yag teentoi ku duniak. Cep adeh kijadik simbol kenuat ru beranik ha masarakat pribumi Sarawak.

**Duet Polimer RM1: Sukan tradisonel**

Mennan wau berupe sukan tradisonel masarakat ku pantei timur nanek manah entem. Mennan wau adeh tekenal ku Kelantan ru Terengganu ru biman ha samot hasel keknej bak de bor.



(Sumber: https://www.bnm.gov.my/microsites/2011/banknotes/index_bm.htm)

**Ektiviti**

1. Baca nepetek ku kemil ru jawab senual ku kerop:
 - a) Ma neunik mata wang Malaysia?
 - b) Yama mata wang Malaysia biui pai?
2. Jijoi peniker engkek, mongka sistem bater lekat releven hunen?



Menules

Renangsang Ekonomi Negara

sukong peneniagak
mai pasak

sukong dasar
kerajaan

belik benarang
tempatan

isik rimdij penekerjak
ru mai pasak

bebelanjak kateh
negara

sediak modal
ru dana

melancong kateh
negara



Ektiviti

1. Secare kumpolan, hurei nujap kaedah renangsang ekonomi negara secare semiyak.
2. Nyate paedah renangsang ekonomi ku negara?



Seni Engrok



AUDIO 17

Eng Insan de Alpa

Nar tahut canuk, nanek penutos de nyeh eng ngkot ru jebat jug nu pejabat Agensi Kauseling dan Pengurusan Kredit (AKPK). Eng walah nong ha selesi masalah kewangan de nghadap mase jeh. Nujap kelem eng tok buleh ngbukbet serakngik masalah des. Senalo eng betebebeg teu mat ru ngterhan kenjip selei berog ru mental. Eng akuk nong de ngpileh mongloh nong de silap ru ngjoi sengik litau. Rimdij adeh mongloh bepunce ju penegunak kad kredit ru care de salah.

Eng lekat ngserakngik tahut petame eng ngkerajak ngkenjip cengkuk. Eng ngkep belik bebegei benarang de ngidam. Mase jeh jugak eng buleh ngkirip belanja nu amek ru ngdek gek daknek. Lei nanek jis, mong nunumom ejen bank kitawar eng ngkot kad kredit. Imulak eng ngnyek tapik ilei kiej kior kot mende buleh higunak bile perlu.

Niat asal ngkot kad kredit ajeh ngha gunak isik senem petrol kerite. Pek leu ju kenjeh eng begei tok bedisiplen mende eng nggunak kad ajeh ha belik ru bayar bebegei pekare. Nyiknyuk nanek taleh kad kredit eng nggunak tapik lei nik kad kredit ngrakes. Alau nanek kad kredit bisekat ya bank eng lekat mong nar kad nej.

Selang sepuluh gecek telas eng nggunak kad kredit, loi memerip surat ju bank. Kateh surat ajeh kisemanj eng bayar jumlah tetunggak penegunak kad kredit bejumlah RM20 ribuk kateh mase nugecek. Genagal bayar des eng buleh biistihar bankrap. Mase ajeh jugak eng walah duet daknek nunoh. Gaji eng jugak tok cukup mende jeoi komitmen. Kerite pen ya nar gecek tok ngbayar. Eng ngcubak semanj tulog nu kawat ru peringak tapik jenawab de ngkep betol-betol pehot sengik. Lei nanek jis eng ngkenjip ngha gu pinyap nu lintah darat tapik sengoh nghek nej.

Mujor mong nuurag kawat kiog cenadang ku eng et nu pejabat AKPK ha uros ru ha susut des. Kawat eng kipeder AKPK mongloh nanek agensi de bituboh ya Bank Negara ha tulog nunumom uros kewangan secare cetak.

Hunen eng kenjip benyawa nej. Eng ha ucap abor haknuk ku AKPK mende agensi adeh na kisusot nej des ru komitmen eng nujap gecek. Sinui eng betamah bor ju peksendok adeh. AKPK jugak mong kiog bengsat peneuros kewangan de betol. Adehloh nanek peneajar begunak ku eng. Bebelanjak biorloh bepade ru tok hijoi sengik.



- *Des* iceti hutag
- *Cengkuk* iceti serbe cukup
- *Rakes* iceti bolot
- *Hek* iceti tejerat



1. Beh dailog ru lakon jijoi cerite ku kemil ru og serengkol de engkek kep.
2. Jawab sensual ku kerop:

Ektiviti

- a) Senarei memerip komitmen penules.
- b) Begeiharok penules patot kaha uros ikewangan cetak.



Tatamengwal

Logo Bank Negara



BANK NEGARA MALAYSIA CENTRAL BANK OF MALAYSIA



Allahyarham Tun Ismail bin Mohamed Ali berupe kenon watan Malaysia petame de bilantek sebegei Gabenor Bank Negara Malaysia telas Tan Sri William Howard Wilcock (1959-1962) de besare wajib. Beliau biperyos ku 16 September 1918 Port Klang, Selangor. Peksendok bilantek sebegei Gabenor Bank Negara Malaysia, beliau pernah kisansang jenawat Pengarah Eksekutip ku Bank Pembangunan Antarabangsa ku Amerika Syarikat. Kenenjip kateh sektor perbankan rual negara kijadik beliau bepenanei ha selok-belok bidang kewangan ru peneuros. Ku tahun 1962, beliau bilantek secare rasmi sebegei Gabenor Bank Negara Malaysia ru behidmat seleneu 18 tahun iaajeh lei 1980. Senumbang de entoi beliau mongloh kepekernal sistem kewangan de telus, beakauntabiliti, beintegriti ru mong penenyampe de berdil.

Selaen ajeh, beliau jugak berupe individu betanggungjawab de kipekenal logo Bank Negara Malaysia. Beliau kikep ilham dek pai bijadik sebegei logo rasmi bank negara. Motif adeh bikot ju gambar pai ku duet cerenlep emas Melayu Kelantan iaajeh duet cerenlep teawal Kesultanan Melayu. Penegunak cerenlep emas adeh sekitar abad ke-16 lei 18 masihi.

Logo bank de kiperneng gambar poi, matjis ru kenon gecek bijadik logo rasmi ku tahun 1964. Matjis kilambang kuasak manakale kenon gecek kilambang ugame Islam sebegei ugame rasmi Malaysia.



BANK NEGARA MALAYSIA



1. Bacak nepetek ku kemil ru kek ayat aktip, telas ajeh tukar ayat aktip nu pasip.

Ektiviti

2. Ru gunakan renujok Pusat Sumber Sekolah, ma peranan Bank Negara Malaysia jijoi renujok ru catat isik-isik bekenae kateh bob?



UNIT 27

Kelestarian Alam Sekitar



Cerngai ru Belwal

Bersamak Lestari Alam Sekitar



Persatuan Pencinta Alam Malaysia (MNS)

- Kikot inisiatip ha pelihare ru pulihare alam sekitar joi penedidek.
- Kisebar senedar nu masarakat ha nilei alam semulak jadik jijoi peneterbit *Malaysia Nature Journal*.



Jabatan Alam Sekitar (JAS)

- Kitadbir ru kikuatkuasak Akta Kualiti Alam Sekitar.
- Kicegah, kikawal penecemar ru kiperhuj kualiti alam kerileng ru undang-undang de bekenaeat.



Pertubuhan Sahabat Alam Sekitar Malaysia (SAS)

- Kiog penehati kateh penedidek, penejagak, senelamat, penepuleh ru tanggungjawab ku isu-isu alam kerileng.
- Og senedar ku masarakat Malaysia an penenteng penejagak alam kerileng.



Jabatan Perhutanan Semenanjung Malaysia (JPSM)

- Kiuros progrem perhutanan semulak.
- Kiwarta taman negara, hutan simpan ru taman marin.
- Kiuros renawat sivikultur.



World Wide Fund For Nature (WWF)

- Kiog senedar nu mai jengoi ha penenteng penejagak alam kerileng.
- Kiuros masalah-masalah bekenaeat penepelihare, kenaji ru penepuleh alam kerileng.



Ektiviti

1. Jijoi bahan ku kemil, hurei peranan penetuboh bekenaeat alam kerileng ru beh serengkol.
2. Kateh kumpolan, og pendapat engkek ru pendapat mai kilek ha care-care mai jengoi ha naijagak alam kerileng.



Menacak

Bei Kernal Geopark Lembah Kinta

Ma ajeh Geopark?

Geopark berupe nanek was de mong lenuas de sesuei, sempadan de pintan ru mong memerip tapak wenaes geologi. Tapak wenaes geologi ajeh mong penenteng ku perinkat kebangsaan, serantau atao antarebangsak. Wenaes geologi ajeh jugak boleh biperkus secare lestari ha perhuj ekonomi ru nilei budaye ipendudok teutame kateh ektiviti penelancong.

Geopark Lembah Kinta

Lenuas Geopark Lembah Kinta kirak-kirak 1,952 kilometer persegi kiliputi nar daerah iaajeh daerah Kinta ru daerah Kampar. Konsep Geopark Lembah Kinta nyiknyukloh terhad nu sumber wenaes geologi taleh tapik jugak termuj wenaes biodiversiti, arkeologi, sejarah, kesenian ru budaye. Kateh hal adeh, nujap wargak ru rimdij elemen de mong kateh was Geopark Lembah Kinta berupe komponen utame Geopark Lembah Kinta.



Antare Geotapak Geopark Lembah Kinta

1. Gunung Panjang, Gunung Datok, Gunung Kanthan, Gunung Korbu ru kekilek
2. Lata Ulu Cepor, Hutan Lipur Ulu Kinta, Jeram Papan ru kekilek
3. Gua Tambun, Gua Naga Mas, Gua Kandu, Gua Tempurung

Antare Produk Tempatan

1. Produk Limau Bali ru produk galug
2. Kuih kelamai, lemang periuk kera, Tauge Buntong ru Ayam Garam Ipoh

Antare muzium ru bahan sejarah

1. Muzium Perlombongan Bijih Timah Kinta, Muzium Gopeng, Muzium Geologi ru kekilek
2. Kapal Korek Tanjung Tualang, Kellie's Castle, Istana Raja Billah
3. Masjid Panglima Kinta, Masjid India, Masjid Kampung Paloh ru kekilek
4. Dewan Bandaraya Ipoh, Stesen Keretapi Ipoh ru kekilek

(Sumber: Jabatan Mineral dan Geosains Malaysia, Perak)



Ektiviti

1. Bacak maklumat ku kemil ru ui serengkol.
2. Jijoi peniker engkek, ma penenteng penetuboh Geopark ku Malaysia? Beh renujuk tenamah kateh Internet.



Menules

Akekchep Santuari Ikan Kelah Ku Sungai Tiang

Perbadanan Taman Negeri Perak na bekerjaksamak ru TNB Research Sdn Bhd (TNBR) ha beh kenaji bekenat sumber kak ku Taman Negeri Royal Belum. Perbadanan Taman Negeri ru TNBR na naiujud Akekchep Santuari Ikan Kelah ku Kampung Sungai Tiang. Santuari adeh biuros ya penduduk suku Jahai ku Kampung Sungai Tiang ru bibeh jijo modul ju sistem Tagal Sungai Maroli, Luanti, Ranau, Sabah. Memerip urag penduduk Kampung Sungai Tiang na bianj lenawat ku Tagal Sabah. Lenawat adeh betenujuk ha bekungsi kenenjip ru wakel peneuros Koperasi Pelancong Sabah (KOPEL) ha jenaye kateh bidang eko penelancong.

Objektip Penetuboh Akekchep Santuari Ikan Kelah:

1. Platform penekungsi penane peneuros sumber kak nu Orang Asli Sungai Tiang.
2. Ha kipupok senedar na penenteng sumber kak nu masarakat Orang Asli.
3. Ha kijagak ru kiperhuj benilang kak ku Sungai Tiang.
4. Ha perhuj tarap ekonomi penduduk Kampung Sungai Tiang ru kiujud akekchep, was tengroj ru rekreasi.
5. Ha pelihare ru kiperes kak kelah secare semulak jadik ku Sungai Tiang ha tenuju penelancong.
6. Kisediak penehidmat chalet nu pelancong.

Ju program adeh jugak na bituboh Koperasi Orang Asli Sungai Tiang de berupe koperasi mai hik petame ku Royal Belum. Orang Asli Sungai Tiang na biog lenateh ha peneuros koperasi ru bilateh ha jadik pemandu pelancong.

(Sumber: Perbadanan Taman Negeri Perak)



Akekchep iceti agok
(kateh engrok Jahai)



Ektiviti

1. Jijoi maklumat ku kemil, ma dil nu penduduk Jahai Kampung Sungai Tiang ru penetuboh Akekchep Santuari Ikan Kelah ajeh?
2. Jijoi peniker engkek, begehharok penetuboh pusat santuari ku Malaysia boleh kipelihare ru pulihare menatag ku mase nungar?



Seni Engrok



AUDIO 18

Pelihare Alam De Bor

Duniak bor tebeg tenenang,
Dol kazanah cenipte ya Nyenang,
Yama hunen sengoi tok kenang,
Alam birusak hod sinui senang.

Alam adeh bijagak mai raknak,
Lienai panei tok tenilei ihergak,
Jeoi kazanah tok tekirak,
Hodloh sepakat teros hijagak.

Petahan alam agok bipunah,
Ajehloh bingsat ya mai manah,
Alam de bor nanek anugerah,
Amen hitamak nyeploh kazanah.

Bumik adeh alam de kayak,
Serag ru lod hertak behergak,
Bor ru hebat tenarek duniak,
Jeoi ibernor hodloh bijagak.

Serag sumber herbe behasiat,
Punah serag nyeploh itempat,
Petahanloh mende ibernor sarat,
Terosloh pekekal jadik amanat.

Bor alam negara an megah,
Rimdiij perusak hodloh bitegah,
Hodloh petahan alaopen payah,
Ku mase nungar negara an gah.

Adeh hertak anugerah Nyenang,
Nu mai nyennyam hod bipeterang,
Alam hod jagak tokloh senang,
Pemusnah alam hodloh bitentang.

Haknuk alam behloh jasad,
Teros pekekal agok teagak,
Teros hik bela agok hisagak,
Dek tejaman wenares mai raknak.

Perkusloh alam ru seimbang,
Rimdiij aspek hodloh petimbang,
Lestari alam ru nus de tenang,
Ku mase nungar nus tok bimbang.



Ektiviti

1. Bacak syaer ku kemil ru besual jawab secare lisan bekenaeet bahan ajeh.
2. Jijoi bahan ku kemil ru bahan benacak de kilek, cipte nanek rankap syaer de mong dil eknej ha hijagak alam kerileng.



Tatamengwal

Ayat Seru

Wak Sarita, Wak Kila ru Yok Ayen habeh penebincang bekenaet kerjak kumpolan ku sekulah.

Wak Sarita: Wak Kila ru Yok Ayen, jerkek kep ka maklumat ha kerjak kumpolan hik?

Wak Kila: Eng mong ngkep bahan kateh bob ru Internet.

Yok Ayen: Eng pen mong jugak ngkep bahan. Eh, ku belok nota eng deh!

Wak Kila: Yok, hek sip ngeng ka!

Yok Ayen: Oh, pai ngsarakngik! Eng dek nota eng kateh fail adeh.

Wak Kila: Sembelok hek adeh! Senalo sip taleh rah mai raknak.

Wak Sarita: Borloh amen mong. Tajok penebincang hik ialoh Lestari Alam Kerileng. Wak Kila hek kep ka iceti?

Wak Kila: Mong, eng ngkep iceti kateh Kamus Dewan. Lestari iceti tok beubah, kekal atao tetap. Lestari Alam Kerileng iceti ialoh hik pelihare alam kerileng de kekal rah asal.

Yok Ayen: Amboi, hebat hek ya Wak Kila! Cereg iceti.

Wak Sarita: Begei ajehloh mureb cuntoh. Senalo besediak ru bahan-bahan de hod. Hek nej Yok Ayen? Kep ka care-care kilestari alam kerileng?

Yok Ayen: Mestiloh mong. Care petame ialoh pergek peknej. Hik hodloh neamal kitar semulak. Selaen ajeh, pergek jugak penecemar udare. Agok hik tod ked secare tebukak.

Wak Kila: Wah, jeoi isik hek kep! Cetak jugak hek.

Wak Sarita: Betol, bor isik de hek kep! Eng ngkep isik kuinik, pergek penegunak benarang pakei pej. Penegunak barang pakei pej adeh kijadik puncak denakut ked ru kirusak alam kerileng.

Wak Kila: Eng pen ngkep nanek isik iaajeh hik hodloh gunakan sumber tenage de gek bahan cemar rah gunakan teknolugi mesra alam begei tenage solar atao tenage pinui.

Yok Ayen: Nanek nej isik ialoh hik agokloh besipat unghah. Amen hik belik barang belikloh joi penerlu taleh.

Wak Sarita: Eng ngkenjip lei padehloh canuk penebincang hik. Hik cerot henlep doh. Wak Kila, hek ceryak isik usaha-usahe kilestari alam kerileng.

Hek nej Yok Ayen ceryak isik penenteng kilestari alam kerileng. Eng habeh serengkol.

Wak Kila: Hik buru henlep ya. Cip abor.



Ektiviti

1. Jijoi dailog ku kemil, kernal pasti ayat seru de bigunak. Beh ayat kilek gunakan ayat seru de engkek kep.
2. Jijoi isik-isik de biog iaajeh care-care kilestari alam kerileng, beh ayat henurei ju nujap isik.

5.1.2
5.5.2



Kenukoh

Objektip Hari Alam Sekitar Negara

Kijadik budaye ru kipupok senedar katehkenalag masarakat teutame kateh penepelihare ru penepuleh alam kerileng.

Ha promusi penedidek ru senedar alam kerileng secare luas.



HARI ALAM SEKITAR NEGARA

"Alam Sekitar Tanggungjawab Bersama"

Kisediak platform nu wargak Malaysia ha besamak-samak hayati alam kerileng.

Iktirap nu lienai de og senumbang ru jasak ku penepelihare ru penepulih alam kerileng.



Ektiviti

Jjoi bahan ku kemil, beh ayat henurei ha nujap ayat topik ku kemil.

UNIT 28

Belaar Tik Hik



Cerngai ru Belwal

Ceknet Peberseh Udare



Kening Labah-Labah

- * Bepungsi buleh kiserap bahan kimia formaldehida ru xilena.
- * Kening mesra alam ru tiktok toksik bahaye ha menatag ru sayet.

Kening Peace Lily

- * Bepungsi sebegei pembasmi udare ju banse racut rah aseton, ethly acetate, ammonia, bensol, methanol, xilena, formaldehydedan trikloroetilen.
- * Senang bijagak ru kisui er ku was tedeh ru isuhu kertik.



Kening Lidah Mertua

- * Bepungsi buleh kiperceleh kadar benzena, xilena ru toluene ku udare kateh deg.
- * Bikernal jugak imuh pokok ular kisui ru kibetahan rimdij suhu.

Kening Getah

- * Bepungsi buleh kiserap karbon monoksida, formaldehida ru triklorentina.
- * Tok sesuei amen hibelak kucig ru cok.



Kening Palma Areca

- * Bepungsi buleh kiserap racut kayat habok de tebal ru partikel bebahaye ju rual deg.
- * Sesuei ha dekorasi ru iselak kemik serte mong dil tenenang.



Ektiviti

1. Jijoi gambar ku kemil, ceknet ma de buleh hik cet ku mentil deg ru cerite kenenjip engkek?
2. Jawab senual penengham ku kerop ru tules jenawab engkek kateh bob tules.
 - a) Og peniker engkek bidang kerejak ma de sesuei ha ceknet?
 - b) Nyate samakmong engkek beminat atao tok kateh bidang ceknet ru jelos yama?
 - c) Bincang secare bergu, ma ceknet de buleh kiog penulang de lumayan ru og peneterang?



Lemu Peindah Mentil Deg

LEMU LANDSKEP

Bidang landskep berupe nanek bidang de bekenae ru pengajian sains ru seni de kitekan petalian ku antare alam bahneh ru alam semulak jadik. Landskep beceti penerancang ru rike mentok tik ru teu ha genunak awam. Landskep jugak buleh bidefinisi sebegei nanek nengneng lenuar atao permukaan bumik ku kemil darat de bihasel ju jenim semulak jadik atao bahneh. Landskep hodloh birike mentok secare menarek ru padan ru was de bihod hias. Rike mentok landskep mongloh beceti pileh ru susut elemen-elemen landskep rah tenumboh, struktur, teu ru batu-bate ha ujud ruang ku was rual. Rike mentok landskep had penteng kateh bahneh nunanek landskep dek was de bibeh landskap ajeh bor ru menarek besesuei ru heknod isengoi.

ELEMEN-ELEMEN LANDSKEP

Mong bebegei banse tenumboh bicet kateh nunanek landskep iaajeh tenumboh bigunak ha pelembut seni bahneh cegeh rah bangunan. Selaen ajeh, tenumboh de bicet mongloh ha peindah was ju segik mentok, kaler ru tekstur dek menarek. Ku sampeng ajeh, tenumboh jugak buleh kiujud kerileng de harmoni serte kikerlag ju penandang de binyek. Tenumboh jugak kiman pungsi ha kawal suhu ru iklim ku nunanek was serte kikawal henakis ru kipetinkat erner tik. Tenumboh landskep jugak mong nilei-nilei estetika ju cirik de kusus rah mentok, kaler ru tekstur de menarek. Icuntuh teu kep kipelembut suasane, kiperserengek kerileng ru kihasel engrok de nyaman. Selaen ajeh, teu jugak kep kiperindah was kerileng kateh mentok kulam, teu pancut ru teu talag bahneh. Landskep buleh bicerlah nu nar banse iaajeh rah cenan, bareh ru darat manakale bahneh sengo rah busut macot, batas ceknet, kulam-kulam ru kekilek.

PUNGSU TENUMBOH KATEH LANDSKEP

Bebegei banse tenumboh de bigunak kateh landskep ha og neindah ru ibernor kateh landskep ajeh. Tenumboh penteng ha og dil de menarek nu landskep. Ju segik pizikal tenumboh bigunak ha kawal henakis ru sebegei penelindong ju penantol matjis de tok bor ru tenghol pinui serte kiog tenedeh ju bengket matjis. Selaen ajeh, tenumboh kitermyul ala nong nu mai cip jug. Ju segik estetika nej, tenumboh kep kimentok ruang rual nunanek bangunan ru kirangke ru kibingkai nengneng. Penegunak tenumboh kateh landskep kep kipelembut nengneng seni bahneh bangunan serte kibeg bangunan ru struktur ru permukaan bumik. Tenumboh jugak kipesatu nu bebegei elemen kateh nunanek was.



Ektiviti

1. Bacak nepetek ku kemil ru beh renumos jijoi neutame.
2. Kernal pasti ayat topik kateh perenggan ku kemil.



Menules

Program Kempen Belaar Bumik

Kipeleop suhu bumik ru kipergek bengket global.

Kipergek penecemar udare.

Paedah Laksane
Kempen Belaar Bumik

Ekosistem tekawal ru stabel.

Kiujud jenim berseh,
nyaman ru tenang.



Ektiviti

1. Bincang secare bekumpolan, petimbang cenadang isik-isik ku kemil samakmong ha terimak atao tok ru og cenadang isik de kilek.
2. Susut isik-isik penteng de biterimak ru beh kenarang gunak tandak bacak de betol.



Seni Engrok



AUDIO 19

Anggerik Serag

Wahai Si Anggerik bungak orkid
indah imuh seindah ibungak
indah ku nengneng seindah iulah
beseri tapik had nyanyak ceeng tiktok
tok senang higei bile tepesone Si Bungak Anggerik
penandang nunoh betaut ku sengik.

Wahai Anggerik serag bebegei kaler
jadih henias ku mentil deg
bisat ku enteh tandak na yog ku isengik
anggerik bileu bijagak rah kenon sayet
dek kisui mekar ku taman harmoni.


Wahai Anggerik pemikat jiwak
alaupen Anggerik penileh mai de setia
kekadang hek sip perneng er bungak hek
haj seril na mulak kinandang
bile kikenang anggerik de tok kitepati ijanyik.

Wahai Anggerik Si Bungak Orkid
kisui megah ru penateh de lasik
senalo bebungak mekar kekal tiktok
loi imase kiselei ru kidat jugak
ajehloh resam sinui ku duniak
namun tetap bipuja secengreg iumor.



Ektiviti

1. Bacak nujap rangkap sajak ru hurei ceti tesurat ru tesirat.
2. Beh neucap kateh kelas bekenae neindah flora ku serag ru gunakan gaye neucap de mong neindah engrok.



Tatamengwal

Penjodoh Benilang



























- Jijoi gambar de biog tules penjodoh benilang de betol ru beh ayat jijoi laras engrok de sesuei.
- Pileh belok-belok gambar ku kemil ru beh ayat eknej kaha berkep nunanek pekare kateh mentok dailog patik.

Ektiviti

5.3.3
5.2.3



Kenukoh

Bei Cet Bungak Matahari



Ektiviti

Jjoi maklumat ku kemil, tules care-care ceknet bungak matahari gunak ayat lilei.

UNIT 29

Malaysia ku Mat Duniak



Cerngai ru Belwal

Kuiz Malaysia Eng

1.	Bok atlet mai hik de kiwaket Malaysia kateh bidang sukan?
2.	Bok angkasawan petame negara?
3.	Ku tahut merip Malaysia kijadik tuan deg Sukan Komanwel?
4.	Bok rakyat Malaysia petame de kitakluk Gunung Everest?
5.	Kermuh tujuh pusat penelancong lod lasik ku Malaysia.
6.	Sabah mong memerip pulau.
7.	Nyatekan senumbang Malaysia kateh neaman duniak.
8.	Bok muh Yang Dipertuan Agong Malaysia hunen?
9.	Merip lasik Gunung Kinabalu ku Sabah?
10.	Kermuh nik suku etnik de mong ku Sabah ru Sarawak.



Amen betol 5/10 hek
hodloh jeoi benacak.

Amen betol 7/10
hek de bor.

Amen betol 10/10 hek
birel bor ru hek rakyat
Malaysia bernor.



Ektiviti

1. Jawab senual ku kemil kateh mase bitetap ya cikgu.
2. Yama hik hodloh peke ru pekare bekenaeet negara?

1.4.3
3.2.2



Malaysia Negara Aman

Malaysia berupe nanek negara de kikus telas kicapei kemerdekaan. Rakyat negara adeh jugak beuntong mende naicapei penekembang kateh bebegi bidang rah penedidek, senihat ru menajuk ekonomi. Kualiti sinui de bor adeh kimentok kerileng de bor ru selamat ha rakyat hik ataopen rakyat rual de naigei ku negara hik.


Pekare adeh kep bibukti ru kenaji de biui ya Indek Keamanan Global atao kateh Bahasa Inggeris bikernal sebegi *Global Peace Index (GPI)*. GPI berupe nanek produk de biperhol ya Institut ha Ekonomi ru Keamanan (IEP) ha sukut giknei relatif nunanek wilayah ikusus bekenaet aspek neaman. Indek adeh biberkus ru kerjaksamak ru penebincang besamak panel antarebangsak de tedirik ju pakar lemu neaman ju bebegi Institusi Kajian Keamanan ju bebegi perinkat. Mong 153 negara telibat ju kenaji adeh ru lenapor petame biperhol ku tahut 2007. Malaysia mulak bisenarei kateh lenapor adeh bemulak tahut 2017.

Jijoi lenapor ya GPI bemulak tahut 2017 giknei Malaysia ku rangkal ke-29. Selang nutahut giknei negara hik betamah bor iaajeh rangkal ke-25. Tahut 2019, giknei negara betamah bor nej iaajeh ku giknei ke-16 perinkat duniak. Lenapor 2019 jugak kidek Iceland sebegi negara nombor petame had aman ru selamat. Malaysia nej berupe negara ke-3 de bor ku Asia telas Jepun ru Singapura.

Lenapor GPI adeh had penteng ku nunanek negara mende kisukat giknei negara ku perinkat duniak. Hal adeh an kiog genambar ku pelabor ru pelancong atao pehak bekepenteng ha politik, ekonomi ru sosiel ku negara hik. Negara de selamat an kiher pelabor ru pelancong naitibak ru secare tok langsung kijane ekonomi. Negara-negara rual jugak an beminat beh henubong diplomatik iseteros kipekukoh muh negara ku perinkat duniak.

Iserengkol, ha jadik nanek negara de majuk ru aman hodloh hik hodloh sukong dasar kerajaan. GPI sebegi jehuk senukat buleh kidek negara hik ku landasan de betol. Jadik negara aman jugak hamaka kep mentok duniak de aman ku perinkat global.

Negara bekaler belaa berupe negara neamanan de lasik manakale bekaler rengai mongloh neaman de kertik.



Ektiviti

1. Bacak nepetek ku kemil ru ui serengkol.
2. Jijoi peniker engkek, ma an tejadik amen walah kestabelan kateh negara?



Menules

Benua Asia ku Duniak

Benua berupe tik darat de birel entoi ku kemil bumik. Secare umom, mong tujuh benua entoi ku duniak iaajeh Afrika, Amerika Utara, Amerika Selatan, Asia, Eropah, Oceania ru Antartika. Nujap benua ajeh mong neunik lilei ju segik budaye, sosiel ru bebegei nej. Penebize adeh nyiknyukloh nanek kenerlag tapik berupe nanek ruang ha hik kernal nanek samak kilek. Malaysia mong ku di benua Asia. Asia belenuas lebeh 44 juta kilometer persegi ru terdirik ju bebegei negara. Jap negara mong ibangsak ru budaye de bebize.



Jengoi negara ku duniak mongloh lebeh kurang 196 negara.



1. Gunak renujok tenamah, pileh nanek negara kateh Asia ru ui kenaji secare kumpolan.
2. Telas ajeh, senarei muh-muh negara de mong ku benua Asia.



Seni Engrok

Ngbelah Lenaot


Laot gu tenang ru manik kibeansor nyep. Nujam jugak eng behempas pulas ha kawal kapal ju ombak de besengoh. Eng na separoh nong ha lei nu penamat ku Awana Porto Malai. Seleneu 100 jis eng ku lenaot ru bebegi cenabar eng tempoh. Sukor eng lekat biog kengwat pisikal ru mental ha tempoh rimdij cenabar.

Nong de eng ngjoi adeh mongloh nong de Datuk Azhar Mansor kijoi secare solo kikerileng duniak. Penelayar ilei bemulak ku 2 Februari 1999 ju Pulau Langkawi nu Barat, telas ajeh teros nu Timur. Cenabar ilei birel entoi mongloh cenol kapal layar begot ku Cape Town, Afrika Selatan. Bikayat ju kemalangan ajeh, jadual penelayar ilei tegangguk lei kiperdij penelayar seleneu 190 jis. Penelayar ilei kiliputi 21600 batu nautika ru kilei nu Awana Parto Malai ku 11 Ogos 1999. Ku penamat ilei bisambot ya Perdana Menteri ru rakyat Malaysia. Mase jeh eng lekat sayet. Rimdij rakyat Malaysia bangga ru jenaye ilei.

Selaen ju Datuk Azhar Mansor sebegi idola, mong nar urag nej de senalo kiog eng kengwat. Amek eng senalo kidoa senelamat eng. Sumber semangat nunar mongloh Sir Viktor ju sekolah menengah nej. Jap noh ku kateh senalo eng jadik sengoi tenanyak ilei.


“Ramli, mong merip lenaot ku duniak adeh?” senual Sir Viktor. Kerog berog eng ha jawab. Ajehloh kenenjip eng ku sekolah menengah. Ju kenjeh jugak eng mulak ngminat berajal ha duniak bekenat benua, negara ru bebegi-begi nej. Sir Viktor jugak mong kibual alao hek hod ha neng duniak belayorloh.

Kenenjip de pek boleh eng sip mongloh secengreng eng belayar eng ngjoi nong laot Segi Tiga Bermuda ru Jurang Mariana de penoh misteri. Nar tempat adeh mong icerite lilei. Mong nanek tempat eng joi bingeng ya kak lumbe-lumbe. Ibernor alam cenipte Nyenang. Eng ha jadik sengoi Semai petame kerileng duniak ru eng ha beh muh Malaysia ku tekenal ku mat duniak. Tok eng sip jugak nu pehak-pehak de enai taja penelayar adeh. Walah enai belok mungken eng boleh belayar.



1. Bacak cerpen ku kemil ru bincang watak ru pewatakan.
2. Beh kenaji ju bebegi sumber bekenat misteri laot Segi Tiga Bermuda ru Jurang Mariana?

Ektiviti



Perak Man ku Lembah Lenggong Kep Peneiktirap UNESCO

Ku 30 Jun 2012, Lembah Lenggong biiktirap sebegei Tapak Wenares Duniak ya Pertubuhan Pendidikan, Sains dan Kebudayaan Bangsa-Bangsa Bersatu (UNESCO) mende was adeh berupe giknei teawal prasejarah ku Malaysia. Peneiktirap adeh kiuker muh negara kateh pete arkeologi ru penelancong duniak.

Tenibak sengoi ku Lembah Lenggong bemulak kamerek nar juta tahut entem. Hal adeh kibukti lembah adeh na kijadik peradaban sengoi de had engrak ku rual benua Afrika. Lembah adeh kijadik penerhati masarakat arkeologi duniak ju kerangke sengoi de bijumpak ru bikernal sebegei Perak Man. Selaen ajeh, bijumpak jugak bengkel bahneh pekakas jaman Batu Paleolitik.

Perak Man berupe rangke nunumom keral ru icengreg 154 sentimeter. Ilei bijumpak bicop kateh keadaan nar ijuk bilipat nu ienteh besamak 2878 kalok de ya bicereh. Turot bijumpak jugak bebegei spesies menatag de birag serte pekakas kilek. Jijoi kenaji lebih lanjot, Perak Man mong cenacat jenetik ru bipestayak kidat ku umur sekitar 40 lei 45 tahut. Care bicop de penoh adat kiperneng ilei mong peranan penteng kateh masarakat purbe ajeh.

Eskavasi ru penyelidek de komprehensif ku Lembah Lenggong biui seleneu 20 tahut bemulak 1987. Kerangke Perak Man bijumpak mase eskavasi ku Gua Gunung Runtuh ru berupe kerangke purbe paleng lenkap na bijumpak. Selaen ajeh, jeoi artipak na biterbuk termuj bepuluh ribu pekakas batu, tembikar, ru gangse ku memerip tapak de na bigei sengoi ju jaman batu.




1. Kernal pasti ayat dasar kateh nepetek ku kemil. Telas ajeh beh 10 ayat jijoi engrok muh ku kemil.

Ektiviti 2. Ma belakuk amen sejarah biabai ru tok bihergak?



Kenukoh

Zon Ekonomi Eksklusif Malaysia



1. Zon Ekonomi Eksklusif (ZEE) ialah zon de bitetap ru biiktirap ya Konvensyen Bangsa-Bangsa Besatu ha undang-undang laot ku belok-belok negara. Negara ajeh mong hak-hak has bekenaeet penerokaan ru penegunak sumber.
2. Zon adeh kijangkau senyak 200 batu nautika ju genares pantei ha nunanek negara.
3. Zon adeh jugak berupe hak denaulat nunanek negara.



Ektiviti

Ui nanek bob skrap bekenaeet penenteng Zon Ekonomi Eksklusif ku negara.

- Penenteng ZEE ha nunanek negara mongloh:
 - i. Sempadan perairan.
 - ii. Eksploitasi sumber marin.
 - iii. Eksploitasi sumber protein.
 - iv. Penerokaan petroleum.
 - v. Banebas kapal belayar.

LENATEH

Sensual 1

Kemurungan atao *depressive disorder* ialah nyaknyik mental de kijadik punce sengik nunumom tok stabel. Adeh an kijejas sinui nuranis nunumom ajeh termuj peniker, kenjip ru kelakuk. Amen kemurungan adeh tok perlai ru bor buleh kidurong nu tenindak perdat dirik.

Antare punce belakuk kemurungan adeh ialah tenekan de bepunce ju kenenjip rah dendat ahli peringak, gagal kateh peperiksaan atao weswes apak amek. Selaen ajeh, kemurungan jugak bepunce ju nyaknyik kronik rah epilepsi (sawan), selot ru kanser. Boleh jugak belakuk dil ju penyalahgunaan dadah, genunak penglai atao masalah peribadi.

Tandak atao gejele kemurungan adeh ialah senalo kenjip sedeh, jenjam, selei, pehod ku berog, kenjip sek tok menentuk, cubak cedere dirik ru kekilek. Mong langkah-langkah ha hik buleh beh ha bantu numom de mong masalah kemurungan adeh. Iantare ialah pegalak numom ajeh belwal ru mai de boleh bipercayak rah apak, amek, peringak, kaunselor sekolah atao guru ugame. Selaen ajeh, hik buleh og cenadang dek ilei ha kep benantuk ju numom de lebeh sesuei ru layak rah doktor, ahli psikologi ru pakar psikiatri.

Kemurungan berupe nyaknik de serius tapik lekat buleh perlai. Masarakat ru peringak hodloh naikot serius an nyaknyik adeh mende nyaknyik adeh buleh kianj masalah de lebeh niknej. Hik hodloh hikot perenglai ru gej ru bebincang ru doktor amen hisedar penerubah ku kenjip rah nyaknyik kemurungan.

(Sumber: www.MyHealth.gov.my/mental)

Jawap sensual penengham ku kerop:

- a) Ma iceti kemurungan?
- b) Ma ipunce belakuk kemurungan?
- c) Hurei langkah-langkah ha hik buleh bantu nunumom de mong masalah kemurungan.
- d) Jijoi peniker engkek, ma idil amen nyaknyik kemurungan adeh tok perlai ru gej?
- e) Amen engkek mong kawat de mong gejele kemurungan, ma tenindak engkek?

Sensual 2

Jawap sensual ku kerop:

a) Beh nanek ayat gunak nekate de biog ku kerop adeh.

i. Perhuj

ii. Perwir

iii. Pekenan

iv. Perdat

v. Perceleh

b) Cerlah ayat majmok kateh nepetek ku kerop adeh ku ayat tunggal.

Besenam kep perhuj cenerdas pizikal ru perbor koordinasi berog. Bersenam jugak kep perhuj tenage ha beh kerjak nuranis ru pergek tenekan mental. Tenekan behip ru jantung jugak boleh kijadik tekawal amen hik senalo besenam.

c) Bacak nepetek ku kerop ru semiyak. Telas ajeh, kategori ayat kateh nepetek jijoi banse ayat.

Kawat-kawat semuak! Beminat ka engkek ru bidang peneniage? Bidang peneniage berupe nanek bidang de buleh kiog berengkep de lumayan. Amen engkek beminat, hik hodloh ceryak lemu penanei bekenat bidang peneniage de biminat. Agok hiselei ha tuntot lemu. Begeiharok icare ha ceryak lemu penanei kateh bidang adeh? Hik buleh joi kursus atao bengkel bekenat peneniage de jeoi bitawar ya kerajaan atao NGO. Beiloh hik rebot peluang kateh bidang peneniage!

Sensual 3

Kateh nujap ayat ku kerop mong nanek senalah neije. Gares ru pebetul senalah neije kateh ayat- ayat ku kerop.

No.	Ayat	Jenawab
1.	Nar deneng deg pangsasuri kos rendah musnah teruk bikayat ya ngej.	
2.	Rosli kitulog ikej de kawit ajeh terbor imoto ku padeg.	
3.	Was pendalaman ajeh kijadik tenumpu pelancung telas nukumpulan penyelidek najjumpak fosil menatag purba.	
4.	Penyaer tekenal ajeh kideklamasi sajak de indah mase majelis peneresmi Mingguk Bahasa.	
5.	Penesiap ha senambut Hari Keputeraan Sultan Selangor ya bibeh kateh timpoh de bitetap.	
6.	Kem Bina Semangat ajeh bijangka kep kiog jeoi manpaat nu para peserte.	
7.	Kumpulan pengakap ajeh bekerjaksamak naiseryap rakit ru gunak awat kateh mase de bitetap.	
8.	Sanraj ya kibeh lenapor pulis bekenait siknij kerite kelemnek.	
9.	Aisyah ya limak tahut betugas sebegei nuurang misi ku hospital kerajaan.	
10.	Rakyat Malaysia hodloh kisukong penelaksane kempin anti-dadah de bianjor ya pehak kerajaan.	

Sensual 4

Kateh nujap ayat ku kerop mong nanek senalah tandak bacak. Gares ru pebetul senalah tandak bacak kateh ayat-ayat ku kerop.

No.	Ayat	Jenawab
1.	Puan Aina kibelik beg teg de bejename ku butik tekenal ajeh	
2.	Pehak bekuasak an kitinkat ekosistem ku taman negara pahang de kayak ru sumber plora ru pauna.	
3.	Ahli jawatankuasa Persatuan Sejarah betungkus lumus naibeh penesiap ha senambot Hari Kemerdekaan ke 60.	
4.	Abekdek, eng ngsip seryap kerjak sekolah de biog ya Cikgu Eta.	
5.	Bah Ali kijual bebegei banse pelek rah sempak semegu rambei larah ru cupu.	
6.	Begeiharok care-care ha pupok semangat kejiranan nu masarakat ku mase hunen.	
7.	Mesyuarat Panitia Bahasa Semai ajeh bipengerusi ya encik jalal a/l kudin selaku ketua panitia.	
8.	Agok berebut-rebut mase belik caknak ku kantin sekolah, urok Encik Murad Cikgu Disiplen.	
9.	Selaen ajeh hik hodloh sui berseh teg hik gunakan sabun de bisediak ku sinki.	
10.	peneresmi kedei serbaneka ajeh biperdeh mende jeoi masalah de peksik biselese.	

Sensual 5

Bacak nepetek ku kerop ru jawab sensual de biog.

Jasak Pemimpin

Isesungguh, nilei penepadu ajeh cukop mehal mende ibahneh kikit mase de had leu tapik ha itahnek penepadu ajeh buleh belakuk nukelip mat. Ikusus jenerasi pai amen enai gagal naipaham penejuang pemimpin mai manah.

Hik kot engrok Tunku Abdul Rahman mase peneistihar kemerdekaan negara “Mulak 31 Ogos 1957, (hik) an jadik negara bedaulat ru demokratik ha nuleneu-leneu de bibeh jijoi prinsip benebas ru neadil serte senalo pejuang kebajikan ru senejahtere irakyat.”

Tunku Abdul Rahman ju mulak nej kitekan penepadu, kiteliti sejarah manah kateh usaha beliau ha berkep kemerdekaan negara. Hal adeh turut bisukong ya memerip pemimpin kilek rah Tun V.T. Sambanthan ru Tun Dato’ Tan Cheng Lock.

Jijoi kontrak sosiel de bihasel ya pemimpin manah entem, rakyat ku negara adeh hodloh hurmat ugame masig-masig tanpa hibiari penebize idealogi kijadik pemisah nerukun penepadu.

Kisedar betape penteng penepadu masarakat benilang kaom ku negara adeh, penepimpin Tunku Abdul Rahman ru pemimpin utame masarakat Cerawas ru Lel naimuktamad kontrak sosiel ha pasti menemakmur negara serte hak masarakat bebilang kaom ru ugame negara adeh tejamen.

(Bikot ru biubah suei ju *Berita Harian*, 17 November 2018)

- (a) Ma iceti demokratik?
- (b) Begeiharok care-care ha pekekal penepadu negara?
- (c) Peterang secare ringkas tenuju kontrak sosiel bibeh?
- (d) Og peniker engkek, ma an belakuk amen rakyat ku negara adeh bebize idealogi?

Skema Jenawab

Sensual 1

Jawap sensual penengham ku kerop:

- a) Ma iceti kemurungan ?
 - Kemurungan ialoh nyaknyik mental de kijadik punce sengik nunumom tok stabel.
- b) Ma ipunce belakuk kemurungan?
 - Punce belakuk kemurungan ialoh tenekan de bepunce ju kenenjip rah dendat ahli peringak, gagal kateh peperiksaan atao weswes apak amek.
 - Selaen ajeh, kemurungan jugak bepunce ju nyaknyik kronik rah epilepsi (sawan), selot ru kanser.
 - Boleh jugak belakuk dil ju penyalahgunaan dadah, genunak penglai atao masalah peribadi.
- c) Hurei langkah-langkah ha hik boleh bantuk nunumom de mong masalah kemurungan.
 - Pegalak numom ajeh belwal ru mai de boleh bipercayak rah apak, amek, peringak, kaunselor sekulah atao guru ugame.
 - Selaen ajeh, hik boleh og cenadang dek ilei ha kep benantuk ju numom de lebeh sesuei ru layak rah doktor, ahli psikologi ru pakar psikiatri.
- d) Jijoi peniker engkek, ma idil amen nyaknyik kemurungan adeh tok birawat ru gej?
 - mai nyik tok kep tenumpu ha beh kerjak atao beh tenugas nuranis
 - mai nyik an behalusinasi atao delusi
 - senihat berog an tejejas
 - henubog ru mai kerileng tejejas
 - prestasi akademik tejejas
 - boleh belakuk peristiwa perdat dirik
- e) Amen engkek mong kawat de mong gejala kemurungan, ma tenindak engkek?
 - og senukong ru senalo mong ku sisi kawat
 - pegalak kawat ha kot renawat
 - pegalak kawat joi forum bekenat kemurungan
 - agok kritik atao og peniker kemurungan ajeh berupe senalah lienai

Sensual 2

Jawap sensual ku kerop:

- a) Beh nanek ayat gunakan nekate de biog ku kerop adeh.
 - i. Perhuj

Bebegei usehe bibeh ya kerajaan ha perhuj ekonomi negara.

ii. Perwir

Hik hodloh senalo hijagak senelamat dirik ha perwir belakuk pekare de tok bor

iii. Pekenan

Bebegei program bilaksane ya Pusat konservasi rah program pekenan menatag ces.

iv. Perdat

Litau ajuh na bicap ya pulis mende ilei perdat ikawat.

v. Perceleh

Besenam an kep perceleh tenekan behip ru mental nunumom.

b) Cerlah ayat majmok kateh nepetek ku kerop adeh ku ayat tunggal.

Besenam kep perhuj cenerdas pizikal ru perbor koordinasi berog. Bersenam jugak kep perhuj tenage ha beh kerjak nuranis ru pergek tenekan mental. Tenekan behip ru jantung jugak boleh kijadik tekawal amen hik senalo besenam.

- Besenam kep perhuj cenerdas pizikal.
- Bersenam kep perbor koordinasi berog.
- Bersenam jugak kep perhuj tenage ha beh kerjak nuranis.
- Bersenam pergek tenekan mental.
- Tenekan behip jugak boleh kijadik tekawal amen hik senalo besenam.
- Tenekan jantung jugak boleh kijadik tekawal amen hik senalo besenam.

c) Bacak nepetek ku kerop ru semiyak. Telas ajuh, kategori ayat kateh nepetek jijoi banse ayat.

Kawat-kawat semuak! Beminat ka engkek ru bidang peneniage? Bidang peneniage berupe nanek bidang de boleh kiog berengkep de lumayan. Amen engkek beminat, hik hodloh ceryak lemu penanei bekenat bidang peneniage de biminat. Agok hiselei ha tuntutan lemu. Begeiharok icare ha ceryak lemu penanei kateh bidang adeh? Hik boleh joi kursus atao bengkel bekenat peneniage de jeoi bitawar ya kerajaan atao NGO. Beiloh hik rebut peluang kateh bidang peneniage!

- Kawat-kawat semuak! - Ayat seru
- Beminat ka engkek ru bidang peneniage? - Ayat sensual
- Bidang peneniage berupe nanek bidang de boleh kiog berengkep de lumayan.
- Ayat penyate
- Agok hiselei ha tuntutan lemu. - Ayat larangan
- Begeiharok icare ha ceryak lemu penanei kateh bidang adeh? - Ayat sensual
- Hik boleh joi kursus atao bengkel bekenat peneniage de jeoi bitawar ya kerajaan atao NGO. - Ayat penyate
- Beiloh hik rebut peluang kateh bidang peneniage! - Ayat seru

GLOSARI

akekchep agok (kateh engrok Jahai)

banred tapir

cengkuk serbe cukop
cerenlep duet syiling

depnap hilai
des hutag

honj semboh

jeon jerkek
jeruek ijis kelap kaha manik

kalak kantat

lengleg merajuk

mai tepas mai bunian
mergak bende

nghek tejerat

pekenan bibiak
pergoh nyep
pos poi

rakes bolot
rarok rungut

sakai berupe nanek muh de bigunak ha Orang Asli
senagak selnel
serum serop

RENUJOK

- Awang Had Salleh, 1980. *Pendidikan Ke Arah Perpaduan*. Kuala Lumpur: Fajar Bakti Sdn. Bhd.
- Aziz Deraman, 1995. *Adat dan Pantang Larang Orang Melayu*. Kuala Lumpur: Fajar Bakti Sdn.Bhd.
- Bahagian Pembangunan Kurikulum. Bob Tatamengwal Engrok Semai, Kuala Lumpur: Kementerian Pendidikan Malaysia.
- Balakrishnan.V, 2014. *Aplikasi I-Think Dalam Pendidikan*. Kuala Lumpur: Dewan Bahasa dan Pustaka.
- Hannebaum, L.G., 1998. *Landscape Design: A Pratical Approach*. New Jersey: Prentice Hall.
- Jabatan Mineral dan Geosains Malaysia, Perak, 2017. *Tapak Geologi Geopark Kebangsaan Lembah Kinta*.
- Jabatan Hal Ehwal Orang Asli, 2002. *Kehidupan, Budaya & Pantang Larang Orang Asli*. Kuala Lumpur.
- Kementerian Pendidikan Malaysia, 2017. *Bahasa Semai Tingkatan 1*. Kuala Lumpur: Dewan Bahasa dan Pustaka.
- Kementerian Pendidikan Malaysia, 2018. *Bahasa Semai Tingkatan 2*. Kuala Lumpur: Dewan Bahasa dan Pustaka.
- Kementerian Pendidikan Malaysia, 2019. *Bahasa Semai Tingkatan 3*. Kuala Lumpur: Dewan Bahasa dan Pustaka.
- Kementerian Pendidikan Malaysia, 2019. *Pendidikan Seni Visual Tingkatan 4*. Kuala Lumpur: Dewan Bahasa dan Pustaka.
- Kementerian Pendidikan Malaysia, 2020. *Bahasa Semai Tingkatan 4*. Kuala Lumpur: Dewan Bahasa dan Pustaka.
- Nik Safiah Karim *et.al*, 2010. *Tatabahasa Dewan*. Kuala Lumpur: Dewan Bahasa dan Pustaka.
- Rajantharan M dan S Manimaran, 1994. *Adat dan Pantang Larang Orang India*. Kuala Lumpur: Fajar Bakti Sdn.Bhd.
- Rasila Yas, Shaemas Mat, Aidaliana Alang, Wak Kartinah Bah Goli, 2019. *Buku Teks Bahasa Semai Tingkatan 4*. Kuala Lumpur: Dewan Bahasa dan Pustaka.
- Siti Fuziah Yusof, 2012. *Ulaman Di Sekeliling Anda*. Selangor: A-Hidayah.
- Wang Sang Ann, 1995. *Adat dan Pantang Larang Orang Cina*. Kuala Lumpur: Fajar Bakti Sdn.Bhd.
- Yeong Pak Foo, 2005. *Hidupan Unik*. Kuala Lumpur: Edu Quest Publisher: Pencetakan Advanco Sdn. Bhd.
- Zanariah Abdol, Amir Hazlin Lin, Latifah Tarkep, *et.al*, 2019. *Buku Teks Bahasa Melayu Tingkatan 4*, Kuala Lumpur: Dewan Bahasa dan Pustaka.

INDEKS

- Akta Komunikasi dan Multimedia 1998 9
Asid Deoksiribonukleik 134
ayat
 dasar 173
 ektip ru ayat pesip
 majmok 126
 napi 84
 perintah 149
 sahreh 132
 sensual 144, 181
 seru 161, 181
 tenayak 66
 tungal 126, 176, 181
- Bahasa Semai 25
Balai Seni Visual Negara 47
Bank Negara 156
- cerpen 5, 83, 100, 136, 172
Confucius 21
- Dag
 Libas 3
 Perog 3
 Pug 3
Dato' TPr. Suki Mee 140-141
Datuk Azhar Mansor 172
dron 118
- Emaliana a/p Bah Ali 112
Encik Azmi bin Zainal 147
engrok
 edjektiv 17
 gande 35
 ganti muh 101
 hubong genabog 59
 kerjak 11, 72, 89
 majmok 23
 muh 6, 11, 173
 neimboh 29
 pegas 72, 107
 penguat 78
 peninyap 89
 perintah 95
 sendi muh 41
 seru 53
 tenerbit 47
- Geopark Lembah Kinta 158
gurindam 34
- Hamka 21
herba 32
- Ibnu Khaldun 21
Ifadla Adi 114
- Jabatan Perhilitan 50
- Kamizar a/p Bah Kajang 109
laguk 23, 28, 30
- Lebuh Raya Slim River - Tanjong Malim 44
Lembah Lenggong 173
- MAKNA 84
muzium negara 43
My Health 122
- neulam 35
- Orang Asli Bateq 17
- pantut 16, 52, 94
pelek 31
penjodoh benilang 167
perangkap serkap 3
petua 13
Planetarium Negara 137
pola ayat 114
Pusat Konservasi Hidupan Liar 51
- Rembau 68
- sajak 10, 34, 46, 58, 119
Santuari Ikan Kelah 159
Sarjan Mejar Apot 110-111
Sepilih 29
skrip 53, 117, 124-125
Suruhanjaya Komunikasi dan Multimedia 11
syaer 22, 160
- Thiruvalluvar 21
- Wak Teratai 80-81
- yoga 92
- Zon Ekonomi Eksklusif 174